

Is Meupiya He Tudtulanen Te Keagi Ni Jesu Kristu Sumalà Is Keguguza Ni Lucas

Is Mehitenged te Surat ni Lucas

Isipa nu heini: is Megbevayà nehimu he etew! In-anak sikandin diyà te Bitlihim ne iyan ngazan din si Jesus. Ne tenged kayi egkepurung tew egketueni is Megbevayà. Egketuenan tew heini su geina te zuen etew he migngezanan ki Lucas he insurat din is mehitenged ki Jesus wey inseysey zin ke hentei si Jesus.

Duktur si Lucas piru wazè din ikeeled is kebpekiduma zin te menge etew he minus is ked-etew zan. Ne kayi te surat din inseysey zin is kedtevangi ni Jesus te egkengezeruwan, egkengeey-eyuwan, wey is utew ebpendezeisaya te zuma. Piru is menge etew he kunaan dan ke metazeng sikandan, wazè dan mulà mekezawat te penavang din. (Su geina te kunaan dan ke kenè dan en haazà egkinehnglanan.) Ne heini zed is lalag ni Jesus mehitenged te kedhendini zin te kelibutan, “Ne siak is Kakey te Menusiyà, iyan inhendini ku te kelibutan su wey ku melibri te silut is langun he nemekesuwey te hustu he ibayà.” (Lucas 19:10)

Selselevù ni Lucas te kenà Hudiyu he nekesurat mulà te insurat he Lalag te Megbevayà. Nekagi zin he kenà iyan dà edtevangian te Megbevayà is menge Hudiyu, kekenà, elin daan is langun he edhimuwen din he sakup din. Is menge vahi wey is menge vatà, ne elin edtevangian ni Jesus. Ne ingkeinuinu heini te mezakel he menge etew zutun he timpu su geina te mibpendezeisey mulà sikandan te menge etew.

Heini is surat ni Lucas, iyan mibpesuratan din is emigu zin he si Teofilo. Ne mid-umanan pesurati ni Lucas si Teofilo, ne haazà nehimu he sumpul kayi te surat din, ne iyan ngazan dutun is Nengeulaula te Menge Epustul ni Jesu Kristu.

1 ¹Minahal he Teofilo:
Mezakel is migezam medsurat te gugud te langun he neulaula

zini te kenami he inged mehitenged te menge vaal ni Jesus. ²Insurat dan is negugud kenami te menge etew he iyan nekeahà kayi te menge vaal wey iyan midsangyew te Lalag te Megbevayà. ³Ne siak daan guntaan, geina te mibpurungan ku te ed-istudyu heini, puun pa te puunà kayi te nengeulaula, neisip ku he meupiya zaan ke ebpurungan ku kenikew te edsurat is keguguza kayi te langun. ⁴Umba idsurat ku heini su wey nu mepurung mesavut is tutuu te langun he impenurù kenikew.

Is Kedtutula te Ked-enaka ki Juan Megbebewtismu

⁵Ne heini is eguguzen ku kenikew, ebpuun pa zutun te timpu zengan hein iyan pa hadi si Hirudis diyà te prubinsya he Hudiya. Ne zuen dutun maama he egnezeanan ki Zacarias. Ne heini si Zacarias, sevaha sikandin he memumuhat he kevuwazan te etew zengan he si Abyas. Ne is menge kevuwazan ni Abyas, menge memumuhat sikandan te Megbevayà. Ne si Zacarias, esawa zin is bahi he egnezeanan ki Elisabet he kevuwazan te memumuhat dengan he si Arun. ⁶Si Zacarias wey haazà is esawa zin, metazeng sikandan he etew su wazà igkesawey zutun te kebpurungi zan te edtuman te langun he menge tulumanen wey menge sugù te Megbevayà. ⁷Ne haazà is teleesawa, wazè dan anak su si Elisabet ne kenà ed-anak, ne zutun he timpu ne utew zan en menge megurang.

⁸Ne neuma is timpu zutun he iyan en si Zacarias wey is menge zuma zin he kevuwazan ni Abyas ebpekepemuhat diyà te zekelà he simbahan he egnezeanan te Valey te Megbevayà. ⁹Ne zutun sumalà is imbilinbilin he vetasan te menge mememuhat, nepilì si Zacarias pinaagi te ripa su wey iyan sikandin mekeseled dutun te simbahan he Valey te Megbevayà he ibpetutung te veyewà. ¹⁰Ne te kemulu zin pa ed-ul-ulaha haazà, ne mezakel is menge etew ziyà te gawas he ebpemen-ampù diyà te Megbevayà. ¹¹Ne zutun mibpaahà kandin is belinsuguen te Megbevayà ne heini is belinsuguen, dutun edhithitindeg te egkekewanan te vangkù he tutungà te veyewà. ¹²Ne zutun te kegkeahaa ni Zacarias kayi netentanan sikandin su utew nahandek. ¹³Ne zutun migkagi kandin haazà is belinsuguen te, “Kenè ka mahandek, Zacarias, su nezingeg te Megbevayà is ked-ampù nu ne edhimuwen din he megingey nu is esawa nu he si Elisabet ne ed-anak si Elisabet te maama ne iyan nu ingazan kandin si Juan. ¹⁴Uteu nu igkelihey heini ne utew egkengegalew is mezakel he menge etew emun id-anak en heini is batà, ¹⁵su utew zekelà is pid-etawan din sumalà is ked-isipa kandin te Nengazen. Kenà sikandin ed-inum te vinu wey minsan hengkey he ebpekelangut. Ne puun dà dutun te kenè pa sikandin id-anak egkepurung sikandin egkeulini te Wagas he Mulin-ulin. ¹⁶Ne pinaagi te kebpenerù din,” egkagi haazà is belinsuguen, “mezakel is menge kevuwazan ni Israyil he edlikù edtuu te Megbevayà he iyan ed-ezapen te menge ginikanan dan dengan. ¹⁷Heini is anak nu,

edsuguen sikandin he ibpehuna te kebpekeuma te Nengazen ne ed-ulinan sikandin te Wagas he Mulin-ulin iring te ked-ulini zengan te Megbevayà te ebpeneuven he si Elias. Ne is gehem din, ne iyan ded sikan is gehem ni Elias dengan. Ne pinaagi te minge penurù kayi te anak nu egkehimu zutun he ebpeked-uuliey te meupiya he gehinawa is minge amey wey te minge anak dan. Is minge etew he wazà mebpezumazuma te minge sugù te Megbevayà, pinaagi te penurù kayi te anak nu ebpekedsendit dan ne zutun metazeng human is ed-isipen dan. Ne pinaagi kandin mezakel he minge etew is ed-endaman dan is kebpekeuma te Nengazen,” lalag te velinsuguen.

¹⁸Ne zutun midtavak si Zacarias te, “Hengkey is tuus wey ku metueni he tutuu he egketuman heini is migkagi nu? Su siak wey is esawa ku, utew key en megurang.” ¹⁹Ne midtavak haazà is belinsuguen te Megbevayà te, “Iyan a si Gabriel, sikan is suluguen te Megbevayà he layun diyà te etuvangan din. Midsugù e zin dini te kenikew wey ku ikepesavut heini is tudtul te utew meupiya he egkeulaula. ²⁰Ne egkeemew ka ne kenè ke en ebpekekagi taman te timpu he kenè pa heini egketuman su wazè nu tuuwi heini is migkagi ku kenikew he kenà duwazuwa he egketuman dutun te timpu he egkesuatan te Megbevayà,” ke sikandin.

²¹Ne is minge etew he edtagadtagad diyà te gawas dutun te simbahan he Valey te Megbevayà, nengeinuinu zan su maan is utew neuget si Zacarias dutun te seled. ²²Ne hein midlawang en sikandin dutun, ne kenè en ebpekekagi ziyà te kandan. Ne netuenan dan dutun he zuen impaahà kandin te Megbevayà dutun te seled te simbahan su kenè en ebpekekagi ne ebpenguyew-uyew zà sikandin diyà te minge etew. Ne puun dà dutun ne emew sikandin.

²³Ne hein neuma is timpu he zutun egkeilisan si Zacarias te minge vaal zin dutun te simbahan, mid-ulì sikandin diyà te inged din. ²⁴Ne wazà utew meuget dutun ne mibmgingey is esawa zin he si Elisabet. Ne taman te minge lelima he vulan dutun wazà si Elisabet megawasgawas diyà te valey. ²⁵Ne ke sikandin te, “Human guntaan ingkehizu a te Megbevayà su ebpekeanak e zed, ne is wazè ku kebpekeanak dengan ne kenè ku en igkeeled.”

Is Kedtutula te Ked-enaka ki Jesus

²⁶Ne zutun hein minge heenem en he vulan is kegingayan te esawa ni Zacarias, midsugù en maan te Megbevayà is belinsuguen din he si Gabriel pehendiyà te inged he egngезanan te Naserit he ziyà te prubinsya he Geliliya. ²⁷Iyan mibpeveyaan kandin dutun is raga he egngезanan ki Maria. Ne heini si Maria, nekegunan te kenakan he egngезanan ki Jose. Ne heini si Jose, ne kevuwazan te hadi dengan he si David. ²⁸Ne

nekeuma is belinsuguen diyà te ki Maria ne ke sikandin te, “He Bayi, ingkehizu ka te Megbevayà ne ed-ipaten ke zin!” ²⁹Ne hein nezinig ni Maria heini, netentanan utew sikandin ne mid-isip-isip din ke hengkey vuwa haazà is kehulugan dutun te lalag te velinsuguen. ³⁰Ne migkagi haazà is belinsuguen te, “Kenè ka, Maria, mahandek su utew zekelà is gagew te Megbevayà kenikew. ³¹Ebmegingey ka ne ebpekeanak ka te maama ne ngezani nu sikandin ki Jesus. ³²Ute w zekelà is pid-etawan din ne egkengezanan sikandin he Anak te utew lavew he Megbevayà. Ne edhimuwen te Nengazen he Megbevayà he edhadì heini is id-anak nu iring te kedhadì dengan te kepuun din he si David. ³³Ne heini is anak nu, wazà pidtemanana te kedhedii zin keniyu te menge kevuwazan ni Hakub. Wazè en ketepusan te kedhadì din!”

³⁴Ne zutun migkagi si Maria ziyà te velinsuguen te, “Egkemenumenue ve heini? Su rage e man ne wazè e pa meuvayi te maama.” ³⁵Ne midtavak haazà is belinsuguen te, “Is Wagas he Mulin-ulin, iyan ebpengelintau kayi ziyana te kenikew ne edlig-enana ka te gehem te Megbevayà. Ne tenged kayi, heini is id-anak nu, pudu metazeng is menge ulaula zin ne egkengezanana sikandin he Anak te Megbevayà. ³⁶Ne kenà iyan dà heini tudtul ku kenikew su is ayè nu he si Elisabet, minsan te utew en sikandin megurang ne mibmegingey en sikandin. Menge heenem en he vulan guntaan is kegingayan din he zengan, iyan isip te menge etew he kenà sikandin ed-anak. ³⁷Umba egkeulaula heini su egkehimu te Megbevayà is minsan hengkey.”

³⁸Ne midtavak si Maria te, “Berakat he mehitavù kediey sumalà is migkagi nu su mepezumdumahan a te Nengazen.” Ne zutun mid-ewaan si Maria zutun te velinsuguen.

Is Kebpenumbaley ni Maria Ziyà te ki Elisabet

³⁹Ne wazà utew zutun meuget mibpenines si Maria ne migaanggaan megenat su edhendiyà te sevaha he inged he vuvungan he sakup te prubinsya he Hudiya. ⁴⁰Ne zutun te kebpekeuma zin diyà te engki Zacarias wey Elisabet, mibpenelehuzan sikandin. ⁴¹Ne hein nezinig ni Elisabet haazà is kebpenelehuzan ni Maria ne midredsà medleguwat haazà is batà diyà te getek ni Elisabet. Ne zutun nepurung si Elisabet meulini te Wagas he Mulin-ulin. ⁴²Ne si Elisabet, tenged te utew nelipey, mibpekezaging is egkagi te, “Wazà ebpekerepeng kenikew he vahi su utew ka mahal ziyà te gehinawa te Megbevayà. Ne mahal zaana diyà te gehinawa zin heeyan is id-anak nu. ⁴³Maan buwa is utew a ingkegagew te Megbevayà su maan is ebpenumbelayan a kenikew te iney te mibpili he hadì? ⁴⁴Umba netuenan ku heini su zutun te kegkeziniga ku zà kenikew, heini is dini te getek ku, nekeleguwat te kegkegalew zin. ⁴⁵Umba, Maria, edtuvazan ka te Megbevayà su midtuu ka he egketuman is impesavut kenikew te velinsuguen te Megbevayà!”

Is Kedalig ni Maria

- 46 Ne zutun migkagi si Maria te,
 “Utew a ebpekezalig
 te Nengazen.
- 47 Utew ku ingkelipey
 is Megbevayà
 he iyan menluluwas ku.
- 48 Su siak is suluguen din
 he utew minus is pid-etawan,
 wazè e zin ded melipati.
 Ne puun guntaan
 egkagi is tivuuk he menusiya
 he iyan a vahi he utew lavew
 is tuvad kandin te Megbevayà.
- 49 Egkekagi zan heini
 tenged te minge egkein-inuwan
 he mid-ulaula kediey te utew lavew
 he mekegegehém he Megbevayà.
 Utew lavew is ngazan din.
- 50 Puun pa te nengehuna he minge etew zengan
 taman en guntaan,
 dekelà is hizu zin diyà te minsan hentei
 he edtahud kandin.
- 51 Nehimu zin is minge egkein-inuwan he vaal.
 Nemekepelaguy kandin is memepelevawen,
 ne wazè dan meveeli is ed-isipen dan.
- 52 Duen minge lavew he hadi he mibpekevavè din is pid-etawan
 ne zuen daan minge etew he minus is pid-etawan
 he mibpeketikang din is pid-etawan.
- 53 Is minge etew he egkengeayuayu,
 iyan ebegayan din te meupiya,
 iyan, is minge sepian,
 ibpehipanew zin he wazè dan uwiten.
- 54,55 Is impenaad din dengan diyà te minge kepuun tew
 he si Abraham wey is minge kevuwazan din, wazè din lipati.
 Midtevangán kiw zin is minge suluguen din he kevuwazan ni Israyil.
 Ne egkehizuwan kiw zin daan te wazà pidtemanan
 is minge nepili din he etew he minge kevuwazan ni Abraham,” ke si
 Maria.
- 56 Ne minge tetelu he vulan dutun is ked-ubpà ni Maria ziyà te engki
 Elisabet ne human med-ulì sikandin.

Is Ked-enaka ki Juan Megbebewtismu

⁵⁷Ne hein neuma is andew, ne mid-anak si Elisabet ne maama haazà is anak din. ⁵⁸Ne hein nezineg te minge kezumahan dan wey minge siringan dan heini is utew meupiya he mid-ulaula te Megbevayà ki Elisabet, nengelipey zan daan.

⁵⁹Ne hein walu en he andew is ked-enaka zutun te vatà midtuman dan is betasan dan te minge Hudiyu su emun maama is id-anak, ne zutun te ikewalu he andew edsirkunsidaren dan. Ne is minge etew zutun, egngезanan dan pezem haazà is batà ki Zacarias su iyan ngazan dutun te amey zin. ⁶⁰Iyan, si Elisabet, wazà mesuat dutun ne ke sikandin te, “Kenà egkehimu su Juan is igngazan kandin.” ⁶¹Ne migkegiyan dan si Elisabet te, “Maan? Wazà minsan sevaha te minge kezuzumahi niw he ebpuunan te iring keniyen he ngazan!” ⁶²Ne mid-uyawan dan is amey zutun te vatà su id-insè dan ke hentei is igngazan din dutun te anak din. ⁶³Ne zutun mid-uyew si Zacarias he vegayi zan sikandin te edsuratan din te igngazan din, ne iyan insurat din dutun is, “Si Juan is ngazan keniyen te vatà.” Ne zutun utew zan nengeinuinu. ⁶⁴Ne segugunà nekekagi en maan si Zacarias ne nekezalig sikandin te Megbevayà. ⁶⁵Ne is langun he minge siringan dan, hein nezineg dan heini, utew zan nengeinuinu. Ne is tudtul zutun te neulaula, segugunà nekeeneb diyà te langun he minge vuvungan he inged he sakup te prubinsya he Hudiya. ⁶⁶Ne wazà heini melipati te langun he nemekezineg. Ne netagù diyà te isip dan ke hengkey vuwa is ibpeulaula keuzemà te Megbevayà dutun te vatà ke edekelè en su utew keladu he ed-ulinan te Megbevayà haazà is batà.

Is Tagnà ni Zacarias

⁶⁷Ne zutun nepurung meulini is amey zin he si Zacarias te Wagas he Mulin-ulin ne migkagi zin haazà is impinted kandin ne ke sikandin te,

⁶⁸“Edeligen tew is Nengazen he Megbevayà tew
te minge kevuwazan ni Israyil
su sikitew is ed-azap kandin,
mibulusan kiw zin ne midlibri kiw zin
te minge kuntada tew.

⁶⁹Edsuguen din dini te kenitew
is Menluluwas he kevuwazan
duen te suluguen te Nengazen dengan
he si Hadì David.

⁷⁰Is Megbevayà, pinaagi te minge ebpemeneuven din dengan,

⁷¹migkagi zin he edtevangen kiw zin
wey kiw kenà mezaag te minge kuntada tew,
ne wey kiw zaan kenà mahandek

- te langun he egkepauk kenitew.
- 72 Migkagi zin daan he ingkehizu zin
is menge kepuun tew ne kenè din egkelipatan
is penaad din kandan.
- 73 Utew mezesen is penaad din dengan diyà te kepuun tew he si Abraham
- 74 su impenaad din
he sikitew
is menge kevuwazan ni Abraham,
edlibriyen kiw zin wey kiw kenà mezaag
te menge kuntada tew ne zutun
kenè kiw egkengehandek is ed-ulaula
te egkesuatan din.
- 75 Ne egkehimu
he metinumanen wey metazeng
is ked-ezapa tew kandin
andew-andew te kemulu kiw pa
zini te lumpad te kelibutan.”
- 76 Ne zutun migkegiyan ni Zacarias haazà is anak din te,
“Ne sikew, anak ku, iyan ka egeraran keuzemà
he ebpeneuven te utew lavew he Megbevayà.
Edsuguen ke zin he ibpehuna zuen te Nengazen tew
su wey nu mekegiyi is menge etew
he endami zan is kebpekeuma zin.
- 77 Ibpesavut nu kandan he egkevegayan sikandan
te untung he wazà pidtemanana
emun ebuyù dan te pesaylu
ziyà te Megbevayà.
- 78 Su utew hihizuwen kenitew is Megbevayà.
Is kedlibriya zin kenitew te silut,
ne iring te kedsilà te andew emun egkepawà.
- 79 Henduen be te ziyè kiw ed-ubpà
te utew merusirem su utew kiw egkengehandek te silut
he iyan is wazè din ketepusan he kemetayen;
iyan, emun ebpekeuma is Nengazen tew
edteyawan kiw zin te gagew zin.
Ne ibpeehè din kenitew is paagi
wey ebmelinawen is ked-ubpè tew,” ke si Zacarias.
- 80 Ne haazà is anak ni Zacarias, midtulin ne mid-iseg daan is ketau
zin te ked-isip. Ne hein nekeiseg-iseg en is kezekelè din ne midhendiyà
sikandin te tanà he kenè ed-ubpaan te etew ne zutun med-ubpà taman
te neuma haazà is timpu te kebpenurù din te menge kezuzumahi zin he
kevuwazan ni Israyil mehitenged te Lalag te Megbevayà.

Is Ked-enaka ki Jesus
(*Lucas 2:1-7; Mateo 1:18-25*)

2 ¹Ne hein iyan pa si Augusto hadi diyà te inged he Ruma, mibaal sikandin te velaud he mebpsinsus is langun he menge etew te seled te menge ginhedian he sakup din. ²Ne iyan en haazà aney en he kedsinsusa te etew hein iyan pa si Sirinyu gubirnedur ziyà te prubinsya he Sirya. ³Ne zutun te kedsinsus, ne kinahanglan he ziyà edsinsusa is kada etew te inged te menge kepuun din.

⁴Umba, si Jose is dutun ed-ubpà te inged he Nesorit he ziyà te prubinsya he Geliliya, kinahanglan he edhendiyà te prubinsya he Hudiya, diyà te inged he Bitlihim he iyan inged he mid-enakan ki Hadì David dengan; su si Jose, kevuwazan sikandin ni Hadì David. ⁵Ne miduma ni Jose si Maria, sikan is bahi he nekegunan din su ebpsinsus dan.

Megingey zutun si Maria. ⁶Ne hein diyè dan en te inged he Bitlihim, netuman is ked-anak ni Maria, ⁷ne in-anak din is maama he iyan en penganayan. Ne mibukusan din haazà is batà te malung ne impehizegè din diyà te selemakà te kudà su wazè dan ed-eregan dutun te valey he ebpehizegaan te etew su neenget en te etew.

Is Ebpen-elima te Kerehidu Wey Sikan is
Menge Velinsuguen te Megbevayà

⁸Ne iyan daan haazà he kezukileman, te uvey zutun he inged duen menge etew ziyà te penebtavà su ibpepenabtab dan is menge ayam dan he kerehidu. ⁹Ne netekew zan te mibpaahà kandan is belinsuguen te Nengazen ne neketayew ziyà te kandan is mekegegehem he anlag te Megbevayà ne utew zan dutun nengehandek. ¹⁰Ne migkagi haazà is belinsuguen te Megbevayà te, “Kenè kew mahandek su midsugù a zini wey ku sikiyu mepenudtuli te utew meupiya he tudtul he iyan utew igkelipey te tivuuk he menusiyà. ¹¹Su kayi te kezukileman in-anak diyà te Bitlihim he iyan inged ni Hadì David dengan, is Nengazen he iyan kes mibpili te Megbevayà he ibpahadi. Iyan sikandin edlibri keniyu te silut te Megbevayà. ¹²Egketuusan niw haazà is batà su emun egkeehè niw is batà he mibukusan te malung ne impehizegà diyà te selemakà te kudà, ne iyan en sikandin,” egkagi haazà is belinsuguen.

¹³Ne zutundutun mibpaahà daan is utew mezakel he menge velinsuguen te Megbevayà he ebpemendalig te Megbevayà, ¹⁴ke sikandan te,

“Edeligen tew is Megbevayà he ziyà te langit.
Ne zini te lumpad te kelibutan
mebmelinawen is kebpekesavuk
te langun he menge etew he igkesuat te Megbevayà.”

¹⁵Ne zutun mid-uli diyà te langit haazà is minge velinsuguen. Ne hein neipus haazà mibpelelagà haazà is minge ebpepemenabtab te, “Kuwà kiw en su ebpehendiyè kiw te Bitlihim su wey tew maahà heini is midtudtul kenitew te velinsuguen te Megbevayà.” ¹⁶Ne zutun nemehipanew zan is egkengezegdegusu ne nekeuma zan diyà te ki Jose wey ki Maria ne neehè dan daan haazà is batà he impehizegà diyà te selemakà te kudà. ¹⁷Ne zutun te neehè dan haazà is batà midtudtul zan engki Jose sikan is langun he midtudtul kandan te velinsuguen te Megbevayà mehitenged dutun te vatà. ¹⁸Ne langun dutun te nekezineg kayi te tudtul te minge mibpepemenabtab, ne utew zan nengeinuinu. ¹⁹Ne si Maria, wazè din melipati heini is langun he nezingè òin, kekenà, mibpurungan òin isisipa. ²⁰Ne haazà is ed-elima te minge kerehidu, mid-uli dan is utew nengelipey. Ne midalig dan is Megbevayà tenged te langun he nezingè dan wey neehè dan su netuman haazà is langun dutun te migkagi te velinsuguen te Megbevayà.

Is Kedsirkunsidara ki Jesus

²¹Ne is minge ginikahan dutun te vatà, hein nekewalu en is ked-enaka kandin ne midsirkunsidar zan sikandin sumalà is betasan dan. Ne migngезanan dan sikandin ki Jesus he iyan sikan is inngazan kandin duen te velinsuguen te wazè pa sikandin ikegingey.

Is Kedhelaza ki Jesus Diyà te Megbevayà

²²Ne kepatan he andew puun dutun te ked-enaka te vatà, iyan en timpu he edtumanen ni Jose wey ni Maria is betasan te kedlumpiyu sumalà is imbilinbilin ni Moises dengan mehitenged te vahi he sikan pa med-anak. Ne mid-uwit dan haazà is batà diyà te Hiruselim ne midseled dan diyà te simbahan he egngезanan te Valey te Megbevayà su id-etuvang dan haazà is anak dan diyà te Megbevayà. ²³Iyan id-ul-ulaha zan dutun su edtumanen dan sikan is insurat dengan duen te kesuguan he imbegey te Megbevayà he edhenduen te, “Is penganey he anak he maama, ne ebpeveyveyaan te Megbevayà.” ²⁴Ne si Maria wey si Jose, duen impemuhat dan dutun su sumalà is insugù dengan te Nengazen ne kinahanglan he zuen dezuwa he limuken ne emun kenà ne zezuwa he merepatik he ibpemuhat te sikan pa med-anak.

²⁵Ne zuen dutun maama he ed-ubpà diyà te Hiruselim he egngезanan ki Simeon. Metazeng haazà he etew he layun edsimba te Megbevayà. Kenà egkeawà diyà te gehinawa zin is kebperetenga zin te kegketuman te midtagnà dengan he zuen timpu he edlibriyen te Megbevayà is nengepili òin he minge etew he minge kevuwazan ni Israyil. Layun ed-ulinan si Simeon te Wagas he Mulin-ulin. ²⁶Ne impesavut kandin he zaan te Wagas he Mulin-ulin he kenà tekew en ebpatay taman te kenè òin pa egkeahà

is impenaad he etew he nepilì te Nengazen he ibpahadi din te menusiya.

²⁷Ne zutun te mid-uwit ni Jose wey ni Maria haazà is anak dan ne midseled dan dutun te simbahan su edtumanen dan sikan is insugù te kesuguan, daan en dutun si Simeon te seled su iyan impinted kandin te Wagas he Mulin-ulin. ²⁸Ne hein naahà ni Simeon haazà is batà, nesepipi zin ne mibpeselematan din is Megbevayà. ²⁹Ke sikandin te,

“Na, Nengazen, midtuman nu en human is penaad nu kediey.
Ne egkehimu en he idtugut nu en he ebpathey a
su wazè en human edtegazan ku.

³⁰Neehè ku en is midsugù nu
he iyan edlibri kenami te menusiya te silut.

³¹Iyan sikandin Menluluwas he imbegey nu he egkeahà
te tivuuk he menusiya.

³²Iyan sikandin idtayew te isip
te menge etew he kenà menge Huidiyu
he wazà mesayud ke hentei ka is tutuu he Megbevayà.
Pinaagi kandin edeligen key is nengepilì nu
he etew he menge kevuwazan ni Israyil.”

Iyan heini migkagi ni Simeon.

³³Ne haazà is ginikanan dutun te vatà, utew zan nengeinuinu kayi te migkagi ni Simeon mehitenged dutun te anak dan. ³⁴Ne in-ampù daan sikandan ni Simeon he tuvazi sikandan te Megbevayà ne migkegiyan din si Maria, sikan is iney zuen te vatà te, “Heini is anak nu, nepilì sikandin te Megbevayà su wey pinaagi kandin mevahinbahin kiw is menge kevuwazan ni Israyil. Ne is edsundan kandin ne egkelibri, ne sikan is kenà edsundan, ne edsilutan te Megbevayà. Egketuusan he sugù sikandin te Megbevayà, iyan, edsumpeliten sikandin te mezakel he menge etew, ³⁵ne pinaagi kandin egketuusan is menge mezaat he isip dan. Ne sikew is iney zin, tenged te egkuntedahan sikandin te mezakel, utew ebmesakit is gihinawa nu keuzemà.” Iyan heini migkagi kandin ni Simeon.

³⁶Ne zutun te simbahan he Valey te Megbevayà duen meritan he egngезanan ki Ana he ebpeneuven te Megbevayà. Anak sikandin ni Penuwil he kevuwazan ni Asir. Megurang en utew haazà is bahi. Hein menguhed pa sikandin, neesawa, iyan, seled te menge pitu zà he tuig te kegkeesawa zin, ne nevalu sikandin. ³⁷Ne menge keweluwan wey heepat en he tuig is kegkevalu zin. Ne layun sikandin diyà te simbahan su andew wey se mezukilem ne edsimba sikandin te Megbevayà, ne zuen timpu he kenà sikandin egkaan *su wey zin utew mepurungi is ked-ampù din diyà te Megbevayà*. ³⁸Ne te kemulu pa zutun te simbahan si Jose wey si Maria, nekeuma sikandin ne midalig din is Megbevayà tenged dutun te vatà. Ne impesavut din dutun ke hentei haazà is batà diyà te langun he menge etew he netigum dutun he hustu is kebpeebuta zan te kedlibriya te Megbevayà te menge kevuwazan ni Israyil.

³⁹Ne hein nepasad ni Jose wey ni Maria haazà is kedtumana zan te langun he insugù diyà te kesuguan he imbegey te Nengazen, mid-uli dan diyà te ed-ubpaan dan diyà te inged he Neserit diyà te prubinsya he Geliliya. ⁴⁰Ne midekelà haazà is batà ne mibmezesen is lawa zin, ne utew sikandin metau he vatà ne midtuvazan sikandin te Megbevayà.

Is Kebpen-ahaa ki Jesus te Menge Ginikanan Din

⁴¹Ne kada tuig edhendiyà is menge ginikanan ni Jesus te Hiruselim su edtelavuk dan te pista he egngезanan te Kedlevayi. ⁴²Ne hein sepulù en wey zezuwa he tuig is idad ni Jesus midtelavuk dan te pista sumalà is ulaula he neleyaman dan. ⁴³Ne hein netapus haazà is pista migenat dan su ed-uli dan, ne mibpetagak si Jesus diyà te inged he Hiruselim, iyan, wazà heini metueni te ginikanan din. ^{44,45}Kunaan dan ke zutun si Jesus te menge zuma zan te ebpenhipanew med-elupitpit. Ne hein sengeandew en is kedhipanew zan ne human dan mesegipà he wazà dutun si Jesus, ne midsusi zan is menge kezuzumahi zan wey menge emigu zan ne neehè dan he wazà dutun iyan si Jesus. Ne zutun midlikù dan diyà te Hiruselim ne mibpengehè dan. ⁴⁶Ne hein tetelu en he andew is kebpengehè dan, neehè dan sikandin diyà te simbahan he Valey te Megbevayà is ebpemekibitiyara te menge menunudlù te kesuguan. Ebpemineg te menge lalag dutun te menge menunudlù ne zuen daan menge insè din kandan. ⁴⁷Ne utew nengeinuinu is langun he nekezineg te menge tavak din te menge insà kandin su utew sikandin metau. ⁴⁸Ne si Maria wey si Jose, utew zan neinuinu hein neturedu zan sikandin diyà te simbahan ne migkagi is iney zin te, “Mama, maan is mid-ulaula nu kenami heini is utew zey igkeseeng? Su is amey nu wey siak, ne utew key neipeng is ebpen-ahà kenikew.” ⁴⁹Ne midtavak si Jesus te, “Maan is ebpen-ahaan a keniyu? Wazè niw ve metueni he kinahanglan he zini a te valey te Amey ku?” ⁵⁰Iyan, wazè dan mesavut ke hengkey is kebulugan dutun te migkagi zin.

⁵¹Miduma kandan si Jesus te ed-uli diyà te Neserit su mepezumdumahan sikandin te ginikanan din. Ne wazà melipati te iney zin haazà is langun he neulaula, kekenà, netipigan diyà te isip din. ⁵²Ne midtulin is lawa ni Jesus ne mid-iseg is ketau zin te ked-isip. Inmeupiya sikandin te gehinawa te Megbevayà ne henduen ded daan is etew.

Is Kedsangyew ni Juan Megbebewtismu

(Lucas 3:1-18; Mateo 3:1-12; Marcos 1:1-8; Juan 1:19-28)

3 ^{1,2}Ne zutun te ikesepulù wey lelima he tuig te kedhadì ni Hadì Tibiryu ziyà te inged he Ruma duen impesavut te Megbevayà diyà te ki Juan he anak ni Zacarias. Ne ziyà si Juan te tanà he wazà duen ed-ubpà he menge etew. Ne zutun he timpu iyan gubirnedur

ziyà te prubinsya he Hudiya si Punsyu Pilatu. Ne ziyà te prubinsya he Geliliya iyan gubirnedur si Hirudis. Ne si Felipe, is hazi ni Hirudis, iyan gubirnedur ziyà te minge prubinsya he Iturya wey Terekuniti. Ne si Lisanyas, iyan gubirnedur diyà te prubinsya he Ebilinya. Ne si Anas wey si Keyipas, ne iyan minge lavew he memumuhat diyà te inged he Hiruselim. ³Si Juan, mibayaan din is langun he minge inged dutun te uvey te wahig he Hurdan ne mibpenurù din is minge etew zutun. Ke sikandin te, “Iniyugi niw is memezaat he minge ulaula ne mebpebewtismu kew ne ebpeseyluwen te Megbevayà is minge salè niw.” ⁴Heini is kebpenurù ni Juan, iyan kegketuman te netagnà he insurat dengan ni Esaias te ebpeneuven te Megbevayà su ke si Esaias te, “Duen etew ziyà te tanà he wazà duen ed-ubpà he etew. Ne egkezineg sikandin te minge etew he edangep kandin is egkagi te,

‘Megaan ebpekeuma is Nengazen.

Higewani niw is ibayè din;
tendanga niw is dalan he ed-ikulen din,
he ke và dà egkegiya, endami niw
is kebpekeuma zin.

- ⁵ Ne tembaki is minge zal-ug;
ne emun nenleblebi haazà is ibayà, ne petaga.
Ne emun nengepekùpekù ne kinahanglan he tendanga,
ne emun duen minge mibuketur
ne kinahanglan he ebpenhayen.
- ⁶ Ne zutun ibpaahà te Megbevayà
te tivuuk he menusiya is edsuguen din
he Menluluwas.’ ”

⁷Ne zuen mezakel he minge etew he nemenhendiyà te ki Juan su ebpebewtismu. Ne migkegiyan din sikandan te, “Iring te ulaula te uled is ulaula niw su teruen kew. Maan is edhendini kew? Kunaan niw vuwa ke ebpekegawas kew te silut te Megbevayà. ⁸Emun tutuu he mid-iniyugan niw is memezaat he ulaula, ipeehè niw pinaagi te minge meupiya he vaal niw. Ne kenè niw iyan serigi is kevuwazan kew ni Abraham su wazà dutun pulus diyà te Megbevayà. Su egkegiyan ku sikiyu he emun iyan egkinehenglanan te Megbevayà, ne egkehimu he ebeelan din heini is minge vatu he kevuwazan ni Abraham. ⁹Is ebpiley te kayu, migkayew en su ebpemilayen din en is minsan hengkey he kayu he kenà meupiya is begas din su wey mevinsuli, *he ke và dà egkegiya, is etew he kenà meupiya is ulaula zin, edsilutan sikandin te Megbevayà.*”

¹⁰Ne haazà is minge etew, mid-insaan dan si Juan, ke sikandan te, “Hengkey is ed-ul-ulahan dey wey key mekelikey kenian te egkegiyen nu?” ¹¹Ne midtavak ni Juan sikandan te, “Sikan is etew he zezuwa is kumbalè din, ne vegayi zin sikan is wazè din kumbalà. Ne iring din ded daan sikan is

etew he zuen din keenen, ne vegayi zin sikan is wazà egkekaan,” ke sikandin. ¹²Ne zutun nekeuma is minge menunukut te vuhis su ebpebewtismu zaan sikandan. Ke sikandan te, “Menunudlù, hengkey is egkesuatan te Megbevayà he ed-ul-ulahan dey?” ¹³Ne ke si Juan te, “Emun ebpenukut kew, kenè niw limbungi is minge etew te ibayad dan te vuhis. Iyan niw zà kuwaa ziyà te kandan is insugù keniyu te gubirnu.” ¹⁴Ne zutun duen minge sundaru he mid-insà diyà te ki Juan te, “Sikami, hengkey is ibpeulaula kenami te Megbevayà?” Ne midtavak si Juan te, “Engkezi niw is kebpeleihendeka te minge etew wey is ked-ulugi niw kandan te kewsa te kegkuwaa niw te selapi dan. Is sildu niw, metengkai en diyà te gehinawa niw.”

¹⁵Is minge etew zutun, hein nezineg dan haazà is kebpenurù ni Juan netenuzan dan is netagnà he hadi he mibpili te Megbevayà ne egkeisip dan he kela ke iyan si Juan. ¹⁶Ne tenged kayi, migkagi si Juan diyà te kandan te langun te, “Duen ed-ilis kediey he utew lavew su minsan is kebpuul-ut dà te minge sepatus din, kenè e pa zait he suluguen din. Wahig is ibewtismu ku keniyu,” ke si Juan, “iyang, haazà is migkagi ku, ebewtismu zaan keniyu. Is edtuu, ne ebewtismuwan din te Wagas he Mulin-ulin. Ne is kenà edtuu, ne iyan din ibewtismu kandan is hapuy. ¹⁷Geina te ibpedshivayè din te edtapid is minge metazeng wey is minge lalung he etew, iring sikandin te ebpalid te parey he id-awè din is ukap dutun te parey. Ne haazà is parey ederengdengen, iyan, is ukap, edtutungen din diyà te hapuy he kenà egkeevukan,” ke si Juan.

Is Kebewtismuwi ki Jesus

(Lucas 3:18-22; Mateo 3:13-17; Marcos 1:9-11)

¹⁸⁻²²Ne sevaha he andew zutun hein neketapus is langun he minge etew he ebpebewtismu, mibpebewtismu zaan si Jesus diyà te ki Juan. Ne zutun mid-ampù si Jesus ne te kemulu pa sikandin ed-ampù nepuwasan is langit ne midlugtanà diyà te kandin is Wagas he Mulin-ulin he henduen te merepatik. Ne nezineg dutun is Megbevayà he egkagi ziyà te langit he ke sikandin te, “Minahal ku sikew he Anak ku. Utew ku en sikew igkelipey.”

Uteu pa mezakel is impenurù ni Juan dutun te minge etew su ibpesavut din kandan is Meupiya he Tudtulanen. Migkagi ni Juan diyà te minge etew he mezaat is ulaula ni Gubirnedur Hirudis su mid-agem zin is ipag din he si Hirudyas he esawa te hazi zin he si Felipe. Ne kenà iyan dà mezaat he ulaula ni Hirudis haazà is nekagi ni Juan su mezakel pa zutun is utew memezaat he vaal zin. Ne kenà dutun dà taman te memezaat he ulaula zin he mibeelan din, kekenà, impepirisu zin pa si Juan.

Is Kepuun ni Jesus

(Lucas 3:23-38; Mateo 1:1-17)

²³Ne hein minge ketluan en he tuig is penuigen ni Jesus ne mibpuunan din is ebpeveelan kandin te Megbevayà. Iyan diyà te isip te minge etew

he anak sikandin ni Jose. Ne si Jose, anak ni Hili. ²⁴Ne si Hili, anak ni Matat; ne si Matat, anak ni Levi; ne si Levi, anak ni Milki; ne si Milki, anak ni Hani; ne si Hani, anak ni Jose. ²⁵Ne si Jose, anak ni Metatyas; ne si Metatyas, anak ni Amos; ne si Amos, anak ni Nahum; ne si Nahum, anak ni Isli; ne si Isli, anak ni Nagey. ²⁶Ne si Nagey, anak ni Maat; ne si Maat, anak ni Metatyas; ne si Metatyas, anak ni Simi; ne si Simi, anak ni Jose; ne si Jose, anak ni Huda. ²⁷Ne si Huda, anak ni Huwanan; ne si Huwanan, anak ni Risa; ne si Risa, anak ni Surubebil; ne si Surubebil, anak ni Selatil; ne si Selatil, anak ni Niri; ²⁸ne si Niri, anak ni Milki; ne si Milki, anak ni Adi; ne si Adi, anak ni Kusam; ne si Kusam, anak ni Ilmudam; ne si Ilmudam, anak ni Iyir; ²⁹ne si Iyir, anak ni Josue; ne si Josue, anak ni Eliezer; ne si Eliezer, anak ni Hurim; ne si Hurim, anak ni Matat; ne si Matat, anak ni Levi. ³⁰Ne si Levi, anak ni Simeon; ne si Simeon, anak ni Huda; ne si Huda, anak ni Jose; ne si Jose, anak ni Hunan; ne si Hunan, anak ni Iliyakim. ³¹Ne si Iliyakim, anak ni Miliya; ne si Miliya, anak ni Meinan; ne si Meinan, anak ni Metata; ne si Metata, anak ni Natan; ne si Natan, anak ni David; ³²ne si David, anak ni Isai; ne si Isai, anak ni Ubid; ne si Ubid, anak ni Buus; ne si Buus, anak ni Salmun; ne si Salmun, anak ni Nasun. ³³Ne si Nasun, anak ni Eminadab; ne si Eminadab, anak ni Admin; ne si Admin, anak ni Arni; ne si Arni, anak ni Isrum; ne si Isrum, anak ni Piris; ne si Piris, anak ni Huda; ³⁴ne si Huda, ne anak ni Hakub; ne si Hakub, anak ni Isaak; ne si Isaak, anak ni Abraham; ne si Abraham, anak ni Tari; ne si Tari, anak ni Nakur. ³⁵Ne si Nakur, anak ni Siruk; ne si Siruk, anak ni Ragaw; ne si Ragaw, anak ni Pilig; ne si Pilig, anak ni Ibir; ne si Ibir, anak ni Sile; ³⁶ne si Sile, anak ni Keynan; ne si Keynan, anak ni Erpaksad; ne si Erpaksad, anak ni Sim; ne si Sim, anak ni Noe; ne si Noe, anak ni Lamik; ³⁷Ne si Lamik, anak ni Metusalin; ne si Metusalin, anak ni Inuk; ne si Inuk, anak ni Harid; ne si Harid, anak ni Meheleliyil; ne si Meheleliyil, anak ni Keynan; ³⁸ne si Keynan, anak ni Inus; ne si Inus, anak ni Sit; ne si Sit, anak ni Adan; ne si Adan, ne anak te Megbevayà.

Is Kebpenulaya ki Jesus

(Lucas 4:1-13; Mateo 4:1-11; Marcos 1:12,13)

4 ¹Ne hein nebewtismuwan en si Jesus, mid-awà sikandin dutun te wahig he Hurdan. Nepurung sikandin meulini te Wagas he Mulin-ulin ne mid-uwit sikandin te Wagas he Mulin-ulin pehendiyà te tanà he wazà duen ed-ubpà he etew.

²Ne zutun, seled te kepatan he andew, migezaman si Jesus ni Setanas ke ebpekesalè be. Ne te zutun he menge andew wazà minsan hengkey he nekaan ni Jesus, ne zutun te ikekepatan en he andew utew nevitil si Jesus. ³Ne migkegiyan sikandin ni Setanas te, “Emun tutuu iyan

he Anak ka te Megbevayà pengelinteuwi nu he mevaluy he egkeenen heini is minge watu.” ⁴Ne midtavak si Jesus te, “Duen insurat he Lalag te Megbevayà he edhenduen te, ‘Kenà iyan dà igkeuyag te menusiya is egkeenen.’”

⁵Ne zutun mid-uwit si Jesus ni Setanas diyà te utew metikang ne te sengeperè dà dutun impeehè din is langun he ginhedian dini te kelibutan.

⁶Ne migkagi si Setanas te, “Is kebayàbayà kayi te langun he minge ginhedian wey is langun kayi he ketigeyunan, ibegey ku kenikew. Impeveyveyaan kediey heini is langun ne egkehimu he ibegey ku zaan diyà te minsan hentei he egkesuatan ku. ⁷Langun kayi ne ibegey ku kenikew emun ed-azap ka kedi.”

⁸Ne zutun midtavak si Jesus te, “Duen insurat he Lalag te Megbevayà he edhenduen te, ‘Iyan niw zà ezapa is Nengazen he Megbevayè niw. Ne is duma pa he ngazan he megbevayà, kenè niw tumana is sugù din.’”

⁹Ne zutun mid-uwit si Jesus ni Setanas diyà te inged he Hiruselim. Ne miduma zin diyà te utew metikang he limbuvungan te valey he egngезanan te Valey te Megbevayà. Ne migkegiyan din te, “Emun tutuu iyan he Anak ka te Megbevayà, umpak ka ¹⁰su zuen insurat he Lalag te Megbevayà he edhenduen te, ‘Ebpetevangan ka te Megbevayà te minge velinsuguen din ¹¹ne edtemukan ke zan su wey kenà egkerudruzan is minsan paa nu te watu.’”

¹²Ne midtavak kandin si Jesus te, “Duen daan insurat he Lalag te Megbevayà he edhenduen te, ‘Kenè kew mebaal te paagi he igezam niw te gehem te Nengazen he iyan Megbevayè niw.’” ¹³Ne hein netuenan ni Setanas he kenè din bes egkepenulayan si Jesus, ne mid-ewaan din dè pa.

Is Kebpuun ni Jesus te Kebpenurù

(Lucas 4:14,15; Mateo 4:12-17; Marcos 1:14,15)

¹⁴Ne zutun mid-ulì si Jesus diyà te prubinsya he Geliliya ne zekelà diyà te kandin is gehem te Wagas he Mulin-ulin. Ne segugunà nekeeneb diyà te langun he minge inged dutun is tudtul mehitenged ki Jesus. ¹⁵Ne nenurù sikandin diyà te minge simbahan te minge Hudiyu zutun te minge inged ne nemekezalig kandin is langun he minge etew.

Si Jesus Diyà te Nesorit

(Lucas 4:16-30; Mateo 13:53-58; Marcos 6:1-6)

¹⁶Ne zutun midhendiyà si Jesus te Nesorit, sikan is inged he zutun en sikandin medekelà. Ne zutun te andew he Sebadu he iyan Andew te Kedhimeley midseled si Jesus te simbahan su iyan betasan din. Ne midhitindeg su ebesahan din is insurat he Lalag te Megbevayà. ¹⁷Ne induwal zan kandin is belesahan he minge surat ni Esaias, sikan is

ebpeneuven dengan te Megbevayà. Mibekar zin haazà ne neehè din ne mibasa zin is insurat he edhenduen te,

18 “Mid-ulinan a te Wagas he Mulin-ulin he ebpuun te Megbevayà.

Ne mibpilì a te Nengazen su wey ku ikepesavut te minge

egkengeayuayu is Meupiya he Tudtulanen.

Ne mibpeveyaan din kedì

is minge etew wey ku sikandan metudtuli

he egkengevelukasan is nengevihag ni Setanas,

ne egkengeulian is nengelakap

wey zan mekehà ne egketevangan

is egkengeregenan.

19 Midsugù e zin daan wey ku metudtul

he iyan heini tuig he ibpeehè din

is gagew zin te menusiya.”

20 Ne zutun midlulun ni Jesus haazà is belesahan ne induwal zin diyà te miduwal kandin ne mibpinuu su ebpenurù. Ne is langun he minge etew zutun, midtengtengan dan sikandin su ebpemineg dan. 21 Ne ke sikandin te, “Heini is netagnà he insurat he Lalag te Megbevayà he mibasa ku, ne netuman en guntaan dini te etuvangan niw.” 22 Ne haazà is minge etew he nevrurun dutun, nevenaran sikandan te minge penurù din, iyan, utew zan nengeinuinu su utew sikandin metau he edseysey. Ne ke sikandan te, “Kenè be anak heeyan ni Jose?” 23 Ne migkagi si Jesus te, “Siguradu ebpekekagi kedì is duma keniyu te erubasa he edhenduen te, ‘Sikew is mememawì, hunai nu vewii is kenikew he lawa, *he ke và dà egkegiya, emun tutuu ka he ebpeneuven te Megbevayà ne ipeehè nu is gehem nu zini te inged nu. Su nezineg dey is egkengein-inuwan he mibeelan nu ziyà te inged he Kepirnaum, ne beeli nu zaan kayi te keugelingen nu he inged.*’ 24 Iyan,” ke si Jesus, “utew venar is egkegiyen he is ebpeneuven te Megbevayà, kenà sikandin ebpeminegen te minge etew ziyà te keugelingen din he inged. 25 Tutuu heini is egkegiyen ku he iring heini is ulaula niw guntaan te timpu zengan hein kaazen pa ni Elias he ebpeneuven te Megbevayà; wazà ipeuzan te Megbevayà dini seled te tetelu he tuig wey heenem he vulan, ne nesugat te zekelà he vivil is langun he minge inged dini te kenitew. Ne mezakel is minge zuma tew he Hudiyu he minge valu he vahi he nengeregenan dutun te vivil. 26 Iyan, wazà minsan sevaha kandan he mibpeveyaan ki Elias te Megbevayà wey zin metevangi, kekenà, nasì sikandin sugua te Megbevayà diyà te inged he Scripta ziyà te prubinsya he Sidun wey zin metevangi is balu he vahi zutun he kenà Hudiyu. 27 Ne iring din ded daan is sevaha he neulaula. Dengan te kaazen daan ni Elisio te sevaha zuen te ebpemeneuven te Megbevayà, mezakel is minge Hudiyu he ebpen-it-iten. Ne wazà Hudiyu he mibewian ni Elisio, kekenà, iyan is etew he kenà Hudiyu he si Naaman he tigSiryà,” ke si Jesus. 28 Ne

is menge etew zutun te simbahan, hein nezineg dan haazà is migkagi ni Jesus ne utew zan nengepauk. ²⁹Nemenhitindeg dan ne migewezan dan si Jesus ne mid-uwit dan pehendiyà te pangpang dutun te puntur te vuvungan he zutun benguna haazà is inged dan su ed-ulugen dan pezem dutun si Jesus te pangpang. ³⁰Iyan, nenelektelek dà si Jesus diyà te kandan ne mid-awà sikandin dutun.

Is Etew he Midsuukan te Mezaat he Mulin-ulin

(Lucas 4:31-37; Marcos 1:21-28)

³¹Ne midlaus si Jesus pehendiyà te Kepirnaum he inged he sakup te Geliliya. Ne zutun te Andew te Kedhimeley mibpenurù din is menge etew ziyà te simbahan. ³²Ne is menge etew, hein nezineg dan haazà is kebpenurù din, utew zan nengeinuinu su zekelà is gehem ni Jesus te kebpenurù. ³³Ne te kemulu pa ebpenurù si Jesus, duen maama zutun te simbahan he edlelungen te mezaat he mulin-ulin. Ne hein neehè din si Jesus, mibensag sikandin is egkagi te, ³⁴“Sikew, Jesus he tigNeserit, hengkey is lavet nu kenami te menge mezaat he mulin-ulin? Kela ke iyan inhendini nu is edezeetan key kenikew. Egkekilala ku sikew; iyan ka sikan is hadi he mibpili te Megbevayà!” ³⁵Ne zutun midawey ni Jesus haazà is mezaat he mulin-ulin ne ke sikandin te, “Med-engked ka ne awè ka ziyàn te kandin!” Ne zutun mibpengelinteuwan duen te mezaat he mulin-ulin he mekebadas diyà te tanà dutun te etuvangan te langun he menge etew haazà is edlelungen din. Ne mid-awà sikandin ne wazè din mekeizi haazà is etew he midlalung din. ³⁶Ne utew nengeinuinu is langun he menge etew zutun ne neked-iinseey zan is egkagi te, “Hendei ebpuun heini is gehem ni Jesus te kebakabayà? Su utew mekegegehem is kedsugua zin te menge mezaat he mulin-ulin he med-awè dan ne ebpeming dan kandin!” ³⁷Ne zutun pinaagi kayi nekeeneb haazà is bentugan ni Jesus diyà te langun he menge inged he uvey zutun.

Is Kebewii te Menge Etew

(Lucas 4:38-41; Mateo 8:14-17; Marcos 1:29-34)

³⁸Ne te ked-awà ni Jesus dutun te simbahan, midhendiyà te valey ni Simon. Ne egkezeruwan dutun is enugang he vahi ni Simon ne utew meinit is lawa zin. Ne midhangyù dan ki Jesus he vewii zin haazà is bahi. ³⁹Ne mid-uvayan ni Jesus haazà, ne mibpengelinteuwan din he maawà haazà is dateng din. Ne zutundutun neulian haazà is bahi. Ne zutun mid-ew ne midsuba sikandin te ibpekaan din engki Jesus.

⁴⁰Ne hein edsanlep en is andew, is langun he menge etew he zuen дума zan he egkezeruwan, mibpen-uwit dan diyà te ki Jesus haazà is egkengezeruwan. Ne edempaan dà ni Jesus is kada egkezeruwan dutun ne egkeulian en. ⁴¹Ne minsan sikan is menge mezaat he mulin-ulin,

impemaawè din dutun te minge etew he edlelungen dan. Nemekekulahì haazà is minge mezaat he mulin-ulin he egkagi te, “Iyan ka iyan sikan is Anak te Megbevayà!” Iyan, impeengked sikandan ni Jesus su wazè din itugut he zuen egkegiyen dan su netuenan dan he iyan sikandin kes mibpili te Megbevayà he hadi.

Is Kebpenurù ni Jesus Diyà te Minge Simbahan

(Lucas 4:42-44; Marcos 1:35-39)

⁴²Ne hein egkepkepawè en mid-awà si Jesus dutun te inged ne midsiveysivey zutun te wazè din duma he etew. Iyan, mibpemengahà sikandin te minge etew, ne hein neturedu zan, midhangyù dan kandin he kenè pa sikandin med-awà dutun te inged dan. ⁴³Iyan, migkegiyan din sikandan te, “Is Meupiya he Tudtulanen te keagi te kedhadì te Megbevayà, kinahanglan he ibpenudtul ku ziyà te minge etew ziyà te minge zuma he inged su iyan heini insugua kediey te Megbevayà.” ⁴⁴Ne zutun midlaus si Jesus ne midweliyan din is minge etew zutun te minge simbahan te minge Hudiyu ziyà te prubinsya he Hudiya.

Is Kedtewaga Zuen te Tetelu he Menlelaya

(Lucas 5:1-11; Mateo 4:18-22; Marcos 1:16-20)

5 ¹Sevaha he andew te ziyà si Jesus te veyvey te ranew he egngезanan te Giniserit, utew mezakel he minge etew is nengetipun su ebpememineg dan te Lalag te Megbevayà he ibpenurù din. ²Ne naahà ni Jesus is dezuwa he avang diyà te veyvey he wazà dutun mid-untud su midrenà dutun is minge tegigaked su edlumpiyuwan dan is minge laya zan. ³Ne mid-untud si Jesus dutun te sevaha he avang he gaked ni Simon ne impehalin din ki Simon haazà is avang te malù ebpekeziyù dutun te veyvey. Ne mibpinuu si Jesus dutun te avang ne mibpenurù din is utew mezakel he minge etew.

⁴Ne hein nekepasad si Jesus is ebpenurù, migkegiyan din si Simon te, “Begsaya niw heini is avang pehendutun te mezalem ne penlaya kew zutun ne ebpekeutel kew te minge pait.” ⁵Ne midtavak si Simon te, “Tivuuk he kezukileman is kebpenlaya zey ne wazè dey neutel he minsan sevaha, iyan, emun iyan heeyan lalag nu ne ed-uman key ebpenlaya.” ⁶Ne zutun mibpenlaya zan en maan ne hein mibuwat dan haazà is laya ne nevenbenaran sikandan te utew mezakel he minge pait he neutel su samè dà kenà mevindas haazà is laya te kegkepenù din. ⁷Ne migkapey zan is minge zuma zan dutun te sevaha he avang wey zan mekeugup. Ne hein nekeuma haazà is minge zuma zan, impen-ahuk dan is pait dutun te zezuwa he avang ne samè dà kenà melavu haazà is minge avang tenged te utew nepenù. ⁸Ne si Simon Pedro, hein neehè din is neulaula, nekeluhud diyà te ki Jesus is egkagi te, “Datù, deyzey ke ebpekeziyuan

a kenikew su utew a mekesesalà.”⁹ Iyan ingkekegiya zin kayi su utew neherat is mata zin te nengeutel zan he pait. Ne henduen ded daan haazà is menge zuma zan.¹⁰ Elin daan nengeinuinu zutun is menge anak ni Sibidiyu he si Santiago wey si Juan he menge zuma ni Simon te ebpenlaya. Ne migkagi si Jesus diyà te ki Simon te, “Kenè ka mahandek. Menlelaya ka te pait, iyan, puun guntaan iyan ku ibpeveelan kenikew is kebpen-ahà te etew wey mehimu he menge sumusundan ku.”¹¹ Ne zutun mid-uwit dan haazà is menge avang dan diyà te geunan, ne mid-ewaan dan dutun is langun ne midsundan dan ki Jesus.

Is Kebewii te It-iten

(Lucas 5:12-16; Mateo 8:1-4; Marcos 1:40-45)

¹²Ne sevaha he andew ne ziyà si Jesus te sevaha he inged ne neuma zin is etew he nepurung en meeneb te menge it-it. Haazà is it-iten, hein neehè din si Jesus, mid-uevey ziyà te kandin ne midluhud ne midungul diyà te etuvangan din is egkagi te, “Datù, emun meupiya zà te gehinawa nu ne egkeulian a kenikew kayi te utew meremerik he egezamen ku.”¹³Ne zutun midampà sikandin ni Jesus te egkagi te, “Uteu meupiya te gehinawa ku; meulii ka!” Ne segugunà nehanewhanew zutun te etew haazà is it-it din.¹⁴Ne zutun mibeleuzan sikandin ni Jesus te, “Kenè nu heini zè pa tudtula ziyà te minsan hentei he etew, kekenà, hendiyè ka guntaan te memumuhat he midhimu te Megbevayà wey zin maahà he neulian ka. Ne ivegey nu kandin is ibpemuhat wey nu metuman sikan is insugù dengan ni Moises su wey metueni te langun, he tutuu iyan he neulian ke en.”¹⁵Iyan, minsan pa zutun, nekeeneb diyà te meziyù is bentugan ni Jesus ne tenged dutun utew mezakel he menge etew is ebpemenhendutun te kandin wey zan mezineg is kebpenurù din ne wey zaan meulii sikandan te menge zaru zan.¹⁶Iyan, duen menge timpu he ed-ewaan din haazà is mezakel he menge etew ne edhendiyà sikandin te tanà he wazà dutun дума zin he etew ne zutun ed-ampù diyà te Megbevayà.

Is Kebewii te Mibinting he Eteu

(Lucas 5:17-26; Mateo 9:1-8; Marcos 2:2-12)

¹⁷Sevaha he andew he ebpenurù si Jesus, duen ebpemimpinuu he mezakel he menge Perisiyu wey menge menunudlù te kesuguan he midtelavuk dutun. Diyà haazà ebpemuun te langun he menge inged he sakup te Geliliya wey sakup te Hudiya. Ne zuen daan дума zan dutun he ebpemuun te Hiruselim. Ne zutun te ki Jesus is gehem te Megbevayà su wey zin mevewii is menge etew.¹⁸Ne zutun nekeuma is menge etew he ed-uwit te etew he minatey is divaluy he lawa zin he impehizegà te zuyanà. Idseled dan pezem dutun te valey su wey zan ikesavuk diyà te

etuvangan ni Jesus. ¹⁹Ne geina te nepurung mehasek is minge etew zutun te valey ne wazè dan ikevayà sikandin dutun. Diyè dan mebayà te atep ne mibudsiyan dan is atep he renged ni Jesus ne haazà is duyanà he zutun is etew he minatey is divaluy he lawa zin, midteyuntun dan dutun te teliwazà te minge etew he zutun si Jesus. ²⁰Ne hein nesavut ni Jesus he zekelà is kedsarig dan kandin, migkegiyan din heini is etew te, “Mama, nepesaylu en is minge salè nu.” ²¹Ne zutun, is minge Perisiyu wey is minge menunudlù te kesuguan, neisip dan diyà te gehinawa zan is: “Hentei heini he etew is edsupak te Megbevayà? Megbevayà sikandin uvag su hentei is ebpekesaylu te minge salà, kekenà, iyan dà is Megbevayà.” ²²Ne nesavut ni Jesus is diyà te isip dan ne migkegiyan din sikandan te, “Maan is egkeisip niw is iring kenian? ²³Hendei zapit is egkehimu te etew zà duen, iyan be is kebpesaylu te salà kayi te etew wey ke iyan is kegkeulii kayi te etew su wey mekeenew ne mekehipanew? ²⁴Pinaagi te kebewii ku guntaan kayi te etew, ibpeehè ku keniyu he siak is Kakey te Menusiyà, duen ku kegehemi dini te lumpad te kebpesaylu te salà.” Ne zutun migkegiyan din haazà is etew he minatey is divaluy he lawa, ke sikandin te, “Sikew, Mama, enew ka, ne kuwaa nu heeyan is duyanè nu ne uli ka!” ²⁵Ne zutundutun mid-enuw haazà is etew zutun te etuvangan dan te langun ne migkuwa zin haazà is impehizegaan kandin ne mid-uli is edalig te Megbevayà. ²⁶Ne is langun he minge etew zutun ne nengeherat is mata zan, ne utew zan nengeinuinu ne midalig dan is Megbevayà, ne ke sikandan te, “Heini is neehè tew guntaan, ne utew egkein-inuwi!”

Is Kedtewaga ki Levi

(*Lucas 5:27-32; Mateo 9:9-13; Marcos 2:13-17*)

²⁷Ne hein neipus haazà, ne mid-awà dutun si Jesus ne neehè din is sevaha he menunukut te vuhis he eggezanan ki Levi he ebpimpinuu ziyà te upisina zin. Ne migkegiyan ni Jesus te, “Mama, sunud ka kedì.” ²⁸Ne zutun ne mid-ewaan ni Levi is minsan hengkey zutun ne midsunud ki Jesus.

²⁹Ne zutun midtukud te zekelà he keemuran si Levi ziyà te valey zin su zutun si Jesus. Ne mezakel is nemenelavuk dutun he minge menunukut te vuhis he minge zuma ni Levi, ne zuen daan minge zuma he minge etew he nemengaan duma kandan. ³⁰Ne zuen minge Perisiyu wey minge menunudlù te kesuguan he nekeahà kayi te minge etew. Ne migkegiyan dan is minge sumusundan ni Jesus te, “Maan is egkaan kew wey ed-inum kew zuma te minge limbungan he menunukut te vuhis wey te minge mesinupaken?” ³¹Ne iyan midtavak dutun si Jesus, ke sikandin te, “Sikan is wazè din daru, ne kenà egkinahanglan he ebewian, kekenà, iyan dà is duen din daru. ³²Siak, wazà a medhendini wey ku ikepeiniyug te ked-

ulaula te mezaat is minge metazeng, kekenà, iyan is mesinupaken te Megbevayà.”

Is Insà Mehitenged te Kedsalang Kegkaan
(*Lucas 5:33-39; Mateo 9:14-17; Marcos 2:18-22*)

³³Ne zuen minge etew he migkagi ziyà te ki Jesus te, “Is minge sumusundan ni Juan Megbebewtismu wey is minge sumusundan te minge Perisiyu, ne layun dan ed-ampù wey edsalang dan he egkaan *su wey zan mepurungi is ked-azap dan te Megbevayà. Iyan, is kenikew he minge sumusundan, kenè dan mulà edsalang he egkaan, kekenà, kada andew egkaan dan wey ed-inum dan.*” ³⁴Ne migkagi si Jesus diyà te kandan te, “Penenglitan, ke zuen eseweey, is minge zuma te ebpengesawa, kenà egkehimu he ibpesalang sikandan te kegkaan ke kemulu zan pa zuma haazà is ebpengesawa. ³⁵Ne zutun te timpu he ibpaawà diyà te kandan sikan is ebpengesawa, human dan edsalang egkaan, su egkeseeng dan.”

³⁶Ne zutun insempità ni Jesus is kenà kebpeked-amur te vegu he penurù din wey te zaan he tuluuwen te minge Hudiyu, ke sikandin te, “Wazà etew he ebindas te vegu pa he kumbalà su idapi zin te kumbalà he tugak en. Su emun ebeelan din is iring kayi, ne nezezeetan din dà is begu, ne haazà is daan he kumbalà, kenà ed-engayan te vegu he indapi zutun. ³⁷Ne iring din ded daan,” ke si Jesus, “is binu he sikan pa ebeeli he idtagù diyà te teleguey he lundis te kambing. Kenà egkehimu he ziyà idtagù te zaan he teleguey su ebetu is teleguey ne egkeulaan haazà is binu ne egkezeetan daan is teleguey. ³⁸Kinahanglan he sikan is binu he sikan pa ebeeli, diyà idtagù te vegu en he teleguey. ³⁹Ne sikan is etew he nekeinum te zaan he vinu, kenè en sikandin ed-inum duen te vinu he sikan pa ebeeli su ke sikandin te, ‘Iyan meupiya is daan he vinu.’ ”

Is Ebayàbayà te Andew te Kedhimeley
(*Lucas 6:1-5; Mateo 12:1-8; Marcos 2:23-28*)

6 ¹Ne zutun te sevaha he andew he Sebadu, ingkevayà eni Jesus is pemuleey. Ne mibpengetu haazà is minge sumusundan din te minge trigu ne mibpengusu zan haazà ne mibpangaan dan is minge vegas dutun. ²Ne zutun duen minge Perisiyu he migkagi te, “Maan is edsupaken niw is insugù kenitew te Megbevayà he wazà ibpevaal emun Andew te Kedhimeley?” ³Ne midtavak si Jesus te, “Kenà egkehimu he wazè niw mevasa ziyà te ingkesurat dengan kes mid-ulaula ni Hadi David. Sikandin wey is minge sundaru zin ne nengevitil sikandan. ⁴Ne wazà sikandin mekesalà minsan midseled diyà te simbahan he Valey te Megbevayà ne migkaan din is egkeenen he insavuk diyà te etuvangan te Megbevayà ne impekaan din daan dutun is minge zuma zin. Supak

te kesuguan is kegkeena zan dutun su iyan dà ebpekekaan dutun he egkeenen is menge memumuhat.” ⁵Ne impelaus ni Jesus haazà is lalag din, ke sikandin te, “Siak is Kakey te Menusiyà, iyan a zuen kegehem te egkagi ke hengkey is hustu he ed-ul-ulahan te etew emun Andew te Kedhimeley.”

Is Kebewii te Minatey is Menge Ugat te Zivaluy he Velad Din

(Lucas 6:6-11; Mateo 12:9-14; Marcos 3:1-6)

⁶Ne sevaha pa zutun he andew he Sebadu, midseled si Jesus duen te simbahan te menge Hudiyu ne nenurù sikandin. Ne zuen dutun etew he minatey is menge ugat te kewanan he velad din. ⁷Ne zuen dutun menge etew he Perisiyu wey menge menunudlù te kesuguan. Ne mibentayan dan si Jesus su ed-ehaan dan ke ebewian din be haazà is etew zutun te andew su Andew te Kedhimeley. Iyan ibpurungi zan ibentayi ki Jesus su wey zan mekeahà te paagi te kedsumbunga zan kandin he midsupak din is Andew te Kedhimeley. ⁸Ne si Jesus, netuenan din ke hengkey is netagù diyà te isip dan ne migkegiyan din haazà is etew he nezeetan is belad din te, “Mama, hitindeg ka ne uvey ka zini.” Ne midhitindeg haazà is etew ne mid-uvey ziyà te ki Jesus. ⁹Ne migkagi si Jesus diyà te menge Perisiyu wey menge menunudlù, ke sikandin te, “Hengkey is isip niw? Hendei zapit is intugut kenitew zuen te kesuguan tew he ed-ul-ulahan tew kayi te Andew te Kedhimeley? Iyan be is kedtavang te etew he edlised wey ke ebpesipelahan be is etew? Iyan be is kedtavang te etew su wey kenà mebpatey wey ke edhimetayan be?” ¹⁰Ne mibpenlangulangu si Jesus dutun te langun he menge etew ne migkegiyan din haazà is etew he nezeetan is belad din te, “Ketenga nu, Mama, is belad nu.” Ne migketeng dutun te etew is belad din ne segugunà neulii. ¹¹Ne zutun, ne utew nengepauk haazà is menge Perisiyu wey haazà is menge menunudlù te kesuguan ne mibpelelelagè dan ke hengkey is ed-ul-ulahan dan ki Jesus.

Is Kebpilia ni Jesus Duen te Menge Epustul Zin

(Lucas 6:12-16; Mateo 10:1-4; Marcos 3:13-19)

¹²Ne sevaha he andew zutun midhendiyà si Jesus te vuvungan su ed-ampù diyà te Megbevayà. Ne mid-ampù sikandin dutun te tivuuk he kezukileman. ¹³Ne hein nepawà dutun ne miburun din is menge sumusundan din ne mibpilì din dutun is sepulù wey zezuwa ne migeraran din haazà he menge epustul. ¹⁴Is menge etew he nengepilì din dutun iyan ensi Simon he sikan is migeraran din ki Pedro, wey sikan is hazi ni Simon he si Andres, si Santiago wey si Juan, si Felipe wey si Bartolome, ¹⁵si Mateo wey si Tomas, si Santiago he anak ni Alpiyu wey sevaha he etew he egngезanan ded daan ki Simon he nevantug tenged te utew mezesen sikandin he edtuman te imbilinbilin he kesuguan, ¹⁶ne elin daan si

Hudas he anak te sevaha he etew he egngезanan daan ki Santiago wey is sevaha pa he egngезanan ki Hudas he tigKeriyuti. Heini he Hudas, iyan kes mid-akal ki Jesus.

Is Kebewii te Mezakel he Egkengezeruwan

(Lucas 6:17-19; Mateo 4:23-25)

¹⁷Ne hein neipus ni Jesus is kebpilia zin kandan midtupang sikandin duma haazà is nengepili din. Midteren dan dutun te patag ne nengevurun dutun is mezakel he menge sumusundan din wey is medmezakel he menge etew he ebpemuun diyà te menge inged he sakup te Hudiya wey ziyà te inged he Hiruselim. Ne zuen daan menge etew he ziyà ebpemuun te menge inged he Tiru wey Sidun he ziyà te veyvey te zagat. Iyan tuyù dutun te menge etew is ebpemineg dan te kebpenerùr ni Jesus wey ebpemewawì daan sikandan kandin te menge zaru zan. ¹⁸Ne mibewian din is langun he menge etew he ebpenlelungen te menge mezaat he mulin-ulin zutun ne nengeulian sikandan. ¹⁹Ne mezakel zutun te menge etew is egkesuat he egawed diyà te ki Jesus, su zuen gehem he ebpuun diyà te kandin ne pinaagi zutun egkengeulian is langun te sikandan.

Is Kegkezeyzey he Egkehuna Wey is Egkehuziyan he Kegkeseeng

(Lucas 6:20-26; Mateo 5:1-12)

²⁰Ne mibpenlangulangu si Jesus diyà te menge sumusundan din ne migkagi sikandin te, “Uteu kew zeyzey is menge ayuayu su iyan kew en edhedian te Megbevayà!

²¹Uteu kew zeyzey is egkengevitol guntaan su ebpekehentayen kew keuzemà te Megbevayà! Uteu kew zeyzey is egkengeseeng guntaan su egkengelihey kew keuzemà.

^{22,23}Uteu kew zeyzey emun egkuntedahan kew te menge etew ne kenè kew zan edewaten he zuma zan, ne ebpeel-elezan kew zan, ne egkegiyen kew zan he memezaat is ulaula niw tenged te midsundan kew kedì te Kakey te Menusiyà. Iyan heini kes mid-ulaula zengan te menge kepuun dan diyà te menge ebpeneuven te Megbevayà. Medlihey kew uteu emun egkehitalavù heini ziyen te keniye su uteu zekelà is suhul keniye te Megbevayà he ebpeebuten niw ziyà te langit.

²⁴Iyan, kehizu niw te menge sepian guntaan su emun egkehanew is menge ketigeyunan niw wazè en duma pa he igkelihey niw keuzemà.

²⁵Kehizu niw te layun egkengehantey guntaan su zuen timpu keuzemà he egkengevitol kew! Kehizu niw te egkengelihey guntaan su zuen timpu keuzemà he uteu kew egkengeseeng.

²⁶Kehizu niw te edtehuizen guntaan te langun he menge etew su iyan heeyan mid-ulaula zengan te menge kepuun dan diyà te menge kenà tutuu he ebpeneuven te Megbevayà. Umba edtehuizen kew te menge etew

su iring kew zutun te minge kenà tutuu he ebpeneuven ne edsilutan kew zaan te Megbevayà.

Is Ketudluanan Mehitenged te Kebpurungi te Zuma

(Lucas 6:27-36; Mateo 5:43-48; 7:12)

²⁷Iyan egkegiyen ku keniyu te minge sumusundan ku he ebpeming kediey guntaan is: kinahanglan he kenà mezaat is gehinawa niw ziyà te minge kuntada niw, kekenà, purungi niw is egkengeepes keniyu. ²⁸Penubtuvazi niw te meupiya is ebpenrawak keniyu. Iampù te Megbevayà is ebpesipala keniyu. ²⁹Emun duen etew he edtebpie din is enaping nu, ne kegiyi nu he egkehimu pa ke elin din edtebpie is divaluy. Ne emun duen etew he edluwasen din is kumbalè nu ne kegiyi nu te egkehimu pa ke elin din egkuwaan is kemising nu. ³⁰Emun duen ebuyù diyà te kenikew, ivegey nu ziyà te kandin is ebuyuen din, ne emun duen etew he ed-egawen din is minge azen nu ne kenè nu hewia. ³¹Is meupiya he egkesuatan nu he ed-ul-ulahan te zuma ziyà te kenikew, ne iyan nu ul-ulaha ziyà te kandan.

³²Kenè nu isipa he edsuhulan ka te Megbevayà emun iyan nu zà igkesuat is minge etew he igkesuat ke zan daan su minsan is minge mesinupaken he etew, ne igkesuat dan daan is minge etew he egkesuat kandan. ³³Ne ke iyan nu zà ebpurungan is minge etew he ebpurungan ke zan daan, kenè nu isipa he edsuhulan ka te Megbevayà su minsan is minge mesinupaken he etew, ne ebpurungan dan daan is ebpurung kandan. ³⁴Ne emun iyan nu zà ibpeutang is etew he netuenan nu he ebpekevayad te ibpeutang nu kandin, kenè nu isipa he edsuhulan ka te Megbevayà su minsan is minge mesinupaken he etew, ibpeutang dan is minge zuma zan he mesinupaken emun egketuenan dan he ebpekevayad dutun te ibpeutang. ³⁵Iyan penurù ku keniyu is: kenà imezaat te gehinawa niw is minge kuntada niw, kekenà, meupiya is ul-ulaha niw ziyà te kandan. Ke zuen etew he ed-utang keniyu, kenè niw itagù diyà te gehinawa niw he kinahanglan he beyazi kew zin. Emun edtumanen niw heini, igkepeehè niw he minge anak kew te utew lavew he Megbevayà. Ne utew zekelà is suhul zin keniyu su minsan is minge etew he memezaat is ulaula wey is minge kenà ebpeselamat kandin, egkehizuan din sikandan gihapun. ³⁶Iring te nehizu kenitew is Amey tew he Megbevayà, mehizu kew zaan te zuma niw.

Is Kedsawey

(Lucas 6:37-42; Mateo 7:1-5)

³⁷Kenè kew medsawey te zuma niw ne kenè kew zaan edsewayen te Megbevayà. Is duma niw he nekesalà, kenè niw kegiya he meupiya ke edsilutan su wey kenè kew mesiluti te Megbevayà. Mebmepeseyluwen

kew te zuma niw ne ebpeseyluwen kew te Megbevayà te minge salè niw. ³⁸Mebegey kew ziyà te minge zuma niw ne is Megbevayà, ebegayan kew zin daan. Is kezekelà te ibegey niw ne iyan daan kezekelà te ibegey keniyu te Megbevayà. Ne is ibegey zin keniyu, ne utew subra su henduen te utew edhesheseka wey utew ebpenpenua ne egkepeuluwan pa.”

³⁹Ne impezineg ni Jesus is sempità, ke sikandin te, “Is etew he lakap, kenà egkehimu he ed-agak te sengelelakap daan, su pudu zan is dezuwa, egkeulug diyà te vitu. ⁴⁰Is ebpenurù, kenè din isipa he lavew sikandin he edtehuzen kenà te ebpenurù kandin. Ne emun wazè en igkepenurù kandin te ebpenurù, human ebpekedreng sikandan is ebpenurù wey is ebpenurù.”

⁴¹Ne mid-uman megkagi si Jesus te, “Sikew is layun edsawey te zuma nu, maan is edsawey ka te salà te zuma nu he iring dà te pesek he nekeahuk te mata zin. Ne sikew, duen nu salà he iring kezekelà te vatang he nekevuta te mata nu ne ebpesegdanen nu? ⁴²Ne egkegiyan nu pa sikandin he id-awè nu haazà is nekepsek kandin, iyan, nepesek mulà is kenikew he mata te vatang he ebpesegdanen nu! Ute w tarù is ulaula nu! Ihuna nu iawà is batang he nekepsek kenikew ne human ka ebpekeahà. Ne zutun melemu nu zà igkeawà haazà is nekepsek te zuma nu.”

Is Begas te Pinemula

(Lucas 6:43-45; Mateo 7:16-20; 12:33-35)

⁴³Ne ke si Jesus en maan te, “Is kayu he wazè din erat, meupiya is begas din ne kenà ebpemegas te mezaat. Is kayu he zuen din erat, mezaat is begas din ne kenà ebpemegas te meupiya. ⁴⁴Egketuasan is kada kayu pinaagi te vegas din, su is banag ne kenà ebpemegas te paras ne is segà ne kenà ebegas te igira. ⁴⁵Ne iring din ded daan te etew,” ke si Jesus, “su emun meupiya is ulaula zin he etew, memeupiya zaan is nemeketagù diyà te gehinawa zin; meupiya zaan is kebpemèbè din. Iyan, ke mezaat is ulaula zin he etew, memezaat daan is nemeketagù diyà te gehinawa zin, ne mezaat daan is kebpemèbè din. Su is egketagù te gehinawa te etew, iyan daan egkekagi zin.”

Is Dezuwa he Mibevalley

(Lucas 6:46-49; Mateo 7:24-27)

⁴⁶Ne mid-uman megkagi si Jesus te, “Maan is egkegiyen niw he iyan a egalen niw, iyan, kenè niw edtumanen is minge sambag ku keniyu. ⁴⁷Is minsan hentei he sumusundan ku he nekezineg te minge sambag ku ne ebpezumdumahan din, egkegiyen ku keniyu he ⁴⁸iring sikandin te etew he ebevalley te melig-en diyà te zivavew te zekelà he vatu. Memezalem is bangbang din he mibpesekan din te tukud. Ne nepasad haazà is baley ne mibagyu ne midalem is wahig ne nesugat haazà is baley te meseleg

he wahig, iyan, wazà merundus su nevigera man. ⁴⁹Ne is etew he ebpezemidumahan, ne iring sikandin te etew he ebpevaley ziyà te pantad. Ne hein nepasad din haazà is baley zin ne mibagyu ne nesugat haazà is baley zin te utew meseleg he wahig ne nerundus haazà is baley he nepurung mewagey.”

Is Kebewii te Suluguen te Kepitan

(Lucas 7:1-10; Mateo 8:5-13)

7 ¹Ne hein nekeipus dutun si Jesus he ebpenurù te minge etew ne midhendiyà sikandin te inged he Kepirnaum. ²Ne zuen dutun etew he kenà Hudiyu he kepitan te nenggatus he sundaru he zuen din suluguen he maama he utew zin minahal. Ne heini is suluguen ne egketigbak is egkezeruwan su edluwàluwè en te gehinawa. ³Ne hein neventugan haazà is egalen din mehitenged ki Jesus, midsugù din is pira he vuuk te ebmegurangan te minge Hudiyu wey zan mehengyui si Jesus he medhendutun su wey zin mevewii haazà is suluguen dutun te kepitan. ⁴Ne mibeyaan dutun te minge ebmegurangan si Jesus ne midhangyù dan kandin, ke sikandan te, “Engayan he tevangi nu sikandin ⁵su sikitew is minge Hudiyu, ne mahal ziyà te gehinawa zin; mibpehitindeg sikandin te sevaha he simbahan tew.” ⁶Ne zutun miduma si Jesus kandan ne hein ebpeleinguma zan en dutun te valey te egalen te minge sundaru ne impesinugung din ensi Jesus te minge zuma zin wey zan mekagi ziyà te ki Jesus is lalag din he edhenduen te, “Datù, kenè nu en semuka is gehinawa nu te kedhendini te valey ku su kenà a zait he ebigatbigat kenikew he medhendini ke pa maan. ⁷Su utew zekelà is pid-etawan nu ne minsan is kedsinugung ku kenikew, ne kenà a zait. Utew ka mekegegehèm ne minsan ke egkagi ke zà te, ‘Meulii sikandin,’ ne egkeulian en is suluguen ku. ⁸Netuenan ku heini su iring te zuen ebayàbayà kedì ne zuen daan minge sundaru he ebeyveyaan ku. Ne edsuguen ku is sevaha he medhipanew ne edhipanew en. Ne edtewagen ku is sevaha pa he medhendini ne edhendini en. Ne edsuguen ku zaan is suluguen ku ke zuen ebpeveelan ku ne ebeelan din. Ne iring din ded daan diyàn te kenikew su is egkegiyen nu ne egkehimu en.” ⁹Ne te nezingeg ni Jesus heini, ne utew neinuinu. Ne midlingì ne migkagi ziyà te mezakel he minge etew he nemenduma kandin te, “Wazè ku pa meuma is etew he kevuwanan ni Israyil he iring kayi he utew mezesen is kedtuu zin!” ¹⁰Ne mid-ulì haazà is minge midsugù dutun te egalen te minge sundaru ne hein nekeuma zan diyà te valey, neulian en haazà is suluguen te kepitan.

Is Kebenhawa te Anak te Valu

¹¹Ne nepiraan pa maan dutun midhendiyà si Jesus te inged he enggezanan te Nain. Ne utew mezakel is minge etew he nemenduma

kandin ragkes te minge sumusundan din. ¹²Ne hein ebpekeuma zan en dutun te idselang dutun te inged ne nesinugung dan is minge etew he ebpuun dutun te inged he edlanting te minatey su idleveng dan. Maama haazà is minatey he iyan dà anak dutun te meritan he valu. Mezakel is minge etew zutun te inged he miduma zutun te vahi he eduma te edleveng. ¹³Ne is Nengazen he si Jesus, hein neehè din haazà is bahi he edsinegew ne midtavang is gehinawa zin ne migkegiyan din haazà is bahi te, “Ayà, kenè ka sinegew.” ¹⁴Ne mibeyaan din is edlentingen ne migwezàn din. Ne nemeketeren haazà is edlanting dutun te minatey ne migkegiyan ni Jesus haazà is edlentingen te, “Mama, enew ka!” ¹⁵Ne zutundutun mid-enuw haazà is minatey ne mibpekidlalag kandan. Ne migkegiyan ni Jesus haazà is iney zutun te nevanhew he kuwaa zin en haazà is anak din. ¹⁶Ne is langun he nemekeahà dutun, ne utew zan nengehandek ne nezalig dan is Megbevayà, ke sikandan te, “Heini en te kenitew is utew lavew he ebpeuven te Megbevayà!” Ne ke sikandan daan te, “Mibulus en is Megbevayà su wey kiw melibri is minge nengepili din he etew!” ¹⁷Ne haazà is tudtul te mid-ulaula ni Jesus, ne segugunà nekeeneb diyà te tivuuk he minge inged te prubinsya he Hudiya wey ziyà te zuma pa he minge inged he nekepegilid dutun.

Si Jesus Wey si Juan Megbebewtismu
(*Lucas 7:18-35; Mateo 11:2-19*)

¹⁸Ne hein nezing te minge sumusundan ni Juan Megbebewtismu is tudtul mehitedged kayi te langun, midtudtulan dan si Juan. ¹⁹Ne zutun midtawag ni Juan is dezuwa te minge sumusundan din ne midsugù din diyà te ki Jesus. Iyan insugua zin dutun su ibpeinsè din ke iyan en be iyan si Jesus sikan is netagnà dengan is kebpekeuma zin dini te kelibutan he impesavut ni Juan wey ke zuen pe be ebpeebuten he liyu ki Jesus. ²⁰Ne hein nekeuma zan diyà te ki Jesus migkagi zan te, “Iyan impekehendini zey te kenikew su midsugù key ni Juan Megbebewtismu su ibpeinsè din ke iyan ke en be iyan kes impesavut din he ibpehendini te Megbevayà wey ke zuen pe be ebpeebuten liyu kenikew?” ²¹Ne zutun he andew, mezakel is minge etew he nengeulian ni Jesus te minge zaru wey ebpenggezamen dan. Impemeguwe din dutun te minge etew is minge mezaat he mulin-ulin he ebpenlalung kandan ne midhimu zin he mekeahà is mezakel he minge lakap. ²²Ne migkegiyan ni Jesus haazà is minge sugù ni Juan te, “Likù kew en diyà te ki Juan ne tudtula niw ziyà te kandin is nengeehè niw he mid-ulaula ku wey ke hengkey is nezing niw he migkagi ku. Iyan niw tudtula kandin he tenged kedì ne ebpeemekeehè en is minge lakap ne ebpemekehipanew en is minge piang; nengeulian en is minge it-iten wey ebpemekezineg en is minge vengel. Mibanhew ku is nemematey wey impesavut ku ziyà te minge egkengeayuyay is Meupiya he Tudtulanen. ²³Utew zeyzey is etew he kenè eduwazuwa he iyan a sikan is midsugù te Megbevayà.”

²⁴Ne hein migenat en haazà is minge sugù ni Juan ne migkagi si Jesus diyà te mezakel he nengetigum he minge etew, ke sikandin te, “Hein midhilesung niw si Juan diyà te tanà he wazà duen ed-ubpà he etew, hengkey is inhilesunga niw kandin? Iyan be ed-ahaan niw is etew he iring te sagbet he egkewaleng te keramag? Kenà iyan haazà *su kenà egkehalinhalin is gehinawa ni Juan.*

²⁵Midhilesung niw ve is etew he utew meupiya is bisti zin? Kenà daan, su is minge etew he memeupiya is bisti wey utew meupiya is kebpekesavuk, ne ziyè dà egkeahà te turugan te hadi. ²⁶Ne hengkey is inhilesunga niw? Ed-ehè kew ve te etew he ebpeneuven te Megbevayà? Iyan haazà tutuu he ed-ahaan niw su ebpeneuven iyan si Juan. Iyan, kenà te ebpeneuven dà ²⁷su iyan daan si Juan sikan is kegketuman te netagnà he insurat he Lalag te Megbevayà su migkagi zutun is Megbevayà te, ‘Duen etew he edsuguen ku. Ibpehuna ku sikandin kenikew wey zin mehigewani is ibayè nu.’” Ne mid-uman megkagi si Jesus te, ²⁸“Tentenuzi niw he si Juan Megbebewtismu, wazà minsan hentei he etew te minsan keenu he timpu he nekelavew kandin, iyan, ke edhadì keuzemà is Megbevayà, is minsan hentei he etew zutun he edhedian te Megbevayà, minsan utew minus is pid-etawan din, lavew pa sikandin kenà si Juan guntaan.”

²⁹Ne hein nezineg heini is minge penurù ni Jesus te langun he minge etew zutun wey te minge mesinupaken he minge menunukut te vuhis, migkagi zan he utew hustu is minge ulaula te Megbevayà. Umba migkagi zan heini su iyan si Juan kes mibpemewtismu kandan. ³⁰Iyan, is minge Perisiyu wey is minge menunudlù te kesuguan te minge Hudiyu, wazè dan mulà pezumdumahi is egkesuatan te Megbevayà he ibpeulaula kandan ne wazè dan daan mebpebewtismu ki Juan.

³¹Ne mid-uman megkagi si Jesus te, “Sikiyu is minge etew guntaan, iyan ebpetug-iringan ku keniyu is minge vatà. ³²Su is minge vatà, ne ebpememimpinuu ziyà te tiyenggiyan is ebevaleyvaley. Ne ebpeum-umawà sikandan is egkagi te, ‘Edtemburan dey sikiyu ne kenè kew edsayew, ne edlelendag key ne kenè kew zaan edtampu.’” ³³Ne hein neehè niw si Juan Megbebewtismu, is edsalang egkaan, ne kenà daan ed-inum te vinu ne migkagi niw he midsuukan sikandin te mezaat he mulin-ulin. ³⁴Ne siak is Kakey te Menusiyà, wazà a medsalang megkaan ne mid-inum a mulà te vinu ne nengeinuinu kew ne migkagi niw he vuleguk a wey pereinum te vinu. Ne ke sikiyu te emigu a te minge lalung he etew iring te menunukut te vuhis wey minge mesinupaken. ³⁵Iyan,” ke si Jesus, “pinaagi te minge ulaula te minge etew he tutuu is kedsarig dan te Megbevayà egketuasan ta he utew metau sikandin.”

Hein Diyà si Jesus te Valey ni Simon he Perisiyu

³⁶Ne zuen dutun Perisiyu he mid-umbita zin si Jesus he ibpekaan diyà te valey zin. Ne midhendiyà si Jesus. Ne hein nekeuma en si Jesus

dutun, ne mibpinuu is egkaan. ³⁷Ne zutun he inged duen bahi he mezaat is dengeg din. Ne hein netuenan kayi te vahi he zutun egkaan si Jesus te valey te Perisiyu, midhendutun sikandin is ed-uwit te meputi he pelenahan he watu he elebastru he midteguan te mehemut he agwa he mahal utew. ³⁸Ne mid-uvayan din si Jesus ne midluhud diyà te uvey te paa zin ne mibpenigis is luhè din ne nengeulug diyà te paa ni Jesus. Ne mibpunasan din te vulvul zin ne midhezekan din. Ne zutun mibusbusan din haazà is paa ni Jesus duen te agwa he utew mehemut. ³⁹Ne naahà heini zutun te Perisiyu he mid-umbita ki Jesus, ne neisip din is, “Angin ke tutuu he ebpeneuven heini te Megbevayà ne kenà ebpekeeles kandin is meremerik he ulaula kayi te vahi ne wazè din pezem itugut he megewezi is lawa zin kayi te vahi.” ⁴⁰Ne zutun impezineg ni Jesus dutun te Perisiyu heini is lalag, ke sikandin te, “He Simon, duen egkegiyen ku kenikew.” Ne ke si Simon te, “Hengkey?” ⁴¹Ne ke si Jesus te, “Iyan heini is sempità. Dengan duen sevaha he etew he ebpeutang te selapì. Ne zuen dutun dezuwa he etew he nekeutang diyà te kandin. Is sevaha, ne lelima he gatus is neutang din ne is sevaha, ne kelimahan dà is kandin he neutang. ⁴²Ne hein kenà ebpekevayad haazà is dezuwa he utangan, ne migkagi haazà is neutangan dan he kenè dan en beyazi haazà is utang dan.” Ne mid-uman megkagi si Jesus te, “Hendei zapit dutun te zezuwa he etew he nekeutang is lavew he utew mahal diyà te gehinawa zin haazà is neutangan dan?” ⁴³Ne ke si Simon te, “Iyan buwa lavew he utew zekelà is gehinawa zin te etew he neutangan dan sikan is dekelà is utang din he wazè en peveyazi kandin.” Ne ke si Jesus te, “Benar, su iyan sikandin utew lavew he zekelà is gehinawa zin dutun te etew he neutangan dan.” ⁴⁴Ne midsinaru si Jesus dutun te vahi ne migkegiyan din si Simon te, “Sikan is sempità ku, ne iring kayi te vahi. Su mibpemenahik a zini te valey nu, iyan, minsan pa te iyan betasan tew is ebegey ki te ibpepenlùlù te paa te megeliyug ta ne wazà a kenikew vegayi. Ne heini is bahi mulà, midlùlùan din is menge paa ku te menge luhè din ne midterepuwan din te menge vulvul zin. ⁴⁵Ne minsan te iyan betasan tew te kegalewgalew is kedhezeki ta te megeliyug ta, ne wazà midhazek kedè te kebpekeuma ku. Ne heini is bahi, puun pa te kebpekeuma ku midtulungan din hezeki is menge paa ku. ⁴⁶Ne wazè nu zaan itisi is ulu ku te lana, iyan, heini is bahi, mahal he mehemut he agwa is imbusbus din dini te menge paa ku! ⁴⁷Umba migkagi ku heini kenikew su egketuusan ta kayi te vahi he mezakel is menge ulaula zin he mezaat he nengepesaylu en te Megbevayà su utew a mahal ziyà te gehinawa zin. Ne ke zuen etew he zeisek dà is menge ulaula zin he mezaat he nepesaylu te Megbevayà, wazè din utew gehinawa te Megbevayà.” ⁴⁸Ne zutun migkegiyan ni Jesus haazà is bahi te, “Bayi, nepesaylu en te Megbevayà is menge salè nu.” ⁴⁹Ne is menge etew zutun he egkaan duma ki Jesus, neisip dan is, “Hentei heini etawa

he minsan is minge salà, ne ebpeseyluwen din en?” ⁵⁰Ne mid-uman mekgagi si Jesus dutun te vahi, ke sikandin te, “Na, uli ke en, Bayi, ne mebmelinawen en is kebpekesavuk nu. Nelibri ke en te silut tenged te midsarig ka te Megbevayà.”

Is Menge Vahi he Mid-elima ki Jesus

8 ¹Nepipira pa zutun he andew ne mibeyaan ni Jesus is mezakel he minge inged, dekelà wey se zeisek, ne impesavut din te minge etew zutun is Meupiya he Tudtulanen mehitenged te kedhedii te Megbevayà te menusiya. Ne sikan is sepulù wey zezuwa he sumusundan din, miduma zan daan kandin. ²Ne zuen daan minge vahi zutun he eduzumazuma kandin. Ne heini he minge vahi, neulian din dengan te minge zaru wey is duma kandan ne mibpeguwaan din te minge mezaat he mulin-ulin he edlalung kandan. Is sevaha zutun te minge vahi ne si Maria Megdelina, sikan is mibpeguwaan ni Jesus te pitu he minge mezaat he mulin-ulin. ³Ne elin daan dutun te minge vahi si Juana he esawa ni Kusa. Si Kusa, ne sinerigan ni Hadì Hirudis. Ne zutun daan si Susana wey mezakel pa he minge zuma he vahi he nemenduma su midtevangan dan ensi Jesus pinaagi te minge ketigeyunan dan.

Is Sempità Mehitenged te Venì

(Lucas 8:4-8; Mateo 13:1-9; Marcos 4:1-9)

⁴Ne zutun he timpu layun duen minge etew he egkengetigum diyà te ki Jesus he ebpemuun diyà te langun he minge inged. Ne hein nengetigum is utew mezakel he minge etew impezineg kandan ni Jesus is sempità, ke sikandin te, ⁵“Duen etew he midhendiyà te pemuleey zin su ebpemula. Ne haazà is benì din, duen dutun nengeulug diyà te zalan ne nengegiekan te etew ne migkaan te minge tagbis. ⁶Ne zuen daan benì din he nengeulug he nemekeuntud diyà te menipis he tana he nekeapid te vatu ne midtuvù haazà, iyan, petuluy zà negangu su nemezahan haazà is tanà. ⁷Ne zuen daan dutun benì din he nengeulug diyà te tanà he minge zugiyen is minge sagbet dutun. Ne hein mibmelayat haazà is minge pinemula, mibmelayat daan haazà is minge sagbet ne mibpengulembezan dan haazà is pinemula. ⁸Ne zuen daan benì din he ziyà mingeulug te meupiya he tanà ne midtuvù ne mibpemegas mebpurung te tignenggatus.” Ne ke si Jesus te, “Sevuta niw heini is nezineg niw.”

Is Ketuyuan te Menge Sempità

(Lucas 8:9,10; Mateo 13:10-17; Marcos 4:10-12)

⁹Is minge sumusundan ni Jesus, in-insè dan ke hengkey is kehulugan dutun te sempità. ¹⁰Ne midtavak si Jesus te, “Sikan is in-eles dengan

mehitenged te kedhadì te Megbevayà, ibpesavut ku en keniyu te minge sumusundan ku, iyan, is minge zuma he minge etew he kenè dan edsundan kedì, ibpenurù ku kandan pinaagi te minge sempità su wey minsan edtengteng dan, kenè dan ebpekeahà ne minsan ebpemineg dan ne kenè dan ebpekesavut.”

Is Kehulugan Duen te Sempità Mehitenged te Veni

(Lucas 8:11-15; Mateo 13:18-23; Marcos 4:13-20)

¹¹Ne ke si Jesus te, “Ibpesavut ku keniyu is kehulugan kayi te sempità. Haazà is benì, ne iyan is Lalag te Megbevayà. ¹²Ne haazà is benì he ziyà mingeulug te zalan, ne iyan is Lalag te Megbevayà he nezing te minge etew ne zutun ebpekeuma si Setanas ne edhimuwen din he egkelipatan dan haazà is lalag he nezing dan su wey kenè dan meketuu ne kenà melibri te silut. ¹³Ne haazà is benì he ziyà mingeulug te menipis he tanà he zivavew te vatu, ne iyan is Lalag te Megbevayà he is nemekezing duen, ne utew zan egkesuati te ebpemineg ne edtuuwan dan. Iyan, kenà egkeheget is kedtuu zan ne kenè en utew egkeuget dutun emun egezaman ni Setanas is kedtuu zan, ne edlikù dan diyà te zaan he ulaula zan. ¹⁴Ne haazà is benì he ziyà mingeulug te tanà he zugiyen is minge sagbet dutun, ne iyan is Lalag te Megbevayà he nezing te minge etew, iyan, tenged te minge seeng dan wey is suat dan te selapì, wey is minge kelipey he kayi te kelibutan, egkelipatan dan is nezing dan ne kenà ebpulus diyà te kandan is Lalag te Megbevayà. ¹⁵Ne haazà is benì he ziyà mingeulug te meupiya he tanà, ne iyan egkegiyen dutun is Lalag te Megbevayà he nezing te minge etew ne midawat dan, ne midtuman dan haazà, ne mibpeniguduwan dan te edtuman taman te mibpulus te zekelà is Lalag te Megbevayà diyà te kandan.”

Is Sulù Diyà te Metikang he Selevukà

(Lucas 8:16-18; Marcos 4:21-25)

¹⁶Ne zuen pa sempità he migkagi ni Jesus, ke sikandin te, “Is etew he edtemtem te sulù, ne kenà egkehimu he ebpelengkevan din te revan wey ke idsihung din be te vangkù he hizegaan su idsavuk din diyà te selevukà. Ne emun duen etew he edseled ne egketeyawan.” ¹⁷Ne ke si Jesus maan te, “Ne iring din ded daan is minsan hengkey he in-eles guntaan su ibpegawagawa zed keuzemà, ne is minsan hengkey he penurù ku he kenè niw egkesavut guntaan, ne egkesavut niw zed keuzemà.

¹⁸Umba, purungi niw te ebpemineg is ibpenurù ku su is etew he edewaten din is ibpesavut kandin te Megbevayà, ed-umanan pa te Megbevayà is kedsavut din, iyan, is etew he kenè din edewaten is ibpesavut te Megbevayà, id-awà diyà te kandin haazà is kunaan din ke nesavut din en.”

Is Menge Mesipeg Diyà te ki Jesus

(*Lucas 8:19-21; Mateo 12:46-50; Marcos 3:31-35*)

¹⁹Is iney ni Jesus wey is menge hazi zin, ne edhendiyè dan te kandin, iyan, wazè dan meuvayi su nepurung en sikandin melingut te mezakel he etew. ²⁰Ne zuen etew zutun he midtazem ki Jesus, ke sikandin te, “Keniyà te gawas is iney nu wey is menge hazi nu ne ebpengahaan ke zan.” ²¹Ne migkagi si Jesus diyà te menge etew zutun te, “Duen ku pa iney wey menge hazi su is langun he ebpeminegen dan is Lalag te Megbevayà ne ebpezumdumahan dan, iyan daan sikandan iney ku wey menge suled ku.”

Is Kedewaya ni Jesus te Keramag

(*Lucas 8:22-25; Mateo 8:23-27; Marcos 4:35-41*)

²²Sengeandew zutun ne mid-untud si Jesus wey is menge sumusundan din te avang. Ne ke sikandin te, “Kuwa kew en su edlayun kiw ziyà layun.” Ne zutun migenat dan is ed-aavang. ²³Ne zutun te ked-aavang dan ne nekelipezeng si Jesus. Ne nesugat haazà is ranew te mevendes he keramag ne egketeguan en te wahig haazà is avang dan ne amaama zan kenà melavu. ²⁴Ne mid-uvayan dan si Jesus ne mibpukew zan, ke sikandan te, “He Zatù, egkengerè kiw en!” Ne nepukew zutun si Jesus ne mid-enew ne migkegiyan din haazà is keramag wey haazà is menge zekelà he vagel he mebpeeneng-eneng dan, ne zutun ne mibmelinew utew haazà is ranew. ²⁵Ne migkagi dutun si Jesus diyà te menge sumusundan din te, “Maan is wazè niw kedsarig kediey?” Ne utew zan nengeinuinu wey nengehandek. Ne zutun neked-iinseey sikandan te, “Hentei heini vuwa he etew? Maan is minsan keramag wey vagel ne ebpemineg te lalag din?”

Is Kebewii te Etew he Midsuukan te Menge Mezaat he Mulin-ulin

(*Lucas 8:26-39; Mateo 8:28-34; Marcos 5:1-20*)

²⁶Ne zutun midlaus dan is ed-aavang taman te nekezunggù dan diyà te tanà he iyan ed-ubpaan te menge etew he Geresinen he ziyà te zehipag te prubinsya he Geliliya. ²⁷⁻²⁹Ne zutun te kegaun ni Jesus neuma zin is etew he zaan he meginged dutun te inged te menge Geresinen. Ne midsuukan sikandin te menge mezaat he mulin-ulin. Ne haazà is etew, neuget en utew he wazè din seseberen. Kenà ed-ubpà diyà te valey, kekenà, diyà ed-ubpà te penlevengà he menge surung. Kenà kepipira zà uwita haazà is maama zutun te ebpemekaid kandin. Ne minsan pa te layun sikandin edhiketan ne ibpenagkes te kedina ne ebentayan pa te menge etew, iyan, melemu zin dà he ebpemidtaawen is kedina ne ed-uwiten sikandin dutun te mezaat he mulin-ulin pehendiyà te tanà he wazà ubpai te menge etew.

Ne hein neehè din si Jesus, mid-erang ne midlangkeb diyà te etuvangan din is egkagi he utew mezaging te, “Sikew, Jesus he Anak te utew lavew he Megbevayà, ebmenuwen a kenikew? Ebpengemuyù a kenikew he kenè e pa kenikew siluti!” Nekagi zin heini su migkegiyan ni Jesus haazà is mezaat he mulin-ulin he ibpaawà diyà te kandin. ³⁰Ne mid-insaan ni Jesus haazà is etew te, “Hentei is ngazan nu?” Ne midtavak te, “Iyan ngazan ku si Liblibuwen.” Umba nekagi zin heini su utew zan mezakel is mezaat he mulin-ulin he nemen-ulin dutun te etew. ³¹Ne haazà is menge mezaat he mulin-ulin, midhangyù dan ki Jesus he kenè din pa sikandan iagbur ziyà te vitu he wazà pidtemanan te kezalem din.

³²Ne zutun te kenà utew meziyù, duen layud he menge vavuy he ebpemenuwal ziyà te kelendigan. Ne midhangyù ki Jesus haazà is menge mezaat he mulin-ulin he zutun dan ipehalin te menge vavuy. Ne midtugutan sikandan ni Jesus. ³³Ne iyan dà haazà, ne mid-awè dan dutun te maama ne midhalin dan dutun te menge vavuy. Ne haazè dà ne nemelelaguy haazà is menge vavuy petupang dutun te utew mesilid he kelendigan ne mid-agbur zan diyà te ranew ne naamin dan mengelened.

³⁴Ne zuen menge maama he ebpemen-elima zutun te menge vavuy; ne hein neehè dan is nehitavù, ne henduen dan te midhiyup he vulvul is nemelaguy ne mibpenudtul zan diyà te inged wey ziyà te menge unayan is neulaula. ³⁵Ne is menge etew he nekezineg dutun te tudtul, ne nemenhendutun dan te ki Jesus su ed-ahaan dan. Ne neehè dan dutun kes neulian he ziyà mebpinuu te etuvangan ni Jesus he midsun-ud en te ugelingen, ne hustu en is ked-isip-isip din. Ne tenged dutun utew zan en nengeinuinu. ³⁶Ne sikan is menge etew he nekeahà ki Jesus te kebewii zin dutun te etew, ne mibpenudtulan dan is menge etew he sikan pa mekeuma ke nenumenu is kegkeulii zutun te etew he midlalung te menge mezaat he mulin-ulin. ³⁷Ne zutun, haazà is langun he menge etew he meginged dutun te tanà te menge Geresinen, ne midhangyù dan ki Jesus he med-awà sikandin dutun te kandan su utew zan ingkehandek sikandin. Ne iyan dà haazà, ne mid-untud ensi Jesus te avang su egenat dan. ³⁸Ne zutun, haazà is etew he vegu he neulian, midhangyù sikandin ki Jesus, ke sikandin te, “Egkesuat a he eduma kenikew.” Iyan, wazà ipezuma ni Jesus, kekenà, impeulì din. Ke si Jesus te, ³⁹“Ulì ke en ne tudtula nu ke hengkey is utew meupiya he midhimu te Megbevayà kenikew.” Ne zutun, mid-ulì haazà is maama ne mibpenudtul zin duen te langun he menge meginged dutun ke hengkey is midhimu ni Jesus diyà te kandin.

Is Minatey he Vatà Wey Sikan is Bahi he Zeruwanen
(*Lucas 8:40-56; Mateo 9:18-26; Marcos 5:21-43*)

⁴⁰Ne hein nekezunggù ensi Jesus dutun te ebpuunan dan ne utew nengegalew is utew mezakel he menge etew he nengetigum dutun su

edtagad dan kandin. ⁴¹Ne zutun duen maama he egngезanan ki Hayru he pengulu te sevaha he simbahan te mеnge Hudiyu. Ne mid-uvey heini ziyà te ki Jesus ne midluhud diyà te etuvangan din is edhangyù kandin he zumahi zin sikandin diyà te valey zin. ⁴²Su zuen budtung he anak din he ragaraga he mеnge sepulù pa wey zezuwa is penuigen din, ne egkezeruwan ne edluwàluwè en te gehinawa. Ne miduma kandin si Jesus. Ne zutun te kedhipanew zan ebpenelektelek dan dà su egkengelitlipit dan te utew mezakel he mеnge etew zutun. ⁴³Ne zuen dutun bahi he utew en nerasey su midsepulù en wey zezuwa he tuig is kedlengesahi kandin ne kenà ed-engked. Ne wazà minsan hentei he nekeulì kandin. ⁴⁴Ne mibpenlietliet medhendiyà te egkeiniyugan ni Jesus ne midsengkawad din kevita is sidsid te kumbalà ni Jesus. Ne zutundutun ne mid-engked is kegkevusbusi kandin. ⁴⁵Ne redsà dutun ne migkagi si Jesus te, “Hentei is migawed kedì?” Ne is mеnge etew zutun, pudu mibarew he wazè dan mekegawed. Ne migkagi si Pedro te, “Datù, maan is ebpenginginsè ke pa te iring kenyan, te hanu man mezakel utew he mеnge etew is edlilipitlipit diyan te kenikew.” ⁴⁶Iyan, migkagi si Jesus te, “Duen iyan migawed kedì su negezam ku he zuen etew he neulian te zaru pinaagi te gehem ku.” ⁴⁷Ne hein nesavut dutun te vahi he netuenan ni Jesus haazà is mid-ulaula zin, mid-uvey ziyà te ki Jesus is egkerkeren su utew nahandek. Midluhud sikandin diyà te ki Jesus, dutun te etuvangan te langun he mеnge etew. Ne midtudtul zin ke hengkey is ketezengan ke maan is migawed sikandin te kumbalà ni Jesus ne midtudtul zin daan he segugunà dutun neulii is daru zin. ⁴⁸Ne migkagi kandin si Jesus te, “Bayi, umba neulian ka te zaru nu su midsarig ka kedì. Ulì ke en ne mebmelinawen is kebpesavuk nu.”

⁴⁹Ne te kemulu pa si Jesus egkagi zutun ne zuen nekeuma he ebpuun diyà te valey ni Hayru. Ne migkagi diyà te ki Hayru te, “Kenè nu en bigbigata te eduma pa maan si Jesus su kenè niw en egkesepenan is gehinawa zuen te anak nu.” ⁵⁰Ne hein nezineg ni Jesus haazà ne migkagi sikandin te, “Kenè ka meseeng, kekenà, sarig ke zà kedì, ne egkeuyag is anak nu.” ⁵¹Ne hein nekeuma zan diyà te valey ni Hayru, ne wazà ipemeseled ni Jesus is mеnge etew. Iyan din dà dutun impeseled ensi Pedro, si Juan, si Santiago, wey is mеnge ginikanan dutun te vatà. ⁵²Ne zutun, is langun he mеnge etew he nerivurun dutun, egkengegisaweg sikandan ne ebpemeninegew su nengeseeng. Ne migkegiyan sikandan ni Jesus te, “Kenè niw sinegawi su wazà mebpatey heeyan is batà, kekenà, midlizepeng dà!” ⁵³Ne te kegkezinega zan dutun te migkagi ni Jesus, ne vа dan dà mid-engiti su netuenan dan he minatey en iyan haazà is batà. ⁵⁴Ne mid-uvayan ni Jesus haazà is batà ne migewezan din diyà te velad ne mid-umew zin he ke sikandin te, “Bayi, enew kad.” ⁵⁵Ne zutundutun nekesunggud is gehinawa zutun te vatà ne mid-enuw. Ne migkagi si Jesus

dutun te ginikanan te vatà he ipekaan dan haazà is anak dan. ⁵⁶Ne utew ingkeinuinu te ginikanan dutun te vatà haazà is midhimu ni Jesus. Ne migkegiyan sikandan ni Jesus he kenè dan tudtula haazà ziyà te minsan hentei.

Is Telaan ni Jesus Duen te Menge Sumusundan Din

(Lucas 9:1-6; Mateo 10:5-15; Marcos 6:7-13)

9 ¹Ne midtigum ni Jesus sikan is sepulù wey zezuwa he menge sumusundan din. Ne kada sevaha kandan, mibegayan din te gehem su wey zan mevewii is egkengezeruwan wey ikepemeuwè is menge mezaat he mulin-ulin. ²Ne zutun ne impehipanew zin sikandan su wey zan ikepesavut is Meupiya he Tudtulanen te keagi te kedhadi te Megbevayà ne wey zan daan mekepemawì te minsan hengkey he egezamen te etew. ³Ne midteleenan din sikandan he ke sikandin te, “Kenè kew uwit te menge azen niw te kedhipanew niw; minsan tuked, ne kenè niw uwita; kenè kew kekempilù, kenè kew lulutù, kenè kew uwit te selapì, ne minsan is ed-ilisan, ne kenè niw zaan uwita. ⁴Ke hendei is baley he zuen egalewgalew keniya ne zutun kew zà uliulì taman te kegenat niw. ⁵Ne emun duen inged he wazà dutun etew he egalewgalew keniya, ne ewai niw ne penektaka niw is menge eliyavuk diyà te menge paa niw he iyan laguy he edsilutan sikandan te Megbevayà.” ⁶Ne zutun migenat haazà is menge sumusundan ne mibpesusuwayè dan ne midtukid dan is menge inged te ebayà te ebpenudtul te Meupiya he Tudtulanen ne mibpemewian dan daan is egkengezeruwan diyà te kada inged.

Is Isip ni Hirudis Mehitenged ki Jesus

(Lucas 9:7-9; Mateo 14:1,2; Marcos 6:14-16)

⁷Ne heini is nengeulaula eni Jesus, nezineg ni Gubirnedur Hirudis diyà te prubinsya he Geliliya ne ingkesamuk te gehinawa zin su zuen egkagi he iyan si Jesus si Juan Megbebewtismu he nevanhew. ⁸Ne zuen daan egkagi he mibpeetew mebpeuman si Elias, kes ebpeneuven dengan te Megbevayà, ne iyan en si Jesus. Ne zuen daan egkagi he nevanhew is sevaha zuen te menge ebpeneuven dengan ne iyan si Jesus. ⁹Neisip ni Hirudis is: “Si Juan, ne mibpepungelan ku en te ulu, iyan, hentei etawa heini is egkegiyen dan?” Ne mibpen-ahà sikandin te paagi wey zin maahà si Jesus.

Is Kebpekeenà te Lelima he Libu he Menge Etew

(Lucas 9:10-17; Mateo 14:13-21; Marcos 6:30-44; Juan 6:1-14)

¹⁰Ne mid-uli sikan is sepulù wey zezuwa he epustul ni Jesus ne midtudtul zan kandin is langun he mid-ulaula zan. Ne zutun miduma zin sikandan he iyan dan dà pehendiyà te inged he Bitsayda. ¹¹Ne netueanan

te nerivurun he mezakel he minge etew he midhipanew ensi Jesus ne nemenelukun dan. Ne migalewgalew sikandan ni Jesus ne impesavut din kandan is mehitenged te kedhadì te Megbevayà ne mibpemewian din daan is minge etew zutun te minsan hengkey he ebpengezamen dan.

¹²Ne hein mahapun en mid-uvayan si Jesus te sepulù wey zezuwa he minge sumusundan din. Ke sikandan te, “Ipegenat nu en is minge etew wey zan mekehendiyà te minge unayan wey minge inged su wey zan mekepenahà te egkekaan dan wey egkehizegaan dan su wazà egkekuwa zan dini te wazà duen ed-ubpà he etew.” ¹³Iyan, midtavak si Jesus te, “Iyan kew mebegey te egkekaan dan.” Ne midtavak haazà is minge sumusundan din te, “Lelelima zà he vuuk he supas wey zezuwa he zezeisek he pait is naazen tew he egkeenen. Kela ke egkesuatan nu he edhipanew key te kebpemasa te ibpekaan tew kayi te utew mezakel he minge etew,” egkagi zan. ¹⁴Menge lelima he libu he minge maama is nengetigum dutun *ne zuen daan minge vahi wey vatà*. Ne migkagi si Jesus diyà te minge sumusundan din te, “Ipemepinuu niw sikandan he mebpundukpunduk he tigkelimahan is sengepunduk.” ¹⁵Ne zutun impemepinuu zan haazà is langun he minge etew. ¹⁶Ne migkuwa zutun ni Jesus haazà is lelima he supas wey haazà is dezuwa he pait ne midlingahà diyà te langit ne mibpeselematan din te Megbevayà. Ne mibpenevitevi din. *Ne minsan pa zutun kenà egkeamin haazà is edtevien din*. Ne imbegey zin diyà te minge sumusundan din haazà is nengetevi wey zan ikepemegey zutun te minge etew. ¹⁷Ne is kada sevaha zutun te minge etew, nekekaan ne nahantey. Ne haazà is egkeenen, ne nesemaan pa te sepulù wey zezuwa he vinevey is nehimes he minge tevi te supas te minge sumusundan din.

Is Migkagi ni Pedro Mehitenged ki Jesus

(Lucas 9:18-21; Mateo 16:13-20; Marcos 8:27-30)

¹⁸Sengeandew zutun ne ed-ampù si Jesus he sebsevaha zin diyà te Megbevayà ne is minge sumusundan din, diyè dan te uvey zin. Ne ke sikandin diyà te kandan te, “Hentei e kun sumalà te ked-isipa kediey te minge etew?” ¹⁹Ne midtavak dan te, “Iyan ke kun si Juan Megbebewtismu he nevanhew, ne zuen daan egkagi te iyan ka si Elias, ne zuen pa egkagi te sevaha ka zuen te minge tipehuna he ebpeneuven te Megbevayà.” ²⁰Ne migkagi si Jesus te, “Ne sikiyu zaan, hentei e man sumalà is ked-isipa niw kediey?” Ne midtavak si Pedro te, “Iyan ka sikan is mibpilì te Megbevayà he ibpahadì din te menusiyà.”

²¹Ne zutun mibpeketelteleanan sikandan ni Jesus he kenè dan tudtula haazà diyà te minsan hentei.

Is Kegkegiya ni Jesus te Kemetayen Din

(Lucas 9:22-27; Mateo 16:21-28; Marcos 8:31-9:1)

²²Ne ke sikandin daan te, “Siak is Kakey te Menusiyà, kinahanglan he mezakel is minge kemeresayan he ibpaantus kediey. Edsumpeliten

a te minge ebmegurangan te minge Huidiyu wey te minge punuan he memumuhat wey te minge menunudlù te kesuguan. Edhimetayan e zan ne seled te tetelu he andew zutun egkevanhew a.”

²³Ne mid-uman si Jesus mekgagi diyà te kandan te langun, ke sikandin te, “Ke zuen egkesuat he edsundan kedì ne kinahanglan he iawè din diyà te isip din is kandin he paagi ne tianga zin te kada andew is krus din, *he ke và dà egkegiya, kinahanglan he edtumanen din is minge sugù ku minsan pa ke iyan ibpatey zin. Ne human ebpekesunud kedì.* ²⁴Su ke zuen etew he egkenugunan din is untung din, ebpatey gihapun. Iyan, ke zuen etew he minsan ibpatey zin pa is kedsunud din kedì, id-uli te Megbevayà diyà te kandin is untung din ne kenè en sikandin ebpatey te wazà pidtemanan. ²⁵Minsan ke maangken pa te etew heini is tivuuk he kelibutan, wazà pulus diyà te kandin ke kenà sikandin egkevegayan te untung he wazà pidtemanan ne edsilutan pa sikandin. ²⁶Is minsan hentei he igkeeled e zin wey igkeeled din is ibpenurù ku, siak is Kakey te Menusiyà, igkeeled ku zaan sikandin keuzemà ke edlikù a he zekelà is gehem te ked-anlag ku wey edsun-uzan ad te mekegegehem he anlag te Amey ku he Megbevayà wey te anlag te minge velinsuguen te Megbevayà. ²⁷Tentenuzi niw heini,” ke si Jesus, “duen minge zuma tew kayi he kenà ebpatey taman te timpu he ibpaahà kandan te Megbevayà is kegehem din te kedhadì.”

Is Kegkahalin te Paras ni Jesus

(Lucas 9:28-36; Mateo 17:1-8; Marcos 9:2-8)

²⁸Ne minge sengesimana puun dutun te kekgagi kayi ni Jesus, miduma zin ensi Pedro, si Santiago, wey si Juan ne midtekezeg dan te vuvungan su wey mekeampù diyà te Megbevayà. ²⁹Ne zutun te ked-ampù ni Jesus, netik-ew mahalín is dagwey zin ne mibpengeramag te keputì is ugelingen din ne ebpekesirang te mata. ³⁰Ne netekewtekew mekepegawagawa is dezuwa he maama he ebpekidlalag kandin he iyan si Moises wey si Elias, kes minge tipehuna he ebpeneuven te Megbevayà. ³¹Midsun-uzan daan sikandan te mekegegehem he anlag, ne iyan imbitiyara zan ki Jesus is mehitenged te megaan din en kedhimuwa te sugù te Megbevayà su edhimetayan sikandin diyà te Hiruselim. ³²Ne si Pedro wey is minge zuma zin, ne nemekelipezeng dan ne hein nepukew zan neehè dan is mekegegehem he anlag ni Jesus wey haazà is dezuwa he maama he zuma ni Jesus. ³³Ne hein ed-awè en diyà te kandin haazà is dezuwa, migkagi si Pedro te, “Nengazen, utew meupiya te zini key. Ebeelan dey is tetelu he lawig; sevaha is kenikew, sevaha zaan is ki Moises, ne sevaha is ki Elias.” Wazà metentenuzi ni Pedro he nengekagi zin heini is lalag. ³⁴Ne zutun te kemulu pa egkagi si Pedro, neselikuvungan sikandan te gapun ne utew zan nengehandek is tetelu he sumusundan dutun te kegkeselikuvungi kandan te gapun. ³⁵Ne nezineg dan is midtik-ew mekgagi he ebpuun dutun te

gapun te, “Iyan heini Anak ku he mibpili ku he ibpahadì. Peminega niw is minge lalag din.” ³⁶Ne hein mid-engked haazà is egkagi ne iyan dà maan dutun si Jesus neehè dan. Ne puun dutun he timpu wazè pa minsan sevaha he etew he midtutulan dan te neehè dan.

Is Kedsegsega te Mevurut he Mezaat he Mulin-ulin
(*Lucas 9:37-43; Mateo 17:14-18; Marcos 9:14-27*)

³⁷Ne hein mid-ilis he andew, midtupang dan dutun te vuvungan ne utew mezakel he minge etew is nemenelavuk ki Jesus. ³⁸Ne zuen maama zutun he nengumew ki Jesus, ke sikandin te, “He Zatù, ahaa nu pa kedì heini is anak ku he maama. Sebsevaha heini he anak ku! ³⁹Ahaa nu su edlelungen te mezaat he mulin-ulin ne emun ebpekeume en is edlalung kandin ne ebpeketik-ew ebpekeurang ne egkerkeren ne eburvuraan is bèbè din ne edsiguduwan sikandin ed-eyuwa te edlalung kandin taman te egkevugel is lawa zin ne egkeuget sikandin ed-engkezi te mezaat he mulin-ulin. ⁴⁰Midhangyù a ziyà te minge sumusundan nu he vewii zan, iyan, wazè dan meulii.” ⁴¹Ne zutun migkagi si Jesus te, “Sikiyu is minge etew guntaan, utew zekelà is minge sayep niw; wazè niw iyan kedtuu te Megbevayà. Utew ves egkeuget is kebpekiduma ku keniyu! Utew ves egkeuget is kebpekeantus ku keniyu ne human kew edtuu. Ihengkayi nu heeyan is anak nu.” ⁴²Ne hein uvey en haazà is batà diyà te ki Jesus, ne neumahan en maan dutun te edlalung kandin ne nepiley sikandin ne migkerker te utew mezesen. Ne migkegiyan ni Jesus haazà is mezaat he mulin-ulin he ewai zin haazà is edlelungen din. Ne zutundutun neulian haazà is batà. Ne migkagi si Jesus dutun te amey te vatà te, “Kuwaa nu en heini is anak nu.” ⁴³Ne langun he minge etew zutun, ne utew nengeinuinu tenged dutun te nehimu ni Jesus pinaagi te zekelà he gehem te Megbevayà.

Is Ikezuwa he Kegkegiya ni Jesus te Kemetayen Din
(*Lucas 9:44,45; Mateo 17:22,23; Marcos 9:30-32*)

Ne zutun te kemulu pa egkeinuinu is minge etew zutun te langun he ed-ul-olahan ni Jesus, ne migkagi sikandin diyà te minge sumusundan din te, ⁴⁴“Kenè niw lipati heini is egkegiyan ku keniyu, duen timpu keuzemà he siak is Kakey te Menusiyà, ibpalad a ziyà te minge kuntada ku,” ke sikandin. ⁴⁵Ne is minge sumusundan din, wazè dan dutun mesavut is ibpesavut ni Jesus. Wazà ipesavut te Megbevayà kandan su wey kenè dan metueni. Ne wazè dan mekeaku he ed-insà kandin ke hengkey is kehulugan dutun.

Is Lavew Zuen te Menge Sumusundan
(*Lucas 9:46-48; Mateo 18:1-5; Marcos 9:33-37*)

⁴⁶Sevaha he andew zutun ebpelewewanà is minge sumusundan ke hentei is lavew kandan. ⁴⁷Ne netuenan ni Jesus ke hengkey is diyà te

isip dan, ne tenged dutun, migkuwa zin is batà ne impehitindeg din diyà te uvey zin ⁴⁸ne ke sikandin te, “Is etew he tenged te kedtuu zin kedì, edewaten din ne ebpurungan din heini is deisek he vatà, ne nezawat e zin en daan. Ne is minsan hentei he edawat kediey, nezawat din en daan is Amey ku he Megbevayà he midsugù kedì. Su is minsan hentei keniyu he ebpevayàbayà te minge zuma zin, iyan sikandin tutuu he lavew keniyu.”

Is Kenà Kuntada ni Jesus
(*Lucas 9:49,50; Marcos 9:38-40*)

⁴⁹Ne zutun migkagi si Juan te, “Duen etew he neuma zey he ebewian din is minge etew he edlelungen te mezaat he mulin-ulin ne egemiten din is gehem te ngazan nu te kebpemawì. Ne midawey zey su kenà ebpekiduma kenitew.” ⁵⁰Ne migkagi si Jesus diyà te kandin te, “Kenè niw zewaya is ed-ulaula te iring dutun su is etew he kenè tew kuntada, ne edtavang kenitew.”

Is Inged he Wazà Medawat ki Jesus

⁵¹Ne hein egkeuvayan en is andew te kebpeewaa ki Jesus dini te kelibutan su ed-ulì en diyà te langit ne netivuuk is gehinawa zin te kedhendiyà te Hiruselim ne zutun migenat dan. ⁵²Duen minge etew he impehuna ni Jesus ne migenat dan ne midhendiyè dan te inged diyà te prubinsya he Semarya su edtegenahan dan is egkinehenganen eni Jesus. ⁵³Iyan, is minge meginged dutun, wazè dan ikesuat he edtuluy si Jesus su netuenan dan he Hudiyu sikandin he ziyà ebpetandang te inged he Hiruselim. ⁵⁴Ne hein netuenan ni Santiago wey ni Juan he wazà edawat kandan dutun te inged, migkegiyan dan si Jesus te, “Egkesuatan nu ve he ebuyù key te hapuy he ebpuun te langit he ibpetanà dini su wey megerà heini he minge etew?” ⁵⁵Iyan, si Jesus, midsinaru ziyà te kandan ne midawey zin sikandan. ⁵⁶Ne midlaus dan diyà te zuma he inged.

Is Ebpemenduma Pezem ki Jesus
(*Lucas 9:57-62; Mateo 8:19-22*)

⁵⁷Ne zutun te kedhipanew zan, duen etew he migkagi ziyà te ki Jesus te, “Eduma a kenikew minsan hendei ka ebpevayà.” ⁵⁸Ne migkagi si Jesus diyà te kandin te, “Is laku, ne zuen surung he egkeubpaan din, ne is minge tagbis, ne zuen kandan he salag, iyan, siak, is migeraran te Kakey te Menusiyà, ne wazà hustu he egkehimelayan ku.” ⁵⁹Ne migkagi si Jesus diyà te sevaha he etew, ke sikandin te, “Sundan ka kedì.” Iyan, migkagi haazà is migkegiyan din te, “Datù, ed-ulì e zè pa su kenè e pa ebpekezuma kenikew taman te kenè pa egketapus is umur te amey ku. Ne emun igkeleveng ku en ne human a eduma kenikew.” ⁶⁰Ne midtavak si Jesus dutun te etew te, “Iyan nu ipeleveng te minge minatey sikan is

wazà mekezawat te untung he wazà pidtemanan su iyan ku ibpeveelan kenikew is kebpenudtul te Meupiya he Tudtulanen te kedhedii te Megbevayà te minge etew.” ⁶¹Ne zuen pa zutun sevaha he etew he egkagi zaan diyà te ki Jesus te, “Datù, edsundan a kenikew, iyan, ed-uli e pa su ibpesayud ku is bevelayan ku.” ⁶²Ne midtavak si Jesus te, “Emun ed-eradu ka he layun ka edlilingey ne kenà heeyan meupiya. Iring din ded daan is etew he edsundan kedì wey zuen din igkelilingey ne kenà sikandin dait he edhedian te Megbevayà.”

Is Kepituwan Wey Zezuwa he Midsugù ni Jesus

10 ¹Ne hein neipus heini, duen daan kepituwán wey zewuwa he minge maama he nepilì te Nengazen he si Jesus su ibpéhuna zin ibpéhipanew te tigduwazuwa ziyà te langun he minge inged he ebpemeyaan din daan. ²Ne migkagi sikandin diyà te kandan te, “Mezakel pezem is edawat te Meupiya he Tudtulanen. Iring sikandan te kamet he nelutuan en. Uteu meluag is kamet, iyan, deisey kiw zà is ebpemenlegtey. Iampù niw ziyà te Nengazen he sugua zin pa ziyà te kamet din is duma pa he ebpekelegtey. ³Genat kew en, iyan, andam kew su edsuguen ku sikiyu ziyà te minge etew he kumekaid. Iring kew te minge nati he kerehidu ne sikandan ne iring te minge erimaung. ⁴Kenè kew meduwit te selapì, wey kempilù, wey sepatus he ed-ilisan niw. Ne kenà uteu melugayad is kedlelagi niw te etew he egkeuma niw ziyà te zalan.

⁵Ne ke hendei is baley he ebpemenehikan niw ne penelehuzan kew. Kagi kew te, ‘Sikiyu is meginged kayi, tuvazi kew te Megbevayà.’ ⁶Ne emun dait he edtuvazan is etew zutun dekelà is tuvad te Megbevayà kandan. Ne emun kenà, ne kenà sikandan edleusan edtuvazi te Megbevayà. ⁷Ne haazà is baley he zuen etew he egalewgalew keniyu, ne zutun kew pundu taman te kegenat niw. Ne zewata niw is minsan hengkey he ibpekaan dan wey ibpeinum dan keniyu su iring te suhul zan keniyu. Dait is edterebahu he edsuhulan. Kenè kew en penhalinhalin pa maan diyà te zuma pa he minge valey. ⁸Ne emun ebpekeuma kew ziyà te inged ne zuen egalewgalew keniyu, minsan hengkey is keenen dan he ibpekaan dan keniyu, ne keena niw. ⁹Pemewii niw is egkengezeruwan dutun te inged. Ne kegiyi niw is minge etew zutun he megaan en is timpu te kedhedii kandan te Megbevayà. ¹⁰Iyan, emun ebpekeuma kew ziyà te inged ne wazà egalewgalew keniyu zutun, ne peehè kew te minge etew zutun, ne ke sikiyu te, ¹¹‘Minsan is minge eliyavuk kayi te inged niw he nemendeket te minge paa zey, edtektaken dey en *wey niw metueni he edsilutan kew te Megbevayà.*’ Ne ke sikiyu zaan te, ‘Kinahanglan he metueni niw he megaan en is timpu te kedhadì te Megbevayà.’ ¹²Egkegiyen ku keniyu,” ke si Jesus, “he lavew pa is idsilut te Megbevayà dutun te inged emun egkeuma keuzemà is andew te kedsilut, kenà te silut

din dengan diyà te minge lalung he etew he meginged diyà te inged he Suduma.”

Is Kedhukumi te Kenà Edtuu
(*Lucas 10:13-16; Mateo 11:20-24*)

¹³Ne mid-uman mekgagi si Jesus te, “Mekehizuhizu kew keuzemà is minge tigKurasin! Mekehizuhizu kew zaan keuzemà is minge tigBitsayda. Su is minge egkein-inuwan he impeehè ku ziyàn te inged niw te minge Hudiyu, angin ke midhimu ku haazà diyà te minge inged he Tiru wey Sidun he kenà minge Hudiyu is meginged dutun, su nekekukumbalè dan en pezem te saku ne nepen-evuwan dan en is ulu zan *he tuus te ed-iniyugan dan is memezaat he ulaula*. ¹⁴Kenè niw lipati he zutun keuzemà te andew te kedsusi te Megbevayà te menusiya, lavew is silut din keniyu kenà te minge etew ziyà te Tiru wey Sidun. ¹⁵Ne sikiyu zaan,” ke si Jesus, “is minge tigKepirnaum, iyan egkesuatan niw pezem is deliga kew te minsan hentei, iyan, igketimbang kew ziyà te Impirnu.”

¹⁶Ne zutun migkegiyan din haazà is minge sumusundan din te, “Is minsan hentei he etew he ebpemingeg te ibpenurù niw, ne iring te iyan e zin nepemingeg. Ne sikan is etew he kenè kew zin edsegipaan, ne iring te iyan a wazè din segipaa. Ne sikan is etew he kenà edsegipà kedì, ne iyan wazè din segipaa is Megbevayà he midsugù kedì.”

Is Kedlikù Duen te Kepituwan Wey Zezuwa

¹⁷Ne nepipira pa he andew zutun hein nemekeulì sikan is kepituwan he midsugù, utew zan nengelihey su ke sikandan diyà te ki Jesus te, “Minsan is minge mezaat he mulin-ulin ne ebpemingegen key zan ke ibpaawè dey sikandan pinaagi te gehem te ngazan nu!” ¹⁸Ne zutun migkegiyan sikandan ni Jesus te, “Si Setanas, is egalen te minge mezaat he mulin-ulin, neehè ku is kegkezaaga niw kandin ne utew megaan su iring te kilat he ebpuun te langit. ¹⁹Tentenuzi niw heini he mibegayan ku sikiyu te gehem he minsan ke ebpekegiek kew te uled wey venayew ne kenè kew edheregen. Ne kenè kew zaan egkezaag te gehem te ukag tew he si Setanas ne wazà minsan hengkey he ebpekekaid keniyu. ²⁰Iyan, kenè niw iyan ikelihey is kebpemingega keniyu te minge mezaat he mulin-ulin, kekenà, ikelihey niw is minge ngazan niw he impelista te Megbevayà diyà te langit.”

Is Kebpengumew-umew ni Jesus
(*Lucas 10:21-24; Mateo 11:25-27; 13:16,17*)

²¹Ne zutun midlihey si Jesus te Wagas he Mulin-ulin ne mid-ampù diyà te Megbevayà, ke sikandin te, “Amey ku he Nengazen te langit wey tanà, dekelà is kebpeselemati ku kenikew su is in-eles nu su wey kenà mesavut

te minge uluwanen wey uvag en memetau ne impesavut nu en diyà te minge etew he wazè dan minge hanew. Amey ku, umba ebpeselematan ku su midhimu nu heini te iring kayi su iyan egkesuatan nu tenged te gagew nu.”

²²Ne zutun mid-uman megkagi si Jesus diyà te minge etew te, “Is minsan hengkey, insarig kediey te Amey ku he Megbevayà. Wazà nesayud kedi te Anak te Megbevayà, kekenà, iyan dà is Amey ku he Megbevayà. Ne wazà daan nesayud te Amey ku he Megbevayà, kekenà, iyan e zà is Anak din wey sikan is minge etew he mibpengelinteuwan ku he mesayud dan kandin.”

²³Ne midsineruwan ni Jesus is minge sumusundan din hein iyan dan dà, ne ke sikandin te, “Deyzey kew he minge etew su nemetmetahan niw en heini is langun he edhimuwen ku. ²⁴Su tutuu is egkegiyen ku keniyu he kenà pira zà is minge ebpemeneuven te Megbevayà dengan wey minge hadi dengan he egkesuat pezem he mekeahà kayi te nengeehè niw guntaan, iyan, wazà ipaahà kandan. Ne egkesuatan dan daan he ebpemingegen heini is nengezineg niw guntaan, iyan, wazà ipepeming kandan.”

Is Sempità Mehitenged te Meupiya he Eteu he TigSemarya

²⁵Ne zutun duen sevaha he etew he menunudlù te minge kesuguan te minge Hudiyu he midhitindeg su egezaman din edekepa is ketezengan ni Jesus pinaagi te minge insà, ne ke sikandin te, “He Zatù, hengkey is ed-ul-ulahan ku wey a mevegayi te untung he wazà pidtemanan?” ²⁶Ne midtavak si Jesus te, “Hengkey is nekagi te kesuguan te Megbevayà he imbilinbilin ni Moises? Hengkey is kedsevuta nu te nengevasa nu?” ²⁷Ne midtavak haazà is etew te, “Is Megbevayà he Nengazen tew, kinahanglan he iyan tew sikandin ebmahalen dini te gehinawa tew. Iyan sikandin mahal zini te gehinawa tew, isip tew, kedsavut tew, wey tivuuk he ulaula tew. Ne kinahanglan daan he ebpurungan tew is duma tew; ed-isipen tew sikandin he iring en te kenitew he gehinawa.” ²⁸Ne zutun migkagi si Jesus diyà te kandin te, “Benar is nekagi nu. Ne iyan ul-ulaha nu ne ebegayan ka te untung he wazà pidtemanan.”

²⁹Iyan, haazà is menunudlù te kesuguan, egkesuatan din pezem he meisip ni Jesus he hustu is minge ulaula zin, umba migkagi sikandin te, “Hentei is nekagi he zuma ku?” ³⁰Ne ke si Jesus te, “Duen sevaha he etew he Hudiyu he midhipanew ebpuun diyà te inged he Hiruselim he sebsevaha zin su edtupang pehendiyà te inged he Hiriku. Ne ziyà te zalan neuma sikandin te minge tulisan ne mibugel zan sikandin ne midlevasan dan, ne wey zan ewai hein deisek dà is gehinawa zin. ³¹Ne te kegkeipus dutun te minge tulisan, nekeuma zutun is Hudiyu he memumuhat te Megbevayà, iyan, hein neehè din haazà is midruug he nekehidhizegà, mid-eligu zin ne midlaus te hipanew zin.

³²Ne iring din ded daan is nekesunud he nekeuma zutun. Hudiyu zed daan he kevuwazan ni Levi he edtavangtavang te minge memumuhat diyà te simbahan he Valey te Megbevayà, iyan, hein neehè din haazà is nekehidhizegà ne mid-eligu zin daan ne midlaus te hipanew zin.

³³Ne wazà utew meuget ne nekeuma zutun daan is sevaha he kenà Hudiyu su tigSemarya. Ne hein neehè din haazà is nekehidhizegà he midruug ne utew sikandin nehizu. ³⁴Ne mid-uvayan din ne mibewian din te lana wey vinu is minge palì dutun ne mibukusan din te manggad. Ne zutun mibitbit din ne in-untud din te kudè din ne mid-uwit din diyà te valey he hulevungà te minge etew ne zutun mibpurungan din elimahi. ³⁵Ne te nepawà dutun ne mibegey te selapì dutun te tegigaked te valey ne migkagi te, ‘Elimahi nu kedì heini is midruug te tulisan ne emun duen selapì nu pa he egkegastu nu kandin he liyu kayi te ibegey ku, ne zutun te kedlikù ku ne ed-ilisan ku ziyàn te kenikew.’ ”

³⁶Ne ke si Jesus diyà te menunudlù te, “Hentei zutun te tetelu he etew is nehimu he hustu he zuma zutun te midruug te minge tulisan?” ³⁷Ne midtavak haazà is menunudlù te, “Iyan nehimu he hustu he zuma zutun te midruug te minge tulisan haazà is nehizu kandin he etew ne midtavang kandin.” Ne ke si Jesus te, “Iyan haazà ul-ulaha nu is iring dutun.”

Si Marta Wey si Maria

³⁸Ne hein midlaus ensi Jesus, ne nekeuma zan diyà te sevaha he inged he zuen dutun bahi he eggezanan ki Marta. Imepemenahik ni Marta si Jesus dutun te valey zin. ³⁹Ne zuen dutun hazi ni Marta he eggezanan ki Maria. Ne mibpinuu si Maria ziyà te uvey ni Jesus su ebpurung ebpemineg te minge penurù ni Jesus. ⁴⁰Ne si Marta, ne iyan dà sikandin diyà te avu su ebaal te egkekaan dan ne mezakel is igkesamuk din he ebeelan din. Ne zutun mid-uvey sikandin diyà te ki Jesus he ke sikandin te, “Meupiya ve te gehinawa nu he iyan e zà egkeviyuviyu he ebaal te egkekaan tew? Sugua nu si Maria he ugupi e zin.” ⁴¹Iyan, migkagi si Jesus te, “Marta, utew mezakel is igkesemuki nu he kenà utew ebpulus. ⁴²Sevaha zà is dekelà is pulus din he iyan mibpilì ni Maria ne kenà heini igkeawà diyà te kandin.”

Is Ketudluanan Mehitenged te Ked-ampù

(Lucas 11:1-13; Mateo 6:9-13; 7:7-11)

11 ¹Sengeandew, ne ed-ampù si Jesus diyà te Megbevayà. Ne te nekeipus sikandin te ed-ampù migkagi is sevaha zuen te minge sumusundan din, ke sikandin te, “Datù, penurua key te ked-ampù su si Juan Megbebewtismu, mibpenurù din is minge sumusundan din te ked-ampù.” ²Ne migkagi si Jesus te, “Iyan heini iringi niw ke ed-ampù kew; ke sikiyu te,

'Ame y zey ziyà te langit,
berakat he tehuza te menusiya is ngazan nu.
Berakat he medhadì ka te menusiya.

³ Begayi key te egkeenen
he egkinehenganen dey
te kada andew.

⁴ Peseyluwa key te minge salè dey
su sikami, ebpeseyluwen dey
is langun he nekesalà diyà te kenami.

Ne ipekeziyù key kenikew te mezesen he penuley.' ”

⁵ Ne mid-uman megkagi si Jesus te, “Penenglitan is sevaha keniyu, duen emigu zin he edhendutun te kandin te metaneb en is kezukileman ne ke sikandin te, ‘He Geli, ipesambey e pa kenikew te egkekaan. ⁶ Su zuen megeliyug ku he ziyà ebpuun te meziyù ne wazè ku igkepegana kandin.’ ⁷ Ne zutun, edtavak sikandin dutun te valey zin te, ‘Es! egkepegulan ad he ed-enuw su midlekevan ku en heeyan is gemawan ne nemekelipezeng en heini is minge anak ku kayi te hulid ku. Ne kenè e en ebpekeenew he ebegey ziyàn te kenikew te egkekaan.’ ⁸ Ne haazà,” ke si Jesus, “minsán ke kenà sikandin egkesuat he ed-enuw he edtavang te emigu zin, iyan, ke kenà ed-engked haazà is edhangyù, ebpeketegel sikandin ebpekeenew ne ibegey zin kandin is langun he kinahanglan din. ⁹ Ne venar is egkegiyen ku keniyu he penigudu kew vuyù diyà te Megbevayà ne ebegayan kew zin; penigudu kew pen-ahà ne ibpeturedu zin keniyu is ebpen-ahaan niw; penigudu kew penelehuzan ne ebpuwasan kew zin. ¹⁰ Su is langun he ebuyù diyà te Megbevayà, ebpekezawat; ne sikan is ebpen-ahà, ebpeketuredu; ne sikan is ebpenelehuzan, ebpuwasan daan te Megbevayà. ¹¹ Sikiyu is minge ginikanan, ke zuen ebuyuen te anak niw he pait, ne kenà egkehimu he uled is ibegey niw. ¹² Ne emun impis is ebuyuen din, kenà daan egkehimu he venayew is ibegey niw. ¹³ Ne sikiyu is menusiya he kenà memetazeng, emun meupiya is ibegey niw ziyà te minge anak niw, iyan pe be is Ame y tew he Megbevayà diyà te langit kenà mebegey keniyu te Wagas he Mulin-ulin ke ebuyuen niw.”

Is Lavew ki Setanas

(Lucas 11:14-23; Mateo 12:22-30; Marcos 3:20-27)

¹⁴ Ne zuen timpu he mibewian ni Jesus is maama he midhimu he emew te mezaat he mulin-ulin he edlalung kandin. Ne hein impaawà ni Jesus haazà is mezaat he mulin-ulin ne segugunà nekekagi haazà is maama. Ne utew nengeinuinu is langun he minge etew he nengetigum dutun. ¹⁵ Iyan, duen dutun migkagi te, “Iyan mibegey kandin te gehem te kebpenegseg te minge mezaat he mulin-ulin si Endedaman, sikan is egalen te minge mezaat he mulin-ulin.” ¹⁶ Ne zuen pa zutun minge

etew he egezaman dan si Jesus. Midhangyù dan he ibpeehè din is egkein-inuwan su ed-ahaan dan ke tutuu ve he midsugù sikandin te Megbevayà. ¹⁷Iyan, netuenan ni Jesus ke hengkey is seled te gehinawa zan ne migkagi sikandin te, “Penenglitan ke zuen hadi ne ebpetebtebekà is menge sakup din ne megaan egkeawà is gehem din te kedhadì. Ne ke zuen edlingahaan te sengepemilya ne ebpekungkuntedahà is menge sakup din, ne egkevengkag haazà is pemilya. ¹⁸Ne emun egketebek ni Setanas is menge sakup din egkezeetan is gehem din. Kenà egkehimu is migkagi niw he pinaagi te gehem ni Endedaman egkezaag ku is menge sakup din. ¹⁹Emun iyan igkesegega ku te menge mezaat he mulin-ulin is gehem he ebpuun diyà te ki Setanas ne hendei ves ebpuun is gehem te menge zuma niw he ebpenegseg te mezaat he mulin-ulin? Pinaagi te menge ulaula te menge sumusundan niw egketuusan he nengesayep kew. ²⁰Su heini is gehem ku te kebpmugew te mezaat he mulin-ulin, ne ziyà ebpuun te Megbevayà. Ne pinaagi kayi egketuusan niw he iyan en heini sikan is timpu te kedhadì te Megbevayà.”

²¹*Ne zutun impesavut ni Jesus he lavew he mekegegehèm sikandin kenà si Setanas is egalen te menge mezaat he mulin-ulin. Ke si Jesus te, “Ke zuen mezesen he etew he nepurung megumeeni ne ebentayan din is baley zin, wazà ebpekeagew te menge azen din. ²²Iyan, ke zuen tuwas pa he mezesen he ebpekeuma, egkezaag din haazà is nehuna, ne ed-egawan din te menge gumaan he iyan edserigan dutun te etew ne ebpeneltelazen din haazà is netavan din diyà te menge sakup din.”*

²³Ne mid-uman megkagi si Jesus te, “Sikan is kenè ku zuma, ne kuntada ku; sikan is kenà edtavang kedì, ne edsanggen kediey.

Is Mezaat he Mulin-ulin he Ebpen-ahà te Egkeubpaan Din
(*Lucas 11:24-26; Mateo 12:43-45*)

²⁴Ke ed-awà is mezaat he mulin-ulin he ebpuun diyà te etew he edlelungen din, diyà ebayà te memaza he tanà su ebpen-ahà te egkeubpaan din. Ne emun wazè din egkeahà, egkagi sikandin te, ‘Edlikù a nasi diyà te neubpaan ku.’ ²⁵Ne edlikù ne egkeehè din haazà is neubpaan din he midtines en is menge vutang dutun, ne nepurung melumpiyuwi. ²⁶Ne zutun edlikù edhipanew su ebpengakat te pitu he zuma zin he menge mezaat he mulin-ulin he tuwas pa he memezaat kenà sikandin. Ne ed-ahuk dan ne ed-ubpè dan dutun te etew. Ne zutun ed-iseg pa ebmezaat is kebpekesavuk dutun te etew, kenà te nehuna he kebpekesavuk din.”

Is Tutuu he Kelipey

²⁷Ne zutun hein neipus ni Jesus haazà is migkagi zin ne zuen dutun bahi he midhabet megkagi te, “Dekelà is kelipey te vahi he mid-anak

kenikew wey nekepesusu kenikew!”²⁸ Iyan, midtavak si Jesus te, “Lavew pa he zekelà is kelipey te etew he ebpemineg te Lalag te Megbevayà ne epezumduman din!”

Is Ebpen-ahà te Singyal

(Lucas 11:29-32; Mateo 12:38-42)

²⁹Ne zutun hein egkenghasekhasek en is utew mezakel he minge etew he ed-uvey ziyà te ki Jesus, migkagi sikandin diyà te kandan te, “Sikiyu is minge etew guntaan, utew mezaat is minge ulaula niw. Egkesuatan niw he meehè niw is singyal he ebpuun te Megbevayà diyà te langit he tuus he midsugù e zin, iyan, iyan dà singyal he ipaahà keniyu is iring te impeulaula zengan duen te tipehuna he ebpeneuven he si Jonas. ³⁰Su si Jonas, hein nekeuma sikandin dengan diyà te inged he Ninivi, impeehè din is singyal he tuus te silut te Megbevayà diyà te minge tigNinivi. Ne iring din ded daan, siak is Kakey te Menusiyà, egkehimu is penurù ku he tuus te megaan en is ed-ul-ulahan keniyu te Megbevayà. ³¹Keuzemà te andew te kedhukum te Megbevayà, sikan is tipehuna he bai he ebpuun te inged he Siba, edsewayen kew zin is minge etew guntaan su utew meziyù is midhipenawan din te kepemineg dà te penurù ni Hadì Sulumun te utew metau. Ne guntaan, duen lavew pa kenà si Sulumun dini te keniyu ne wazè niw zewata is penurù din. ³²Keuzemà te andew te kedhukum te Megbevayà, edsewayen kew is minge etew guntaan te minge tigNinivi zengan su hein nezineg dan is penurù ni Jonas, mid-iniyugan dan is memezaat he ulaula. Ne guntaan duen ebpeneuven he lavew pa kenà si Jonas dini te keniyu, ne sikiyu mulà, wazè niw zewata is penurù din.”

Is Sulù

(Lucas 11:33-36; Mateo 5:15; 6:22,23)

³³Ne mid-uman megkagi si Jesus te, “Wazà etew he edtemteman din is sulù ne id-eles din, ne emun kenà, ne ebpelengkevan din te revan, kekenà, diyè din idsavuk te sevukà, ne emun duen etew he edseled ne egketeyawan. ³⁴Is mata te etew, ne iring te sulù diyà te lawa zin su emun merayag is ked-ehè din, *he ke và dà egkegiya, emun metazeng is ulaula zin, ne henduen be te egketeyawan is tivuuk he lawa zin. Iyan, emun lakap sikandin, he ke và dà egkegiya, lalung sikandin, henduen be te egkekezukileman is tivuuk he lawa zin.* ³⁵Iring din ded daan is sulù te isip te etew, *he ke và dà egkegiya, is kedsevuta zin te hustu. Kinahanglan he kenà heini egkezaag te mezaat* ³⁶he ulaula zin, ne henduen be te utew merayag is egkeulaula zin iring te egketeyawan sikandin te sulù.”

Is Minge Etew he Uvag Edsunud te Megbevayà

(Lucas 11:37-54; Mateo 23:1-36; Marcos 12:38-40)

³⁷Ne hein nekeipus dutun si Jesus is ebpenurù ne zuen sevaha zutun he Perisiyu he mid-umbita kandin te kegkaan diyà te valey zin. Ne

midhendiyà si Jesus ne migkaan. ³⁸Ne naahà dutun te Perisiyu he migkaan si Jesus he wazè din lùlui is belad din. Ne utew sikandin neinuinu su nesupak ni Jesus is betasan te menge Perisiyu. ³⁹Ne migkagi si Jesus diyà te kandin te, “Sikiyu is menge Perisiyu, ebpurungan niw ebentayi is menge vetasan niw, iyan, diyà te isip niw wey gehinawa niw ne zuen keheheramham wey kelelalung. Iring kew te vasu wey pinggan he nelumpiyuwan diyà te gawas, iyan, meremerik is diyà te seled.

⁴⁰Menge wazè niw isip! Is Megbevayà he midlimbag din is gawas te lawa niw, midlimbag din daan is gehinawa wey isip niw. Ne kinahanglan he lumpiyu is gehinawa niw wey isip niw iring te gawas te lawa niw. ⁴¹Ne sumalà is egkehimu niw, begayi niw is menge egkengeayuayu ne human egkehimu he egkelumpiyuwan kew egkepurungi.

⁴²Kehizu niw te menge Perisiyu su ibegey niw te Megbevayà is ikepulù he vahin minsan te menge perehemut te egkeenen iring te yirbebuyna wey vawing wey is langun he menge edlumbayen, iyan, is metazeng he ulaula wey is kebmahala niw te Megbevayà diyà te gehinawa niw, ne wazè niw isipa. Kinahanglan he ivegey niw is ikepulù, iyan, kenè niw zaan ipeliyu heini is menge lavew pa he sugù.

⁴³Kehizu niw te menge Perisiyu su emun diyè kew te simbahan egkesuatan niw he ibpepinuu kew ziyà te menge pinuwà te menge egalen. Ne emun diyè kew te tiyenggiyan, utew ibmeupiya te gehinawa niw ke edtehuzen kew te menge etew. ⁴⁴Kehizu niw te menge Perisiyu su iring kew te menge leveng he kenà egketuusan ne egkegiekan te etew, *ian, wazè dan metueni he meremerik haazà is negiekan dan.*”

⁴⁵Ne zutun duen menunudlù te kesuguan dutun he migkagi ziyà te ki Jesus te, “Datù, heeyan is menge lalag nu, ne nesugat key zaan kenian.” ⁴⁶Ne ke si Jesus te, “Sikiyu zaan is menge menunudlù te kesuguan, kehizu niw zaan su utew mezakel is meregen he tulumanen he ibpetuman niw te menge etew, iyan, wazà minsan hengkey he idtavang niw kandan wey zan meketuman dutun te ibpetuman niw kandan. ⁴⁷Mekehizuhizu kew utew keuzemà su mideyzeyanan niw is mibpenlevengan duen te ebpemeneuven dengan te Megbevayà, iyan, menge kevuwazan kew te nememunù kandan. ⁴⁸Is menge kepuun niw, ne iyan mibunù, ne midhimasad niw haazà is mezaat he mid-ulaula zan su iyan kew midayandayan te midlevengan; mid-ulaula niw heini he tuus te egkesuatan niw is mezaat he vaal te menge kepuun niw. ⁴⁹Is Megbevayà he utew metau, migkagi sikandin dengan te, ‘Ibpehendiyàn ku pa te kandan is ebpemeneuven wey is menge epustul. Ne edhimetayan dan is duma ne is duma ebpesipelahan dan.’ Umba migkagi heini te Megbevayà su netuenan din he sikiyu is menge Hudiyu, nesevaha is gehinawa niw te gehinawa te menge kepuun niw. ⁵⁰Umba sikiyu is menge etew guntaan, elin kew zaan edsilutan te kebpemunua te langun he menge ebpemeneuven te Megbevayà he nengevunù dengan ⁵¹puunè pa te kedhimetayi ki Abel

pehendiyà te kedhimetayi ki Zacarias he mibunù diyà te pid-elangan te simbahan he Valey te Megbevayà wey vangkù he pemuhatà. Benar is egkegiyen ku he sikiyu is menge etew guntaan, elin kew zaan edsilutan tenged kayi!

⁵² Mekehizuhizu kew keuzemà sikiyu is menge menunudlù te kesuguan su ed-elangan niw is menge etew wey zan kenà metueni is hustu he ibpevayà pehendiyà te Megbevayà. Kenè kew egkesuat he ed-ikul te hustu he ibayà, iyan, ed-egenen niw is etew he egkesuat he ed-ikul zutun!”

⁵³ Ne hein mid-awà si Jesus dutun te valey te Perisiyu, midregenregen sikandin te menge Perisiyu wey menge menunudlù te kesuguan. Mezakel is menge insè dan kandin su edtegelel dan sikandin wey meketavak ⁵⁴su ebpengahaan dan is paagi wey mehimu si Jesus he igkesumbang dan.

Is Ereg he Ighahandek te Etew
(*Lucas 12:1-7; Mateo 10:26-31*)

12 ¹Ne sevaha he andew, utew mezakel he menge etew is edhahasekhasek he ed-uvey ziyà te ki Jesus. Ne zutun migkagi si Jesus, asal iyan egkegiyan din is menge sumusundan din, ke sikandin te, “Andam kew wey niw melikayi is tapey te menge Perisiyu, he ke vâ dà egkegiya, is tarù he kedtuu zan te Megbevayà. ²Kunaan dan ke kenà egketuenan he tarù is kedtuu zan, iyan, is langun he midtembunan he ed-ul-ulahan te etew, ne egketuenan ded wey is minsan hengkey he nekeeles ne ibpegawagawa gihapun. ³Is langun he ednèeesen niw te mezukilem, ne egkezineg ke maandew wey is minsan hengkey he egkekegiyen niw he meeles diyà te rugu niw, ne egketuenan ded te mezakel he menge etew ziyà te tiyenggiyan.

⁴Ne sikiyu is menge emigu ku, iyan egkegiyen ku keniyu is: kenè kew mahandek te menge etew zà duen su iyan dà egkepatay zan is lawa niw, iyan, is gimukud niw, kenè dan egkepatay. ⁵Egkegiyen ku keniyu ke hentei is engayan he igkehandek niw. Iyan niw ikehandek is Megbevayà su kenè din iyan dà egkepatay is lawa niw su zuen din kegehèm he ebpeketimbag te gimukud niw ziyà te Impirnu. Uya, iyan niw sikandin ikehandek!”

⁶Ne ke si Jesus te, “Duen tagbis he egkepemasa te etew is lelima he vuuk te dezuwa zà he tumbaga. Ne minsan pa zutun, is Megbevayà, kenè din id-awà diyà te isip din is minsan sevaha kandan. ⁷Ne iyan kew pe be is minsan ke edtigselibahan te ebilang is bulvul niw ne netuenan din en is kezakel. Umba, kenè kew mahandek su lavew kew he mahal ziyà te kandin kenà te minsan utew mezakel he menge tagbis.”

Is Ed-engkenen ni Jesus
(*Lucas 12:8-12; Mateo 10:32,33; 12:32; 10:19,20*)

⁸“Uteu venar is egkegiyen ku,” ke si Jesus, “he sikan is etew he egkagi ziyà te menge etew he iyan a egalen din, ne siak is Kakey te Menusiyà, ed-

engkenen ku zaan sikandin diyà te etuvangan te minge velinsuguen te Amey ku he Megbevayà he ziyà te langit. ⁹Ne sikan is etew he egkagi ziyà te minge etew he kenà a iyan egalen din, ne kenè ku zaan sikandin ed-engkenen diyà te etuvangan te minge velinsuguen te Amey ku he ziyà te langit.

¹⁰Ne sikan is edsumpalit kedì te Kakey te Menusiyà, ne egkepesaylu pa; iyan, sikan is edsumpalit te Wagas he Mulin-ulin, kenè en egkepesaylu.

¹¹Ne emun tenged te kedtuu niw kedì ed-uwiten kew te minge etew ziyà te minge simbahan dan su edhukuman kew zan ne emun ed-imbistigahan kew zaan diyà te etuvangan te minge hadì wey huwis, kenè kew meseeng ke hengkey is idtavak niw kandan wey ke hengkey is paagi niw zutun. ¹²Su is Wagas he Mulin-ulin, iyan ebpenurù keniyu zutun he timpu; ne egketagù diyà te gehinawa niw is ibpekagi zin keniyu.”

Is Tulebung he Sepian

¹³Ne zuen sevaha he maama zutun te nengevurun he minge etew. Ke sikandin te, “Datù, iyan ka metau te kakey ku he vehini e zin te minge azen he kevilin dey te amey zey he minatey en.” ¹⁴Ne midtavak si Jesus te, “Wazè ku kelavet keniyau su kenà a iyan edhusey keniyu.” ¹⁵Ne migkagi si Jesus diyà te minge etew te, “Purungi niw ventayi is ulaula niw su wey wazà kekeleged diyau te keniyu. Su is ibmeupiya te untung te etew, kenà ebpuun te mezakel he minge azen.” ¹⁶Ne zutun impezineg ni Jesus kandan is sempità. Ke sikandin te, “Duen etew he utew egketigayun su zuen tanè din he utew uuzaran. ¹⁷Ne neisip dutun te etew is, ‘Hengkey is ed-ul-ulahan ku kayi te langun he uzar ku? Su kenà egkeamin kayi te minge budiga ku ne wazè en egketeguan ku.’ ¹⁸Ne ke sikandin te, ‘Edrundusen ku heini is minge budiga ku ne ed-uman a ebevaley te utew zekelà su wey ku zuen metegui te langun he egkeragun ku wey zuma pa he minge azen ku. ¹⁹Ne zutun, geina te utew meupiya is kebpekesavuk ku he etew, kenà ad maan edterebahu su naazen ku en is minsan hengkey he egkinehnglanan ku taman te pira pa he tuig. Ne tenged kayi ebperenggey e zà is ebpurung egkaan, ed-inum, wey edlipeylipey,’ ke sikandin. ²⁰Iyan, dutun migkagi ziyà te kandin is Megbevayà te, ‘Uteu ka tulebung he etew! Guntaan dà te mezukilem egkeumuran ke en ne ebpatay kad, ne hentei vuwa is ebpekeangkan te langun he minge azen nu he intagù nu keniyau te valey nu?’ ” ²¹Ne mid-uman megkagi si Jesus diyà te mezakel he minge etew, ke sikandin te, “Iring kayi te sepian he etew is minsan hentei he edtipig te zekelà he ketigeyunan, iyan, wazà diyà te kandin is minsan hengkey he igkesuat te Megbevayà.”

Is Menge Kinehnglanan (Lucas 12:22-31; Mateo 6:25-34)

²²Ne migkagi si Jesus diyà te minge sumusundan din te, “Ne tenged kayi egkegiyen ku keniyu te minge sumusundan ku he kenè kew meseeng

te egkeenen he igkeuyag niw. Ne kenè kew zaan meseeng te ugelingen he idsun-ud te lawa niw. ²³Su mibegayan kew te Megbevayà te gehinawa wey lawa he mahal utew; ne wey pe be kenà mehimu he ebegayan kew zin daan te egkeenen wey ugelingen? ²⁴Isipa niw is menge uwak; kenè dan ebpemula; kenè dan edragun ne wazè dan daan lawig he ederengdangan dan. Ne minsan pa zutun ebpengelintau is Megbevayà te egkekaan dan. Ne iyan kew pe be is etew he lavew pa he mahal ziyà te kandin kenà is menge uwak! ²⁵Ne minsan sengemenu is kegkenuguni te etew te untung din, wazà minsan hengkey he paagi he egkesumpatan din te minsan deisey zà. ²⁶Ne emun pinaagi te kegkeseeng niw wazè niw egkehimu te minsan kayi te utew zeisey he ebeelan, hengkey is pulus te kedseengseeng niw pa maan te zuma he ebeelan? ²⁷Ahaa niw is menge kevukazan ke hengkey is kedtuvù dan. Kenè dan edterebahu ne kenè dan daan ebpengavel. Ne minsan pa zutun, egkegiyen ku keniyu he minsan si Hadì Sulumun dengan he utew sepian wey nevantug, ne wazà mekesusuluwan is kezagwey te menge bisti zin te kezagwey kayi te menge kevukazan. ²⁸Is sagbet, ne wazè din bali; egkeehè ta guntaan ne kenè en utew egkeuget ne egkegangu en, ne ebinsulan en. Iyan, ke edhimuwen te Megbevayà he mekempet minsan heini is menge sagbet, iyan kew pe be kenè din daan mevegayi te igkeuugelingen! Maan is utew zeisek is kedsarig niw kandin? ²⁹Kenè kew meseeng! Kenè niw iyan isipa ke hengkey is egkekaan niw wey egkeinum. ³⁰Su is iring keniyen, ne iyan igkengeseeng te menge etew he wazà medtuu te tutuu he Megbevayà, iyan, sikiyu mulà, kenè niw ikeseeng is iring dutun su is Amey niw he Megbevayà, netuenan din he egkinehenglanan niw heini is langun. ³¹Iyan niw ul-ulaha is ibpeulaula keniyu te Megbevayà he iyan edhadì keniyu ne ibegey zin diyà te keniyu is langun he egkinehenglanan niw.

Is Menge Ketigeyunan
(*Lucas 12:32-34; Mateo 6:19-21*)

³²Sikiyu is menge sumusundan ku, kenè kew mahandek. Minsan pa te zeisey kew zà, is Amey niw he Megbevayà, egkesuatan din he medhadì kew iring te edhadì daan sikandin. ³³Ivelegyè niw is langun he azen niw ne ipemegey niw is halin diyà te menge egkengeayuayu. Pinaagi kayi egkehimu he zuen ketigeyunan niw ziyà te langit. Is menge azen niw ziyà te langit, ne kenà egkezeetan ne kenà egketerinan su wazà ebpenakew ne wazà ipes he ebpeketket. ³⁴Ne ke hendei is egketeguan te ketigeyunan niw ne zutun daan is gehinawa niw.”

Is Kebperetenga te Nengazen

³⁵Ne impezineg en maan ni Jesus is sempità, ke sikandin te, “Andam kew he zaan su wey kenè kew metingkemed te minsan hengkey. Iringi

niw is suluguen he edtagad te egalen dan he ebpuun te eseweey he midtelavuk din. ³⁶Su haazà is menge suluguen, ne layun dan ed-andam ne kenè dan ed-evukan is sulù dan ne emun ebpekeuma haazà is egalen dan ne ebpeneluhuzan diyà te pultahan ne petuluy zan egkepuwasi. ³⁷Uteu meupiya is kegegehinawa zutun te menge suluguen emun ebpekeuma haazà is egalen dan ne zaan dan neendami haazà is kebpekeuma zin. Benar is egkegiyen ku he haazà is egalen dan, ibpepinuu zin sikandan diyà te lemisahan ne iyan sikandin ebpekaan kandan. ³⁸Uteu egkengelihey sikandan ke ebpekeuma is egalen dan he kemulu zan pa sikandin edtegazi minsan ke liwazè en is kezukileman wey minsan ke egkepkepawè en be.” ³⁹Ne ke si Jesus maan te, “Kenè niw heini lipati he emun egketuenan te tegivaley ke keenu ebpekeuma is tekawen ne ebpekepurung sikandin ebpekevantey ne kenà ebpekeseled dutun te valey zin haazà is tekawen. ⁴⁰Ne sikiyu zaan, kinahanglan he mebpekevantey kew su siak is Kakey te Menuyisà, ebpekeuma a te uras he wazè niw isipa he ebpekeuma a.”

Is Menge Suluguen

(Lucas 12:41-48; Mateo 24:45-51)

⁴¹Ne zutun, mid-insà si Pedro, ke sikandin te, “Heini is sempità he migkagi nu, iyan key zè be kenikew ebpenuruen is menge sumusundan nu, wey ke elin be is menge etew?” ⁴²Ne midtavak is Nengazen te, “Sikan is suluguen he uluwanen wey metinumanen, iyan ibpevayàbayà te egalen din te menge zuma zin he suluguen. Ne iyan ebpekaan te menge zuma zin he suluguen dutun te uras te kegkaan. ⁴³Emun ed-ulì haazà is egalen din, utew zekelà is kelipey zutun te suluguen ke egkeahà te egalen din he midtuman din is langun he ebpeveelan kandin. ⁴⁴Egkegiyen ku keniyu he is suluguen he metinumanen, idsarig kandin is langun he menge azen te egalen din. ⁴⁵Iyan, kehizu zin ke iyan diyà te isip din is menaney pa ed-ulì haazà is egalen din ne ebpemugelen din is menge zuma zin he suluguen he maama wey vahi ne iyan dà baal zin is egkaan wey ed-inum ne egkelangut. ⁴⁶Su zutun te andew he wazè din peebuta wey te uras he wazè din metueni, ebpekeulì haazà is egalen din. Ne haazà is suluguen, ebeelan diyà te kandin is iring te ebeelan diyà te menge suluguen he kenà egkeserigan ne edhimetayan sikandin te egalen din.

⁴⁷Ne sikan is suluguen he netuenan din en is ibpeveelan kandin te egalen din, iyan, wazà med-andam ne wazà medtuman te ibpeveelan kandin te egalen din, ne kenà sikandin ed-uraman te ebugel zutun te egalen din. ⁴⁸Ne sikan is suluguen he wazè din pa metueni is ibpeveelan kandin te egalen din, iyan, duen mid-ulaula zin he igkepeuki kandin te egalen din, ne kenà utew sikandin ebugelen.” Ne mid-uman megkagi si Jesus te, “Is etew he zekelà is insarig kandin, dekelà daan is

ebperetengen diyà te kandin. Ne emun utew pa zekelà is insarig kandin ne utew en daan dekelà is ebperetengen diyà te kandin.”

Is Samuk

(Lucas 12:49-53; Mateo 10:34-36)

⁴⁹Ne migkagi si Jesus te, “Iyan ku impehendini su wey dini te kelibutan duen hapuy, *he ke và dà egkegiya, su wey mehukumi is mence etew. Ne gustu ku pezem he zaan en he neretem heini is hapuy.* ⁵⁰Duen ibewtismu kedì *he iyan is dekelà pa he mence kemeresayan he egkeulaula ku he wazè pa mengetuman.* Henduen a te ed-utuk te langit taman te kenè ku pa heini egkeliyu. ⁵¹Kunaan niw vuwa ke iyan impehengkayi ku te kelibutan is wey wazè en samuk te menusiyà. Iyan kenà! Su heini is kebpekehendini ku, ne zuen kebpekedesusuwey te gehinawa te mence etew. ⁵²Puun guntaan tenged kedì emun duen lelima he etew ziyà te sengepeningaan, egkevahin sikandan. Ebpekigkuntada is tetelu te zezuwa. Ne iring din ded daan ebpekigkuntada haazà is dezuwa zutun te tetelu. ⁵³Ebpekigkuntada is maama te anak din he maama ne is anak, ne ebpekigkuntada te amey zin. Ne is bahi, ne ebpekigkuntada te anak din he vahi ne is anak din, ne ebpekigkuntada zaan te iney zin. Ne ke zuen bahi, ne ebpekigkuntada te ambey zin. Ne egkuntedahan daan sikandin te ambey zin.”

Is Tuus te Timpu

(Lucas 12:54-56; Mateo 16:2,3)

⁵⁴Ne migkagi med-uman si Jesus diyà te mence etew te, “Dini te kenitew ke egkeehè niw is kivel ziyà te edsenlepan ne ke sikiyu te, ‘Ed-uzan heini,’ ne ed-uzan iyan. ⁵⁵Ne emun ebpengeramag he ebpuun te zapit te zivavà ne ke sikiyu te, ‘Ebmeinit utew guntaan,’ ne ed-andew iyan. ⁵⁶Tarù is ulaula niw! Su emun ed-ahaan niw is langit wey tanà egketuenan niw ke hengkey is egkehitavù te timpu, iyan, kenè niw uvag egkesavut ke hengkey is ed-ul-ulahan guntaan te Megbevayà pinaagi kedì.”

Is Kebpekidhusaya

(Lucas 12:57-59; Mateo 5:25,26)

⁵⁷Ne ke si Jesus te, “Deyzey ke ed-isipen niw is hustu he ed-ul-ulahan. ⁵⁸Penenglitan duen etew he idsumbung kew zin, ne ed-uwiten kew zin diyà te hukmanan. Himuwa niw is taman te egkehimu niw su wey kew kandin mebpekidhusey te kenè kew pa ebpekeetuvang te huwis. Su emun ebpekeetuvang kew en te huwis, kela ke izata kew zin diyà te pulis ne egkepirisu kew. ⁵⁹Ne zutun kew ebpekeubpà taman te kenè niw pa egkegempusan is multa keniyu.”

Is Ked-iniyugi te Mezaat he Ulaula

13 ¹Ne zutun he timpu zuen nemekeuma he menge etew ne mibpenudtul zan diyà te ki Jesus is mehitenged te menge etew he tigGeliliya he impehimentayan ni Gubirnedur Pilatu zutun te timpu te kebpelengesa zutun te menge etew te langgam diyà te simbahan he Valey te Megbevayà. ²Ne migkagi kandan si Jesus te, “Kunaan niw vuwa ke lavew pa he mekesesalà haazà is menge tigGeliliya, kenà is menge zuma zan he tigGeliliya, ne tenged dutun intugut te Megbevayà he edhimentayan sikandan. ³Kenà heeyan iyan! Su egkegiyen ku keniyu he emun kenè niw ed-iniyugan is menge ulaula niw he memezaat, ebpatay kew zaan is langun, iring kandan. ⁴Ne isipa niw zaan is sepulù wey walu he menge etew he nemematey hein nepilayan sikandan te metikang he valey ziyà te Siluwi. Kunaan niw vuwa ke iyan kandan ingkepilayi su utew lavew sikandan he mekesesalà kenà te langun he menge zuma zan he tigHiruselim. ⁵Kenà daan. Egkegiyen ku keniyu he emun kenè niw ed-iniyugan is memezaat he menge ulaula niw ne ebpatay kew zaan is langun iring kandan.”

Is Kayu he Igira

⁶Ne zuen en maan sempità he impezineg ni Jesus kandan. *Ibpenurù din he emun wazà mahalín is ulaula te etew ne edsilutan sikandin te Megbevayà.* Ke sikandin te, “Duen etew he zuen din pinemula he kayu he igira ziyà te pemuleey zin. Sevaha he andew zutun mid-ehè din haazà is kayu ke zuen en begas din he igira. Iyan, wazà mebegas haazà is kayu. ⁷Ne migkegiyan din is impeelima zin dutun te kayu, ke sikandin te, ‘Nemenu vuwa heini is kayu he kenè en ebegasbegas? Su tetelu en he tuig is kepperetenga ku ke ebegas ne kenè en iyan ebegas. Pilaya nu nasì su ebpekehenung dà kayi te zuma he pinemula.’ ⁸Iyan, migkagi haazà is impeelima zutun te, ‘Kenè te pa zè pa, Anggam, ebpilayen su ebpesesegazen te pa seled te sengetuig. Edhigewanan ku pa is pelingut ne ebukbukan ku pa te pelambù te pinemula. ⁹Ne emun ebegas te ilis he tuig ne meupiya, ne emun kenà ebegas ne ebpilayen ku.’ ”

Is Kebewii Zuen te Nevekut

¹⁰Ne sevaha he andew he Sebadu, diyà si Jesus ebpenurù te simbahan te menge Huidiyu. ¹¹Ne zuen dutun te simbahan bahi he nevekut su midlalung te mezaat he mulin-ulin. Ne menge sepulù en wey walu he tuig haazà is kegkevekut din ne kenè en iyan egkevelug egkeketeng te minsan deisey zà. ¹²Ne zutun te kegkeahaa ni Jesus kandin, mid-umew zin ne ke sikandin te, “Ayà, egkeulian ke en kenian te zaru nu.” ¹³Ne midsamsam ni Jesus is peka zutun te vahi ne zutundutun ne neketeng is

peka zin. Ne nekezaligdalig haazà is bahi te Megbevayà. ¹⁴Ne is egalen dutun te simbahan, utew nepauk dutun te kebpemawì ni Jesus dutun te Andew te Kedhimeley. Ne ke sikandin diyà te minge etew te, “Seled te heenem he andew is kedterebahu tew te sengesimana. Emun ebpevawì kew zutun he timpu ne meupiya, iyan, kenè kew pevawì guntaan te Andew te Kedhimeley!” ¹⁵Ne midtavak kandin si Jesus te, “Tarù is minge ulaula niw! Ke zuen baka ne emun kenà ne kudà te minsan hentei keniyu, kenà egkehimu he kenè din edhekazan haazà emun Andew te Kedhimeley, kekenà, edhekazan din ne edtuyuken din pehendiyà te wahig su ibpeinum din. ¹⁶Ne heini guntaan is bahi he kevuwazan daan ni Abraham, ne mibakus ni Setanas te sepulù en wey walu he tuig, ne kenè niw ves ebpehekazan kayi te Andew te Kedhimeley!” ¹⁷Ne haazà is tavak ni Jesus, utew ingkeeled te minge kuntada zin. Ne is duma zutun he mezakel he minge etew, utew zan nengelipey te langun he minge egkengein-inuwan he mibeelan din.

Is Ked-iseg Kebmahabet te Edhedian te Megbevayà
(*Lucas 13:18-21; Mateo 13:31-33; Marcos 4:30-32*)

¹⁸Ne impenurù en maan ni Jesus is selakew en maan he sempità, ke sikandin te, “Hengkey is meupiya he ebpetug-iringan te kebmezakel te minge etew he edhedian te Megbevayà? ¹⁹Is kebmezakel zan te edhedian te Megbevayà, ne iring te pinemula he utew zeisey is lisu zin. Ibpeimula heini te etew ziyà te kamet din ne ke edtuvù ne edekelà ne egkehimu he iring kezekelà te kayu ne egkeletunan te minge tagbis ne egkeseselagan dan is minge subpang din.”

²⁰Ne mid-uman megkagi si Jesus te, “Hengkey pa is meupiya he ebpetug-iringan te kebmezakel te minge etew he edhedian te Megbevayà? ²¹Is kebmezakel zan te edhedian te Megbevayà, ne iring daan te tapey. Su ke zuen bahi he ebaal te supas, egkuwaan din haazà is tapey ne idsahug din te sengebisin he erina. Ne ed-ensak haazà is tapey zutun te erina ne edtulin haazà is erina.”

Is Kenà Ebpekeragkes te Minge Etew he Edhedian te Megbevayà
(*Lucas 13:22-30; Mateo 7:13,14,21-23*)

²²Midhipanew si Jesus pehendiyà te inged he Hiruselim ne zutun te kedhipanew zin ne mibpenuluytuluy ziyà te zuma pa he minge inged su ebpenurù te minge etew. ²³Ne zuen mid-insà kandin te, “Datù, deisey zè be is minge etew he ebegayan te untung he wazà pidtemanan?” Ne midtavak si Jesus te, ²⁴“Himuwa niw is taman te egkehimu niw wey kew mekeseled te meliget he gemawan he idselang dutun te valey he iyan is untung he wazà pidtemanan su egkegiyen ku keniyu he mezakel is egkesuat pezem he edseled dutun, iyan, kenè dan ebpekeseled. ²⁵Su

edlekevan te tegivaley haazà is gemawan. Ne emun diyè kew pa te gawas ebpenelehuzan kew is egkagi te, ‘Puwasi key kenikew!’ Ne iyan dà idtavak dutun te tegigaked is, ‘Kenè ku egketuenan ke hentei kew wey ke hendei kew ebpuun.’ ²⁶Ne zutun edtavak kew te, ‘Dengan migkaan key wey mid-inum key zuma kenikew ne mibpenurù ka ziyà te inged dey!’ ²⁷Ne edtevaken kew zin te, ‘Kenè ku iyan egketuenan ke hentei kew wey ke hendei kew ebpuun. Sikiyu is memezaat is ulaula, awè kew en dini.’ ²⁸Ne zutun,” ke si Jesus, “utew zekelà he erang niw ne ebpemekengingitel kew tenged te utew ibmesakit pezem te gehinawa niw su kenè kew ebpekeragkes dutun te edhedian te Megbevayà, ne ziyà te seled, ne egkeehè niw is menge kepuun niw zengan, ensi Abraham wey sikan is anak din he si Isaak wey sikan is apù din he si Hakub wey elin daan dutun is langun he ebpemeneuven te Megbevayà. ²⁹Mezakel zaan dutun is menge etew he kenà menge zuma niw he Hudiyu he ebpemuum diyà te heepat he pesagi kayi te kelibutan. Ne ebpemekepinuu sikandan dutun te keemuran te langun he edhedian te Megbevayà. ³⁰Duen guntaan menge etew he kunaan niw ke egkengehuziyan su kenà menge zuma niw he Hudiyu, iyan, emun egkeume en haazà he andew ne iyan sikandan egkehuna te langun he edhedian te Megbevayà. Ne zuen daan menge etew guntaan he kunaan niw ke egkengehuna, iyan, emun egkeume en haazà he andew ne iyan sikandan egkengehuziyan te langun.”

Is Hizu ni Jesus te Menge TigHiruselim

(Lucas 13:31-35; Mateo 23:37-39)

³¹Ne zutun daan he andew ne zuen menge Perisiyu he midhinguma zan si Jesus, ne ke sikandan te, “Laus ke en ne kenè ke en tuluy zini te kenami su edhimetayan ke kun ni Hadi Hirudis.” ³²Ne migkagi si Jesus diyà te kandan te, “Si Hirudis, haazà is utew metau he ed-akal, kegiyi niw sikandin he kenè e pa ed-awà dini su guntaan wey keeselem ebpenegsegen ku pa is menge mezaat he mulin-ulin he ebpenlalung te menge etew, ne ebewian ku is egkengezeruwan. Ne mekezuwa pa guntaan ne human egkeipus heini is menge vaal ku zini. ³³Iyan, egkegiyen ku keniyu he kinahanglan he ednaneynaney e zè pa edlaus guntaan wey keeselem wey te mekezuwa pa su kenà egkehimu he edhimetayan a zini su is ebpeneuven te Megbevayà, ne kenà tekew en edhimetayan ke kenà diyà te seled te inged he Hiruselim.”

³⁴Ne zutun netenuzan ni Jesus is menge ulaula te menge meginged te Hiruselim ne ke sikandin te, “Igakeseeng ku sikiyu is menge meginged diyà te Hiruselim su ebpemunuen niw is ebpemeneuven te Megbevayà ne is menge suluguen te Megbevayà he ibpehendiyàn, ebpenulengen niw te watu he edhimetayan niw. Utew zekelà is suat ku pezem he ed-uyemuwen ku sikiyu; ke vâ dà manuk, iring a te upa he edlekupan din is menge piyak

din ne kenè kew ebpelekep. ³⁵Ne guntaan, utew mekevulungbulung heini is simbahan niw su mid-iniyugan kew en te Megbevayà. Su egkegiyen ku he kenà ad maan keniyu egkeahà taman dutun te timpu keuzemà he ebpekekagi kew te, ‘Deliga is nekeuma he midsugù te Nengazen.’ ”

Is Kebewii te Midlevag is Menge Paa Zin wey Menge Velad Din

14 ¹Ne sevaha maan he Andew te Kedhimeley, ne mid-umbite en maan si Jesus te sevaha he pengulu te menge Perisiyu he ziyà ibpekaan te valey zin. Ne is menge kuntada ni Jesus, mibpurungan dan sikandin bentayi ke egkesupak din is kesuguan. ²Ne zuen dutun maama he egkezeruwan su midlevag is menge paa zin wey velad din ne mid-uvey heini ziyà te ki Jesus. ³Ne si Jesus, mid-insaan din is menge menunudlù te kesuguan wey is menge Perisiyu, ke sikandin te, “Sumalà is ibpenurù kenitew te insurat he kesuguan, ebpekesalè ki ve ke ebpemawì ki ke Andew te Kedhimeley?” ⁴Iyan, wazè dan tevaka si Jesus, ne zutun migewezan ni Jesus haazà is egkezeruwan ne zutundutun ne neulian. Ne impeulì sikandin ni Jesus. ⁵Ne zutun migkagi si Jesus diyà te menge etew zutun te, “Hengkey ve is ed-ul-ulahan niw ke zuen niw anak, ne emun kenà, ne vaka niw he egkeulug diyà te mezalem he vudsi emun Andew te Kedhimeley. Siguradu, edtevangen niw minsan ke Andew te Kedhimeley.” ⁶Ne zutun ne wazè dan meketavak.

Is Kenà Kebpelavew

⁷Ne zuen daan dutun menge etew he mid-umbita zaan dutun te Perisiyu. Ne hein ebpememinuu zan en is egkaan ne naahà ni Jesus he ebpien te menge etew is ebpinuuwan dan he meupiya he ebpinuuwan he zutun ibpepinuu is menge lavew he menge etew. Ne tenged kayi impezineg ni Jesus kandan is penurù din, ke sikandin te, ⁸“Emun egkeumbita ki ziyà te keemuran, kenè ki edhuna ebpinuu ziyà te meupiya he ebpinuuwan. Su kela ke zuen pa ebpekeuma he lavew is ked-etew zin kenè ki. ⁹Ne egkegiyan ki zutun te midtukud te keemuran te, ‘Ibपालिन ki su ebpepinuuwan dutun te lavew kenè ki, haazà is mibpinuuwan ta.’ Ne utew ki zutun egkeeled ke ziyè ki ibpepinuu te kenà utew meupiya he ebpinuuwan. ¹⁰Iyan, ke egkeumbita ki ziyà te keemuran, kenè ki ebpemilì te meupiya he ebpinuuwan. Ne emun ebpinuu ki en, diyè ki ebpinuu te kenà utew meupiya he ebpinuuwan. Ne zutun, haazà is midtukud te keemuran, ebpekekagi kenita te, ‘He Geli, kenè ka keniyen mebpinuu su kayi ka pinuu te meupiya he ebpinuuwan.’ Ne zutun, kenè ki egkeeled, kekenà, egketahud ki te menge etew. ¹¹Sikan is etew he ed-isipen din he lavew is pid-etawan din ne ebminusen heini te Megbevayà. Iyan, sikan is etew he ed-isipen din he minus is pid-etawan din ne ebpeketikangen te Megbevayà is pid-etawan din.”

¹²Ne migkagi si Jesus dutun te midtukud te keemuran te, “Ne sikew zaan, Mama, emun edtukud ka te keemuran ne kenè nu iyan dà umbitaha is menge kilala nu wey is menge suled nu wey menge siringan nu he sepijan su sikandan, ne neezenan dan mulà ne edsembayan ke zan ed-umbitaha ke edtukud dan te keemuran ne zutun ebpekeuales dan en te meupiya he mid-ulaula nu kandan. ¹³Iyan, emun edtukud ka te keemuran ne iyan nu umbitaha is egkengeayuayu wey is menge pigket, menge pungkul, wey is menge lakap. ¹⁴Ne emun iyan heini ulaula nu ne utew zekelà is kelipey nu su kenè dan ebpekesambey he ed-umbita kenikew ne kenè dan egkevelesan is meupiya he mid-ulaula nu kandan, ne iyan is Megbevayà ebales kenikew te utew meupiya he egkeulaula zutun keuzemà te kegkengevanhew te menge etew he memeupiya is ulaula.”

Is Sempità Mehitenged te Keemuran

(Lucas 14:15-24; Mateo 22:1-10)

¹⁵Ne is sevaha zutun te menge maama he ebpememinuu ziyà te uvey ni Jesus, hein nezing din haazà is penurù ni Jesus ne migkagi te, “Uteu zekelà is kelipey te menge etew he ebpeketelavuk dutun keuzemà te keemuran he zutun ibpekaan is langun he menge etew he edhedian te Megbevayà!” ¹⁶Ne zutun impezineg ni Jesus kandin is sempità. Ke sikandin te, “Duen sevaha he etew he midtukud te zekelà he keemuran. Ne haazà is etew, ne mezakel is menge etew he mid-umbita zin. ¹⁷Ne hein netuman en haazà is keemuran ne midsugù din is suluguen din he ibpetukew en is menge etew su nengelutù en is igastu. Ne ke sikandin diyà te menge suluguen din te, ‘Kegiyi niw sikandan he medhendini zan en su naandam en is langun!’ ¹⁸Iyan, is menge etew he mid-umbita zin, ne wazà diyà te gehinawa zan haazà is keemuran. Is kada sevaha zutun ne mibpemituwà te kenà ebpeketelavuk dutun. Is duma ne egkagi te, ‘Kenè dà mebmezaat is gehinawa nu kedì su kenà a ebpeketelavuk su zuen tanà he vegu ku pa he nepemasa ne edleuyen ku guntaan.’ ¹⁹Ne is sevaha pa maan dutun ne migkagi te, ‘Kenè dà mebmezaat is gehinawa nu kedì su kenà a ebpeketelavuk te keemuran su zuen sepulù he vaka he sikan ku pa mepemasa ne igezam ku id-edadu!’ ²⁰Ne is sevaha pa he etew zutun, ne egkagi te, ‘Kenà a ebpeketelavuk su sikan pa meipus is kebpeesewaa kediey ne umba kenà a ebpekehendiyan.’ ²¹Ne zutun mid-ulì haazà is midsugù te edtukud te keemuran ne midtudtul zin diyà te egalen din haazà is langun he menge pituwà te menge etew he impeveyaan kandin. Ne haazà is egalen din, ne utew mibmezaat is gehinawa zin. Ne migkegiyan din haazà is suluguen din te, ‘Hendiyè ka te inged ne ikula nu is menge kersada wey menge zalan dutun ne pendumaha nu zini is menge etew he egkengeayuayu, sikan is menge piang, menge pungkul, wey menge lakap.’ Ne zutun midhipanew haazà

is suluguen. ²²Ne hein nekeulì en haazà is midsugù ne migkegiyan din haazà is egalen din te, ‘Nemekeume en is menge etew he impeveyaan nu, iyan, wazè pa meenget heini is baley.’ ²³Ne midtavak haazà is egalen din te, ‘Hendiyè ka te menge unayan wey vuntud ne ikula nu is menge zalan dutun ne tegela nu is menge etew zutun he medtelavuk dan kayi te keemuran ku su wey mepurung meenget te menge etew heini is baley ku. ²⁴Benar is egkegiyen ku kenikew he haazà is nengehuna he mid-umbita ku, ne kenè dan ebpekekaan te minsan deisey zà kayi te gastu ku te keemuran!’ ”

Is Tutuu he Sumusundan ni Jesus
(*Lucas 14:25-33; Mateo 10:37,38*)

²⁵Ne sengeandew zutun te edhipanew si Jesus ne utew mezakel is menge etew he ebpemenduma kandin. Ne midsineruwan din sikandan te egkagi te, ²⁶“Sikan is etew he egkesuat he edsundan kediey, iyan, iyan dekelà diyà te gehinawa zin is ginikanaan din, esawa zin, menge anak din, menge suled din, ne emun kenà, ne iyan dekelà diyà te gehinawa zin is keugelingen din he lawa, ne kenà egkehimu he tutuu sikandin he sumusundan ku. ²⁷Ne iring din ded daan sikan is etew he egkesuat he edsundan kediey, iyan, kenà edtiang te krus din, *he ke và dà egkegiya, egkehandek he edtuman te menge sugù ku su kela ke iyan ibpatey zin, ne kenà daan egkehimu he tutuu sikandin he sumusundan ku.* ²⁸Penenglitan, ke zuen sevaha keniyu he ebevaley te utew metikang he valey, ne zutun te kenè pa sikandin ebpuun ne egkuwintahan din is selapì he egkegastu zin su wey zin metueni ke egkeveleveg din be haazà is baley he ibpehitindeg din wey ke kenà. ²⁹Su emun kenè din egkuwintahan is selapì he igkegastu zin ne kela ke tekew zin en ikepasek is menge tukud ne zutun dà taman. Ne is mezakel he menge etew he ebpekeahà dutun ne ebpemenggemenggemen is edsudì su haazà is baley, ne tekew en tukud he ingkepasek. ³⁰Ne ebpelelelagè dan te, ‘Tumù pa ke wazè en sikandin mebulug mebpasek te ebelayen su kenè din bes egkehimu.’ ” ³¹Ne migkagi si Jesus te, “Iring din ded daan is hadì. Su is hadì he ebpekidtebek te sengehahadì ne kinahanglan he edhuna sikandin ebelansi ke ebpekezaag is sepulù he libu he menge sundaru zin te keluwaan he libu he ebpemekeuma he sundaru te kuntada zin he sengehahadì. ³²Ne emun egkevelansi zin he kenà ebpekesukul is menge sundaru zin, ne meupiya pa ke edsuguen din is menge suluguen din dutun te kuntada zin te meziyù pa is menge sundaru te kuntada zin su wey zan mebpheusayà te wazè pa mekevulug mekedtebek is menge sundaru zan. ³³Ne iring din ded daan,” ke si Jesus, “su sikiyu is edsundan kediey, kenè kew egkehimu he tutuu he menge sumusundan ku emun kenè egkeawà diyà te gehinawa niw is ked-engkezi niw te langun he egkenugunan niw.”

Is Timus he Wazè Din Pulus

(Lucas 14:34,35; Mateo 5:13; Marcos 9:50)

³⁴Ne zutun impezineg ni Jesus is sempità su ibpesavut din he is kedsundan dan kandin ne iring te timus. Ke sikandin te, “Meupiya is timus su ibmeupiya te egkeenen, iyan, ke egkeawà diyà te timus is taam din wazè en paagi he egkehimu te kebpelikua te taam din. ³⁵Ne wazè en iyan pulus din su kenà egkegamit te minsan ebunu he pelambù te tanà ne ed-egkezan dà. Kinahanglan he sevuta niw heini is nezineg niw.”

Is Kerehidu he Netazin

(Lucas 15:1-7; Mateo 18:12-14)

15 ¹Ne zutun he timpu, duen mezakel he menge mekesesalà he etew he menge menunukut te vuhis wey menge mesinupaken te kesuguan, ne nemenhendiyè dan te ki Jesus su ebpeminegen dan is penurù din. ²Ne utew heini ingkeepes te menge Perisiyu wey menge menunudlù te kesuguan he zutun daan, ne ke sikandan te, “Heini si Jesus, ne ebpemekiduma kayi te menge etew he utew mesinupaken te kesuguan tew ne egkaan daan sikandin duma kandan.”

³Ne zutun impezineg ni Jesus kandan heini is sempità, ke sikandin te, ⁴“Penenglitan, is sevaha keniyu ke zuen din nenggatus he ayam he kerehidu, ne netazin is sevaha zutun, hengkey is ed-ul-ulahan din? Siguradu egkeewaan din haazà is kesiyawan wey siyew he ebpemenabtab su ebpengahaan din haazà is sevaha he netazin taman te egketuredu zin. ⁵Ne emun egketuredu zin ne utew sikandin egkelipey. Ne edsepipiyen din haazà su ed-uli. ⁶Ne ke ebpekeuma sikandin diyà te valey zin ne ebpenewagen din is menge zuma zin wey menge siringan din ne ke sikandin te, ‘Edlipey kiw en su neehè ku zed heini is netazin he kerehidu ku.’ ” ⁷Ne ke si Jesus te, “Egkegiyen ku keniyu he iring din ded daan, utew zekelà is kelipey ziyà te langit ke zuen sevaha he mesinupaken he ed-iniyugan din is memezaat he ulaula zin, kenà dutun te kesiyawan wey siyew he menge etew he kunaan dan ke memetazeng is ulaula zan wey kenà kinahanglan he ed-iniyugan dan haazà is mezaat he ulaula zan.”

Is Netazin he Selapì

⁸Ne zuen pa maan sempità he impezineg ni Jesus kandan. Ke sikandin te, “Duen sevaha he vahi he midtipig te sepulù he elad he selapì he mahal su pudu pelata. Hengkey is ed-ul-ulahan din ke egketezinaan haazà te sengeelad? Iyan ed-ul-ulahan din is edhuna edtemtem te sulù. Ne ebpeyupasan din is baley zin, ne ebpurungan din te ebpen-ahà taman te egkeehè din. ⁹Ne emun egkeehè din ne ebpenewagen din is menge zuma zin wey menge siringan din, ne ke sikandin te, ‘Edlipey kiw en su neehè

ku zed heini is selapì he netazin ku.’” ¹⁰Ne migkagi si Jesus med-uman te, “Egkegiyen ku keniyu he iring kayi is kedlipey ziyà te langit te menge velinsuguen te Megbevayà emun duen sevaha he mesinupaken he ed-iniyugan din is memezaat he ulaula zin.”

Is Anak he Midlangyew

¹¹Ne impelaus ni Jesus is egkegiyen din, ke sikandin te, “Duen sevaha he etew he zezuwa is anak din he pudu maama. ¹²Ne migkagi is hazi ziyà te amey zin te, ‘Amà, ivegey nu en kedì is kediey he vahin kayi te menge azen tew.’ Ne iyan dà haazà ne mibahin dutun te amey is menge azen din dutun te zezuwa he vuuk he anak din. ¹³Ne wazà utew meuget dutun ne imbelegyè en dutun te hazi is kandin he vahin ne midhipanew is ed-uwit te selapì din. Diyà sikandin medtandang te meziyù he inged ne zutun migastu zin is selapì din te wazà pulus. ¹⁴Ne zutun naamin is selapì din. Ne nekeuma is utew mepait he vitil zutun te tanà, ne sikandin, wazè din en egkekuwaan te kinahanglan din. ¹⁵Ne midhangyù sikandin te terebahu ziyà te sevaha he meginged dutun. Ne mibegayan sikandin te terebahu he kebpenamak te vavuy ziyà te unayan. ¹⁶Egkesuatan din pezem he mahantey sikandin te minsan ukap dà he idsamak te menge vavuy, iyan, wazà dutun mibegey kandin. ¹⁷Ne hein neuget dutun ne nekepurung sikandin mekeisip-isip. Ke sikandin te, ‘Langun te menge suluguen te amey ku ne idsegkayè dan is egkeenen, iyan, siaken heini, ne egkeumes e en te vitil. ¹⁸Iyan tumù ne ed-uli e zed diyà te amey ku, ne iyan egkegiyen ku ziyà te kandin is: Amà, dekelà utew is salè ku ziyà te Megbevayà wey zini te kenikew te amey ku. ¹⁹Kenà ad dait he ed-isipen nu pa maan he anak nu, kekenà, isipe e zà kenikew he sevaha te menge suluguen nu.’ ²⁰Ne iyan dà haazà neisip din ne zutun midtandang sikandin med-uli.

Ne meziyù pa sikandin ne nepantew en dutun te amey zin. Ne utew nehizu haazà is amey zin he ed-ahà kandin. Ne mibpelelaguy is amey zin he edsinugung kandin ne migkepkepan ne midhezekan sikandin te amey zin. ²¹‘Amà,’ egkagi haazà is kenakan, ‘utew zekelà is salè ku ziyà te Megbevayà wey ziyàn te kenikew te amey ku. Kenà ad dait he ed-isipen nu pa maan he anak nu. Ne himuwe e zà he sevaha te menge suluguen nu.’ ²²Iyan, haazà is amey zin, mid-umew zin is menge suluguen din dutun te valey, ne ke sikandin te, ‘Thatèd niw pa zini sikan is meupiya he ugelingen, ne isun-ud niw ziyà te kandin. Sisingi niw is tezù din wey sun-uzi niw te sepatus is menge paa zin. ²³Ne kuwaa niw sikan is nati he vaka he impelambù ku ne lepaa niw su egkaan kiw ne edlipey kiw. ²⁴Su heini is anak ku, iring te minatey sikandin ne guntaan neuyagan. Netazin sikandin ne guntaan neturedu en.’ Ne zutun nebibu zan.

²⁵Ne haazà maan,” ke si Jesus, “is kakey he anak dutun te etew, diyà sikandin te unayan dan. Ne hein ebpelpelinggume en sikandin is ed-uli

ne nezineg din is edtambur wey is leletepak te paa te ebpemenayew. ²⁶Ne mid-umew zin is sevaha zutun te minge suluguen te amey zin ne mid-insà te, 'Hengkey is igkebibu te minge etew kenyan te valey?' ²⁷Ne midtavak haazà is suluguen te, 'Nekeulì sikan is hazi nu. Ne impelapà te amey nu sikan is nati he impelambù su nekeulì sikandin he wazè ded mekeizi.' ²⁸Ne zutun utew neepes haazà is kakey ne wazà mebpemenahik dutun te valey. Ne zutun mibpenaug haazà is amey zan he ednayùnayù is egkagi ziyà te kandin te, 'Laus ke man dini, Mama.' ²⁹Ne midtavak haazà is anak din te, 'Tenuzi nu, Amà, ke sengemenu is keuget te kedterebahu ku kayi he iring te suluguen nu. Wazè nu egketenuzan he sugù nu he wazè ku peminega te minsan hengkey he timpu. Ne minsan pa zutun ne wazà a kenikew vegayi te minsan kambing dà duen wey a mekelipeylipey zuma te minge emigu ku. ³⁰Iyan, heini is anak nu he nekelaga te minge azen nu tenged te kebpengumpadi zin te minge vahi, ne iyan nu mulà midlepaan te impelambù nu he nati!' ³¹'Mama,' egkagi haazà is amey zin, 'sikew, dini ka mulà layun дума ku. Ne is langun he azen ku, ne kenikew. Ne iyan ka tegigaked te langun. ³²Ne kenè ta egkeegen is kelipey ta, su heini is hazi nu, ne iring sikandin te minatey, ne guntaan neuyagan en. Netazin sikandin, ne guntaan neturedu en.' "

Is Limbungan he Sinerigan

16 ¹Ne impezineg en maan ni Jesus is minge sumusundan din te selakew pa maan he sempità. Ke sikandin te, "Duen sepian he etew he impezumala zin is sevaha he suluguen din te minge ketigeyunan din. Ne zuen daan etew he midsumbung dutun te sepian he haazà is impezumala, ne ebpenggestuwen din is selapì dutun te egalen din. ²Ne hein nezineg haazà dutun te sepian, ne midtawag din haazà is suluguen din ne migkegiyan din te, 'Tutuu heini is sumbung mehitenged kenikew. Iulì nu kediey is langun he insarig ku kenikew su kenè en egkehimu he iyan ka ibpezumala kayi te minge ketigeyunan ku.' ³Ne neisip dutun te suluguen is, 'Id-awè e ves kayi te terebahu ku. Hengkey is meupiya he ed-ul-ulahan ku? Su siak, ne kenè e en ebpekehimu he edterebahu te mevegat iring te kekkalut ne egkeeled a he ebpemumuyù te limus. ⁴A,' ke sikandin, 'iyan heini ed-ul-ulahan ku su wey zuen дума ku he egkepeveyaan ku ke egkeawè e en kayi te terebahu ku.' ⁵Ne zutun midtawag din te tigselibaha is langun he nekeutang dutun te egalen din. Ne ke sikandin diyà te nehuna te, 'Pira is kenikew he utang diyà te egalen ku?' ⁶Ne midtavak haazà is mid-insaan te, 'Nenggatus he lata te lana.' Ne migkagi haazà is suluguen te, 'Heini zed is listahan te utang nu. Pinuu ka kayi ne is insurat nu kayi he utang nu ne ilisi nu te kelimahan dà he lata.' ⁷Ne nekeuma is sevaha zutun. Ne mid-insaan dutun te suluguen ke pira is kandin he utang, ne midtavak sikandin te nengkelibu

he vinevey he trigu. Ne migkegiyan sikandin te suluguen te, 'Heini zed is listahan te utang nu. Pinuu ka kayi ne ilisi nu te walu he gatus dà he vinevey.' ⁸Ne zutun," ke si Jesus, "hein nezing haazà dutun te egalen din ke hengkey is mid-ulaula zutun te suluguen din, ne nekekagi te, 'Hey, utew metau sikandin su ebpenegane en sikandin he zaan te keuyagan din keuzemà.' " Ne ke si Jesus te, "Is menge etew he kenà ebpeming te menge lalag te Megbevayà, utew metau te paagi te kegkezeyzey zan. Iyan, is menge etew he sakup te Megbevayà, kenè dan bes mulà utew metau te paagi wey mezeyzey sikandan keuzemà diyà te langit.

⁹Umba," ke si Jesus, "egkegiyen ku keniyu he gemita niw is ketigeyunan niw zini te kelibutan wey metevangi is egkengeayuayu ne emun egkeuma haazà is timpu keuzemà he kenè niw en egkegamit is menge azen niw, edsuhulan kew te Megbevayà diyà te langit. ¹⁰Benar is egkegiyen ku keniyu he emun egkeserigan ka te zeisek he azen, egkeserigan ka zaan te zekelà he azen. Ne emun limbungan ka te minsan deisek dà, ne wey ke pe be kenà medlimbung duen te zekelè en he ebpegewezan kenikew. ¹¹Emun kenè ka egkeserigan he ibpegawed te menge ketigeyunan he kayi te kelibutan, ne kenè ke en iyan ibpegawed te Megbevayà te menge tutuu he ketigeyunan diyà te langit. ¹²Ne emun kenè ka egkeserigan he ibpegawed te menge azen te zuma, kenè ke en iyan ebegayan dutun te tutuu he azen he ziyà te langit."

¹³Ne mid-uman megkagi si Jesus te, "Is uripen, kenà egkehimu he zezuwa is tegiuripen kandin. Su emun dezuwa is ebayàbayà kandin, edtehuzen din is sevaha ne egkepeukan din is sevaha. Ne emun kenà, ne egkeepsan din is sevaha, ne ebmahalen din is sevaha. Ne iring din ded daan emun iyan mahal ziyà te gehinawa nu is ketigeyunan, su kenà egkehimu he mahal zaan diyà te gehinawa nu is Megbevayà."

Menge Lalag ni Jesus

(Lucas 16:14-18; Mateo 5:31,32; 11:12,13; Marcos 10:11,12)

¹⁴Ne zuen dutun menge Perisiyu he iyan dekelà diyà te gehinawa zan is selapì. Ne hein nezing dan haazà is penurù ni Jesus ne midsumpalit dan sikandin. ¹⁵Ne zutun migkagi si Jesus diyà te kandan te, "Iyan kew sikan is henduen be te meupiya is ulaula ke ziyà te etuvangan te menge etew, iyan, wazà mekeeles te Megbevayà ke hengkey is diyà te isip niw. Is ed-isipen te etew he utew mahal, ne wazè din bali ziyà te Megbevayà.

¹⁶Is kedtumana te kesuguan he imbilinbilin dengan ni Moises wey is kedtumana te menge lalag he insurat te menge ebpeneuven dengan te Megbevayà, ne impesavut heini taman dà te timpu ni Juan Megbebewtismu. Puun dutun iyan ibpesavut diyà te langun he menge etew is Meupiya he Tudtulanen te keagi te ginhedian te Megbevayà. Ne edtegel is minsan hentei wey megaan pezem sikandan mekeseled

dutun te ginhedian. ¹⁷Iyan, kenà egkehimu he edhelinen is kesuguan he imbilinbilin ni Moises. Egkehanew pa is langit wey tanà, iyan, is minsan deisek dà he ibpenurù te kesuguan ne kenà egkehalin.”

¹⁸Ne elin daan migkagi ni Jesus is, ke sikandin te, “Ke zuen maama he ebpengesawa te sengevevahi su mid-engkezan din is esawa zin, ebpekesalà sikandin dutun te mid-engkezan din he esawa. Ne ebpekesalà daan is maama he ebpengesawa zutun te vahi he mid-engkezan te esawa zin.”

Sikan is Sepian Wey si Lazaro

¹⁹Ne mid-uman megkagi si Jesus te, “Duen sevaha he etew he sepian utew. Ne haazà is sepian, utew menge mahal he manggad is idsun-ud din. Ne kada andew ne iyan dà ibpekaan kandin is utew mahal wey metaam he egkeenen. ²⁰Ne zuen daan sevaha he etew he egkeayuayu he egngezanan ki Lazaro. Ne haazà si Lazaro, ne neeneb is lawa zin te vekukang. Ne kada andew zutun ne idhated sikandin te menge zuma zin dutun te vunsuzan te valey zutun te sepian ²¹su ebperateng he ebegayan sikandin te minsan menge mumu zà he egkengeulug dutun te lemisahan te sepian wey mahantey is getek din dutun. Ne is menge asu zutun, ne ebpemendilaan dan haazà is menge vekukang ni Lazaro. ²²Ne wazà utew meuget dutun ne minatey haazà is ayuayu he si Lazaro ne mid-angey sikandin te menge velinsuguen te Megbevayà ne insavuk dan diyà te uvey ni Abraham te kepuun te menge Hudiyu. Ne zutun daan he timpu ne minatey zaan haazà is sepian he etew ne inleveng sikandin. ²³Ne mid-uwit sikandin diyà te Iveyaan. Ne zutun ne utew sikandin nerasey ne hein nekelingahà, neehè din si Abraham, iyan, utew meziyù. Ne neehè din daan si Lazaro zutun te uvey ni Abraham. ²⁴Ne mid-umew sikandin diyà te ki Abraham, ke sikandin te, ‘He Apù Abraham, kehizuwi a kenikew! Ipehengkayi nu pa si Lazaro wey zin egkepetigisi te wahig heini is bèbè ku su utew e en nerasey kayi te hapuy!’ ²⁵Iyan, midtavak ni Abraham haazà is mid-umew te, ‘Apù, tentenuzi nu he hein uuyag ke pa, ne mid-em-eminan nu en is kedlipeylipey nu. Iyan, si Lazaro mulà, ne neem-eminan din en is kemeresayan. Ne guntaan, si Lazaro, edlipayen; ne sikew, edresayan. ²⁶Ne ikezuwa zin daan ne kawangkawang heini is pid-eletan tew. Ne wazà ebpekelayun dini he ebpuun diyan; ne iring din ded daan dini te kenami su wazà ebpekelayun pehendiyen he ebpuun dini.’ ²⁷Ne zutun mid-uman megkagi haazà is sepian te, ‘Ne emun iyan heeyan, Apù, ne iyan dà edhengyuen ku is ipelikù nu si Lazaro ziyà te valey te amey ku ²⁸su zuen lelima he hazi ku he maama. Ne kinahanglan he metueni zan he zaan wey zan kenà mekehendini te ubpeey te ebpenresayan.’ ²⁹Ne midtavak si Abraham te, ‘Duen diyà te kandan menge surat he impesurat te Megbevayà ki Moises wey te ebpemeneuven

te Megbevayà dengan. Egkehimu he ebpeminegen haazà dutun te minge hazi nu.’ ³⁰Ne midtavak haazà is sepian te, ‘Kenè dan, Apù, haazà ebpeminegen, iyan, emun duen minatey he egkevanhew he edhendiyà te kandan, ne ed-iniyugan dan is memezaat he ulaula zan.’ ³¹Ne migkagi zutun si Abraham te, ‘Emun kenè dan ebpeminegen is minge surat ni Moises wey te ebpemeneuven te Megbevayà dengan, kenè dan daan ebpemineg minsan ke zuen egkevanhew he minatey he edhendiyà te kandan.’ ”

Is Ebpekeawà te Kedsarig

(Lucas 17:1-3; Mateo 18:6,7,21,22; Marcos 9:42)

17 ¹Ne zuen migkagi ni Jesus diyà te minge sumusundan din, ke sikandin te, “Kenà egkehimu he wazà igkeawà te kedsarig te etew kedì, iyan kehizu utew te etew he pinaagi kandin egkeawà is kedsarig te minsan hentei he midtuu kedì, su utew mevegat is silut kandin te Megbevayà. ²Meupiya pa ziyà te kandin ke idhiket diyà te lieg din is dekelà he gelingan he vatu ne id-agbur ziyà te lawed te zagat, kenà is silut kandin emun pinaagi kandin egkeawà is kedsarig te minsan sevaha zà kayi te minge vatà. ³Umba, mebpekevantey kew layun!”

Ne migkagi si Jesus med-uman te, “Emun duen duma nu he nekesalà kenikew, ne kegiyi nu wey sembagi nu, ne emun ibmesakit haazà te gehinawa zin ne ebuyù te pesaylu, ne peseyluwa nu. ⁴Ne minsan kepipitu pa sikandin mekesalà kenikew te sengeandew, ne kepipitu zaan sikandin ebuyù te pesaylu ziyà te kenikew, ne peseyluwa nu sikandin.”

Is Kedtuu

⁵Ne migkagi haazà is minge epustul diyà te ki Jesus te, “Hegeta nu is kedtuu zey.” ⁶Ne midtavak si Jesus te, “Emun duen kedtuu nu he minsan iring dà kezekelà te sengevuuk he lisu te mustasa he utew zeisek ne egkekegiyan nu heini is dekelà he kayu te, ‘Awè ka keniyen ne halin ka ziyà te zagat.’ Ne iyan dà haazà, ne ebpezumazuma kenikew.”

⁷Ne migkagi en maan si Jesus te, “Penenglitan, ke zuen suluguen te sevaha keniyu ne iyan baal zin is ed-eradu ne emun kenà ne ed-elima te minge ayam nu. Ne emun sikan pa ed-ulì te mahapun, kenà egkehimu he egkegiyan nu te, ‘Huna ka kaan ne human a.’ ⁸Kenà, su iyan egkegiyen nu is, ‘Penlùlù ke pa ne subai a kenikew wey a mekekaan. Ne wey ka mekekaan ke egkeipas a he egkaan.’ ” ⁹Ne mid-uman megkagi si Jesus te, “Ne haazà is suluguen, ne kenà igkezeligi kandin is kedtuman din su ketengdanan din is kedtuman te minge sugù kandin te egalen din. ¹⁰Ne iring kew zaan dutun. Ne emun egkepasad niw is ebpeveelan keniyu te Megbevayà, ne itagù niw ziyà te isip niw he minge suluguen kew zà te Megbevayà ne midtuman niw zà is minge sugù din keniyu.”

Is Kebewii te Sepulù he It-iten

¹¹Ne zutun te kebpehendiyè en ni Jesus te inged he Hiruselim ne ziyà sikandin mebayà te pid-elangan te minge prubinsya he Semarya wey Geliliya. ¹²Ne nekeuma sikandin diyà te sevaha he inged ne zuen dutun sepulù he maama he it-iten he nemeninugung kandin. Ne tenged te it-iten sikandan wazè dan uvayi si Jesus, kekenà, diyè dan dà te meziyù. ¹³Ne mid-umew zan ki Jesus te, “He Zatù Jesus, ikehizu key kenikew!” ¹⁴Ne hein neehè din sikandan ne migkagi sikandin te, “Hendiyè kew en te minge memumuhat te Megbevayà wey zan maahà he nengeulian kew.” Ne nemenhipanew zan ne zutun te kegenat dan nengeulian segugunà sikandan. ¹⁵Ne is sevaha zutun, hein neehè din he wazè en it-it din, midlikù diyà te ki Jesus is ebpempemensag is edalig te Megbevayà. ¹⁶Ne midluhud diyà te etuvangan ni Jesus ne utew zekelà is kebpeelemati zin kandin. Ne haazà is neulian, ne kenà Hudiyu su tigSemarya he etew. ¹⁷Ne migkagi si Jesus diyà te kandin te, “Kenè be sepulù kew man is nengeulian? Maan is wazà mekelikù is siyew he minge zuma nu? ¹⁸Maan is iyan ke zà is tigSemarya midlikù he edalig te Megbevayà?” ¹⁹Ne migkegiyan ni Jesus te, “Mama, hitindeg ke en ne hipanew kad. Is kedsarig nu te Megbevayà ne iyan nekelibri kenikew te silut.”

Is Kedlikù te Kakey te Menusiyà (Lucas 17:20-37; Mateo 24:23-28,37-41)

²⁰Sengeandew zutun ne zuen minge Perisiyu he mid-insà ki Jesus te, “Keenu egketuman is egkegiyen nu he kedhedii te Megbevayà te menusiyà?” Ne midtavak si Jesus te, “Kenà egkeahà te etew is kegketuman din ²¹su kenà egkehimu he zuen etew he ebpekekagi te, ‘Ahaa niw su heini en!’ Ne emun kenà, ne ‘Dutun sikan is ibpahadì te Megbevayà!’ Su,” ke si Jesus, “diyè dà te gehinawa te etew sikan is kedhedii kandin te Megbevayà ne kenà egkeahà te mata.”

²²Ne migkagi si Jesus diyà te minge sumusundan din te, “Egkeuma is andew he utew zekelà pezem diyà te gehinawa niw he megaan metuman is timpu te kedlikù ku te Kakey te Menusiyà, iyan, kenè pa egkehitavù. ²³Ne emun duen egkagi keniyu he ziyà a is Kakey te Menusiyà te uvey wey ke ziyà a te meziyù ne kenè kew mebpemineg. ²⁴Su is kedlikù ku, ne iring te kilat he ebpeketayew te tivuuk he tanà, ne egkeahà te minsan hentei. ²⁵Iyan, siak is Kakey te Menusiyà, kinahanglan he egkehuna pa egkeuma is kedresaya kedì, wey is kenà kedewata te minge etew te minge penurù ku. ²⁶Ne keuzemà te timpu te kedlikù ku zini te kelibutan, ebpekeiring is minge ulaula te minge etew zutun duen te minge ulaula zengan te minge etew zuen te timpu ni Noe. ²⁷Su zengan te keazen pa ni Noe, iyan dà neisip te minge etew is kegkebibu ne migkaan dan ne

mid-inum dan ne mibpees-eseweey zan taman te midseled ensi Noe zuen te utew zekelà he avang he egngезanan te arka ne hein midlapey is dagat nengelened maamin haazà is menge etew. ²⁸Ne elin daan egkeiringan te timpu te kedlikù ku, is timpu zengan te keazen pa ni Lut. Su zutun wazà rintasi te kegkebibu te menge etew te kebpemengaan wey kebpemenginum. Mibpenigudu zan he ebpmememasa wey ebpmememelegyà wey ebpmememula wey ebpmemevaley. ²⁹Ne haazà he andew te ked-awà ni Lut dutun te inged din he egngезanan te Suduma, is langun he menge etew he meginged dutun, ne nelimas te hapuy wey esupri he mid-ulug te Megbevayà ebpuun te langit. ³⁰Iring ded dutun kegaan is kegketik-ew te kedlikù ku te Kakey te Menusiyà keuzemà.

³¹Ne zutun he andew,” ke si Jesus, “sikan is etew he egkeserengà diyà te gawas te valey zin, ne ziyè pa te seled is menge azen din ne kenè en medseled dutun te valey te kegkuwa te minsan hengkey. Ne iring din ded daan is etew he egkeserengà diyà te pemuleey zin; wazè en kinahanglan he medlikù sikandin diyà te valey zin. ³²Tentenuzi niw ke hengkey is nehitalvù duen te esawa ni Lut. ³³Sikan is etew he egkenugunan din is untung din kenà is kedsundan din kedì, ne nasi kenà ebpekeangkan te untung he wazà pidtemanan. Ne sikan is etew he kenè din egkenugunan is untung din tenged te kedsundan din kedì, ebegayan sikandin te untung he wazà pidtemanan. ³⁴Ne zutun he timpu emun egketuman is kedlikù ku te mezikilem ne ke zuen ebpehulizey he zezuwa he etew ne egkuwaan is sevaha ne is sevaha ne egketagak. ³⁵Ne iring ded daan dutun su ke zuen zezuwa he vahi he ebpeugupà te kebpenggaling, ne egkuwaan te menge velinsuguen ku is sevaha ne egketagak is sevaha. ³⁶Ne iring din ded daan ke zuen dezuwa he etew he ebpeugupey ziyà te pemuleey, su egkuwaan is sevaha ne is sevaha ne egketagak.” ³⁷Ne zutun mid-insà ki Jesus is menge sumusundan din, ke sikandan te, “Hendei heini egkehitavù?” Ne midtavak si Jesus te, “Ke hendei is minatey ne zutun daan is menge tagbis he egkaan te nemahù,” *he ke và dà egkegiya, emun utew en edsubra is kelelalung te menusiyà ne egketuman en is kedlimasa kandan te Megbevayà.*

Is Hangyù te Valu he Vahi

18 ¹Ne zuen en maan sempità he impezineg ni Jesus te menge sumusundan din. Ibpesavut din kandan dutun he kinahanglan he kenè dan bungasa te layun ked-ampù ne kenà daan med-engked he edsarig te Megbevayà. ²Ne ke sikandin te, “Duen huwis diyà te sengeinged; ne haazà is huwis, ne kenà egkehandek te Megbevayà ne wazè din daan kedtahud te minsan hentei he etew. ³Ne zutun te inged ne zuen daan balu he vahi he layun ebpehendutun te huwis su edhangyù he ebpetavang. Ke sikandin dutun te huwis te, “Tevangi a kenikew su wey kenà meileg te

kuntada ku is minge azen ku.’⁴ Ne neuget en haazà he kenà edsegipaan dutun te huwis is hangyù dutun te vahi. Ne geina te neuget en is layun kedlikùlikù dutun te vahi he edhangyù diyà te kandin, ne neisip dutun te huwis is, ‘Minsan wazè ku kehandek te Megbevayà ne wazè ku zaan kedtahud te minsan hentei etawa,⁵ edtevangangan ku nasi heini is bahi su wey mekeengked is ed-uringer kedì.’⁶ Ne ke si Jesus te, “Isipa niw is mid-ulaula zutun te huwis he kenà pezem metazeng is kedhusey zin.⁷ Su emun nehimu he midtevangangan din haazà is bahi, iyan pe be kenà tevangi te Megbevayà sikiyu is minge nengepili din he etew he ebpenigudu ed-ampù diyà te kandin te mezukilem wey maandew.⁸ Egkegiyen ku keniyu he utew megaan is kedtevangi zin keniyu. Kenà ebungasen is Megbevayà he edtavang keniyu. Iyan, keuzemà emun edlikù a is Kakey te Menusiyà dini te kelibutan mezelang dà is etew zutun he neketuu kedì.”

Is Ampù te Perisiyu wey Menunukut te Vuhis

⁹Ne sengeandew maan dutun ne impezineg ni Jesus is sempità. Ne heini is sempità, ne iyan egkesugat is minge etew he kunaan dan ke iyan dan dà memeupiya is ulaula ne edsudien dan is langun he minge zuma he etew.¹⁰ Ne ke si Jesus te, “Duen dezuwa he etew he midhendiyà te zekelà he simbahan he Valey te Megbevayà su ed-ampù dan. Ne is sevaha zutun, ne Perisiyu, ne is sevaha, ne menunukut te vuhis.¹¹ Ne midhitindeg haazà is Perisiyu ne mid-ampù pinaagi te gehinawa zin, ke sikandin te, ‘Megbevayà, ebpeselamat a kenikew su kenà a iring te zuma. Kenà a legezen; kenà a ebpenlimbung; kenè ku edselselaan is esawa ku. Ebpeselamat a zaan kenikew su kenà a iring keniyà te limbungan he menunukut te vuhis.¹² Kezezuwa a edsalang te kegkaan te sengesimana ne ibegey ku ziyà te kenikew is ikesepulù he vahin te langun he egketigeyunan kul’ ke sikandin.¹³ Iyan, haazà is sevaha he etew he menunukut te vuhis, ne mibpekeziyù sikandin is ebpekezuzungul ne egkepenempaling din is kumeng din su utew neseeng. Ne mid-ampù sikandin diyà te Megbevayà he egkagi te, ‘Megbevayà, ikehizu a utew kenikew is sevaha he etew he mekesesalà!’ ”¹⁴ Ne ke si Jesus dutun te, “Benar is egkegiyen ku he haazà is menunukut te vuhis, hein mid-ulì diyà te valey zin ne wazè en isipa te Megbevayà is salè din su nepesaylu en. Iyan, kenà iring dutun haazà is gelbuwen he Perisiyu su is etew he kunaan din ke utew lavew sikandin diyà te etuvangan te Megbevayà, ne ebminusen sikandin te Megbevayà, iyan, is etew he netueanan din he utew sikandin mekesesalà, ne ibpelavew sikandin te Megbevayà.”

Si Jesus wey kes Dezeisey he Menge Vatà

(Lucas 18:15-17; Mateo 19:13-15; Marcos 10:13-16)

¹⁵Ne sevaha maan he andew ne zuen minge etew he mid-uwit dan is minge anak dan he zezeisey pa ziyà te ki Jesus wey zin mezepeneti

te palad din wey mepenubtuvazi. Ne is minge sumusundan ni Jesus, midawey zan haazà is minge etew. ¹⁶Iyan, si Jesus, mid-umew zin diyà te kandin haazà is minge vatà ne ke sikandin diyà te minge sumusundan din te, “Ipehendini niw te kediey heeyan is minge vatà; ne kenè niw zewaya su is etew he zuen din kedsarig he iring te kedsarig te vatà ne iyan ebpekepahadi te Megbevayà. ¹⁷Benar is egkegiyen ku keniyu he ke zuen etew he kenà iring is kedsarig din te Megbevayà te kedsarig te zezeisey he vatà, ne kenà egkehedian haazà is etew te Megbevayà.”

Sikan is Sepian he Egalen

(Lucas 18:18-30; Mateo 19:16-30; Marcos 10:17-31)

¹⁸Ne zuen timpu he zuen sevaha he punuan he Hudiyu he mid-insà ki Jesus te, “He Zatù, utew meupiya is minge ulaula nu. Hengkey is ed-ul-ulahan ku wey a mevegayi te untung he wazà pidtemanan?” ¹⁹Ne midtavak si Jesus, ke sikandin te, “Maan is egkagi ka he meupiya is ulaula ku su sebsevaha zà is meupiya is minge ulaula zin ne iyan is Megbevayà. ²⁰Netuenan nu sikan is minge sugù te Megbevayà he imbilinbilin kenitew he iyan is: kenè nu selselai is esawa nu; kenè ka mebunù; kenè ka mebpenakew; kenè ka medtarùtarù diyà te hukmanan; ne tehuza nu is amey nu wey iney nu.” ²¹Ne midtavak haazà is maama ziyà te ki Jesus, ke sikandin te, “Menunudlù, is langun keniyau, mibenteyanan ku ne wazè ku nesupak puun pa te vatè e pa.” ²²Ne hein nezineg ni Jesus haazà, migkegiyan din te, “Duen nu pa kurang; iyan is: uli ka ne ivelegyè nu is langun he azen nu, ne is halin, ipemegey nu ziyà te egkengeayuayu ne edsepian ka ziyà te langit. Ne ke egkeipus nu heeyan, likù ka zini wey ka mekesundan kediey.” ²³Ne hein nezineg dutun te etew is sambag ni Jesus ne utew mibmesakit is gehinawa zin su zekelà is ketigeyunan din.

²⁴Ne zutun midtengtengan sikandin ni Jesus ne ke si Jesus te, “Utwew meregen te sepian he etew is kebpesakup din te Megbevayà wey mehedii sikandin te Megbevayà. ²⁵Kenè din egkehimu su melemu pa te langgam he kemilyu is kedseled din diyà te vudsi te ragam, kenà te sepian he etew te kebpesakup din te Megbevayà wey sikandin mehedii.” ²⁶Ne hein nezineg heini te minge etew, ke sikandan te, “Ne emun kenà egkehimu te sepian ne kenè bes egkehimu te minsan hentei is ked-angken te untung he wazà pidtemanan.” ²⁷Ne midtavak si Jesus te, “Kenà iyan egkehimu te etew, iyan, egkehimu mulà te Megbevayà he mevegayi sikandan te untung he wazà pidtemanan su egkehimu zin is langun.”

²⁸Ne zutun migkagi si Pedro te, “Sikami, mid-ewaan dey is langun he minge azen dey wey key mekesunud kenikew.” ²⁹Ne ke si Jesus te, “Benar is egkegiyen ku he emun duen etew he mid-ewaan din is baley zin, is esawa zin, is minge suled din, is minge ginikanaan din, wey is

menge anak din su wey zin ikepesavut te minge etew is kedhedii kandan te Megbevayà, ³⁰ne utew zekelà is suhul te Megbevayà kandin te kemulu pa sikandin dini te kelibutan ne keuzemà te timpu te kedhukum te Megbevayà, ebegayan sikandin te untung he wazà pidtemanàn.”

Is Iketelu he Kegkegiya ni Jesus te Kemetayen Din
(*Lucas 18:31-34; Mateo 20:17-19; Marcos 10:32-34*)

³¹Ne zutun migkegiyan ni Jesus haazà is sepulù wey zezuwa he minge sumusundan din he medtapid dan ne ke sikandin dutun te, “Netuenan niw he edhendiyè kiw te inged he Hiruselim ne emun ebpekeuma kiw zutun ne sikan is langun he insurat he nengetagnà te ebpemeneuven dengan te Megbevayà mehitenged kedì, ne egkengetuman en. ³²Siak is Kakey te Menusiyà, ne ibpalad a ziyà te minge etew he kenà minge Hudiyu ne haazà he minge etew, ne edsumpeliten e zan, ed-el-elezen e zan, ne ebpengilevan e zan. ³³Ebugelen e zan, ne human e zan edhimetayi. Iyan, seled te tetelu he andew zutun ne ebenhawen a te Megbevayà,” ke si Jesus. ³⁴Iyan, haazà is minge sumusundan din, ne wazè dan mekesavut dutun te egkegiyen din. In-eles kandan haazà is kehulugan dutun ne wazè dan metueni ke hengkey haazà is ibpesavut kandan ni Jesus.

Is Kebewii Zuen te Lakap
(*Lucas 18:35-43; Mateo 20:29-34; Marcos 10:46-52*)

³⁵Ne hein uvey zan en diyà te inged he Hiriku ne zuen dutun lakap he ebpimpinuu ziyà te kilid te zalan ne iyan dà baal zin is edtepayà su ebpemumuyù te limus. ³⁶Ne hein nezineg dutun te lakap is dabekdabek te mezakel he minge etew he edsagad ne nekeinsà ke hengkey en haazà. ³⁷Ne zuen migkagi ziyà te kandin te, “Iyan si Jesus he tigNeserit is edsagad.” ³⁸Ne hein nezineg din haazà, ne mid-umew sikandin te, “He Jesus he kevuwazan te hadì dengan he si David, kehizuwi a kenikew!” ³⁹Ne haazà is minge etew he edhuhuna ki Jesus, ne midawey zan haazà is etew wey med-engked sikandin, iyan, nasi en ebpekezaging sikandin he egkagi te, “He kevuwazan te hadì dengan he si David, kehizuwi a kenikew!” ⁴⁰Ne zutun midteren si Jesus ne migkagi he iphendutun te kandin haazà is lakap. Ne hein impeetuvang dan en ki Jesus ne migkagi si Jesus te, ⁴¹“Hengkey is egkesuatan nu he ebeelan ku?” Ne midtavak haazà is lakap te, “Iyan egkesuatan ku is: mekeahà is minge mata ku.” ⁴²Ne migkagi si Jesus te, “Mekeehè ke en; is kedsarig nu kediey, ne iyan igkeulii te minge mata nu.” ⁴³Ne segugunà nekeahà haazà is lakap. Ne zutun midumazuma en sikandin ki Jesus is utew nekezalig te Megbevayà. Ne haazà is minge etew he nemekeahà dutun, ne nemekezalig dan daan te Megbevayà.

Is Ked-iniyugi ni Sekiyu te Mezaat he Ulaula

19 ¹Ne nekeuma ensi Jesus diyà te inged he Hiriku ne zutun dan ebayà su edlaus dan pa. ²Ne zuen dutun maama he tigHiriku he egngезanan ki Sekiyu. Ne haazà si Sekiyu, ne iyan egalen te menge menunukut te vuhis dutun; ne sepiàn daan utew sikandin. ³Egkesuat pezem sikandin he mekeahà ki Jesus, iyan, kenè din egkeahà geina te nepurung en si Jesus melinguti te menge etew ne mevavà daan he etew si Sekiyu. ⁴Ne iyan mid-ulaula ni Sekiyu is: mibpelelaguy ziyà te egkehunaan ne mibpemenahik te kayu he egngезanan te sikemur he egkesegazan ni Jesus su wey zin mepurungi te ed-ahà si Jesus ke edsagad dutun. ⁵Ne hein nekeuma si Jesus dutun te puun te kayu he mibpemenehikan ni Sekiyu ne midteren ne midlingahà ne ke sikandin te, “He Sekiyu, gaanggaan ke en penaug keniyàn su kinahanglan he ziyàn a ebpemenahik te valey nu guntaan.” ⁶Ne zutun ne migaanggaan mebpenaug si Sekiyu ne midlimùlimù ki Jesus he utew egkelipey. ⁷Ne hein nezineg haazà te menge etew is lalag ni Jesus diyà te ki Sekiyu ne wazè dan mesuati ne pesikagi sikandan te, “Maan is ebpemenahik si Jesus diyà te valey te etew he utew mesinupaken te Megbevayà?” ⁸Ne si Sekiyu, hein nekeuma zan engki Jesus diyà te valey zin ne midhitindeg sikandin is egkagi te, “Ibegey ku is ketengà kayi te ketigeyunan ku ziyà te menge ayuayu. Ne minsan hentei he etew he nelimbungan ku zengan, ne id-uli ku ziyà te kandin is keheepat egketakep haazà is nekuwa ku.” ⁹Ne migkagi si Jesus diyà te kandin te, “Sikew wey menge zuma nu zini te valey, edlibriyen kew guntaan te Megbevayà te silut tenged te menge salè niw su mid-iringan niw guntaan is kepuun niw he si Abraham su midtuu kew te Megbevayà. ¹⁰Ne siak is Kakey te Menusiyà, iyan inhendini ku te kelibutan su wey ku melibri te silut is langun he nemekesuwey te hustu he ibayà.”

Sikan is Tetelu he Sinerigan (Lucas 19:11-27; Mateo 25:14-30)

¹¹Ne haazà is menge etew he nemekezineg dutun te menge lalag ni Jesus, impezineg din pa kandan is sempità. Uvey zan en te inged he Hiruselim ne tenged dutun kunaan te menge etew ke ebpuunè en si Jesus edhadì. ¹²Ne tenged dutun migkagi zin heini is sempità. Ke sikandin te, “Duen sevaha he prinsipi he midtawag te lavew he hadì diyà te sengeginhedian su edhimuwen sikandin he hadì dutun te kandin he inged. Ne emun egketapus haazà ne human ebpekeulì. ¹³Ne hein megaan en sikandin edhipanew pehendiyà te sengeginhedian, mid-umew zin is sepulù te menge suluguen din ne kada sevaha zutun, mibegayan din te selapì. Ne noked-iiring is kezekelà te selapì he imbegey zin te kada

sevaha. Ne migkagi sikandin diyà te kandan te, 'Heini ve is selapì he ibpiyal ku keniyu, ne iyan kew en metau te ked-iseg din kedekelà taman te kenè e pa ebpekeulì dini,' ke sikandin. ¹⁴Iyan, is menge meginged dutun te inged te prinsipì, ne ingkees dan sikandin, ne hein migenat en, duen midsugù dan he ibpetelukun kandin wey zan ikepesayud is lavew he hadì dutun te ebayaan te prinsipì he kenè dan igkesuat he iyan mekehadì kandan haazà is prinsipì.

¹⁵Ne minsan pa zutun nehimu gihapun he hadì haazà is prinsipì ne zutun te kebpekeulì din ne segugunè din mid-umew sikan is sepulù he impetipig din te selapì su ed-ahaan din ke sengemenu is uswag te selapì te kada sevaha. ¹⁶Ne migkagi is nehuna te, 'Hadì, kesepulù metakep is selapì nu.' ¹⁷Ne midtavak haazà is hadì te, 'Uteu meupiya heeyan. Megied ke ves iyan. Ne geina te egkeserigan ka te minsan deisek he selapì ne iyan suhul ku kenikew is iyan ku sikew ibpezumala te sepulù he inged.' ¹⁸Ne migkagi haazà is ikezuwa he suluguen te, 'Hadì, kelelima metakep is selapì nu.' ¹⁹Ne midtavak haazà is hadì te, 'Iyan ku sikew ibpezumala te lelìma he inged.' ²⁰Ne zutun mid-uvey haazà is iketelu he suluguen ne ke sikandin te, 'Heini zed sikan is selapì nu he impiyal nu kedì. Midtegtagaman ku tengesa ne intagù ku ²¹su ingkehandek ku sikew, su is egkekagi nu ne idtegel nu, ne ebperateng ka te uswag te ibpiyal nu te zuma nu. Ne iring ded daan te ibpepemula nu su ebperetengen nu is abut.' ²²Ne midtavak haazà is hadì te, 'Lalung ke ves he suluguen! Heeyan dà te menge lalag nu ne mibpesavut he nekesalè ke en kediey. Su netuenan nu ves he is egkekagi ku, ne idtegel ku, ne is ibpiyal ku, ne ebperetengen ku is uswag din, ne is ibpepemula ku ne ebperetengen ku is abut din. Ne utew venar heeyan. ²³Ne maan is wazè nu ipeutang is selapì ku wey mebpursintuwi wey medekelà is egkekuwa ku kayi te kedlikù ku?' ²⁴Ne zutun migkagi haazà is hadì diyà te menge etew he ebpemenhithitindeg dutun te, 'Kuwaaw niw is selapì diyà te kandin ne ivegey niw ziyà te nekepeuswag te kesepulù metakep!' ²⁵Ne migkagi zan te, 'Duen en kandin su kesepulù metakep sikan is uswag te impetipigan nu kandin.' ²⁶Ne midtavak haazà is hadì te, 'Benar is egkegiyen ku keniyu he sikan is egkeserigan te insarig kandin, ed-umanan pa. Iyan, sikan is kenà egkeserigan, edhewien pa ziyà te kandin minsan is deisek he insarig kandin.' ²⁷Ne mid-uman megekagi haazà is hadì te, 'Ne sikan is menge etew he kenè dan egkesuat he iyan a mekehadì kandan, ne uwita niw zini ne penhimetayi niw sikandan dini te etuvangan ku.' "

Is Kedhendiyà ni Jesus te Hiruselìm

(Lucas 19:28-40; Mateo 21:1-11; Marcos 11:1-11; Juan 12:12-19)

²⁸Ne hein neipus ni Jesus te egkagi haazà is sempità ne midlaus dan is edhipanew petekezeg diyà te Hiruselìm. ²⁹Ne hein uvey zan en

diyà te inged he Bitpagi wey ziyà te inged he egngезanan te Bitanya he ebpeketekezeg dutun te vuvungan he egngезanan te Ulivuwan, ne midsugù ni Jesus is dezuwa te menge sumusundan din. ³⁰Ke sikandin te, “Hendutun kew te inged he egkeumahan tew ne emun ebpekeuma kew zutun, ne egkeehè niw is intagkes he asnu he nati he wazè pa meuntuзи. Hekazi niw ne uwita niw zini. ³¹Ne ke zuen ed-insà keniyu ke maan is edhekazan niw, kagi kew te, ‘Egkinehnglanen heini te Nengazen tew he si Jesus.’” ³²Ne haazà is midsugù din, hein nekeuma zan dutun ne wazè en medhehelinà sumalà is nekagi ni Jesus. Ne neehè dan haazà is asnu zutun. ³³Ne hein edhekazan dan en haazà is asnu ne migkagi is menge tegigaked dutun te, “Maan is edhekazan niw heeyan?” ³⁴Ne midtavak dan te, “Egkinehnglanen heini te Nengazen tew he si Jesus.” ³⁵Ne zutun mid-uwit dan diyà te ki Jesus haazà is asnu. Ne mibelhenan dan haazà te menge kumbalè dan ne impeuntud dan sikandin. ³⁶Ne zutun tenged te ibpaahà te menge etew is dekelà he kedtahud dan ki Jesus, impendempas dan is menge impenamput dan diyà te ibayè din. ³⁷Ne hein edtupang dan en dutun te vuvungan he Ulivuwan su uvey zan en diyà te inged he Hiruselim, ne langun dutun te menge sumusundan din he nemenduma kandin, utew zan nengelipey he edhabet edalig te Megbevayà tenged te langun he nengeehè dan he menge egkengein-inuwan he mibeelan ni Jesus. ³⁸Ke sikandan is edalig te, “Deliga is hadi he ebpekeuma he midsugù te Nengazen! Melinew en is kedepitè tew te Megbevayà! Deliga is Megbevayà diyà te langit!”

³⁹Ne zutun te mezakel he menge etew he nengetigum dutun, duen menge Perisiyu. Ne migkagi zan diyà te ki Jesus te, “Dewaya nu heeyan is menge sumusundan nu.” ⁴⁰Ne zutun midtavak si Jesus te, “Kenà egkehimu su emun ed-engked dan is ebpendalig ne iyan edsambey he ebpendalig is langun keniyan te menge watu *su utew kinahnglan guntaan he zuen ebpendalig.*”

Is Hizu ni Jesus te Menge TigHiruselim

⁴¹Ne midlaus ensi Jesus pehendutun te inged he Hiruselim ne hein neehè din en haazà is inged ne midsinegawan din su utew sikandin nehizu te menge meginged dutun. ⁴²Ke sikandin te, “Angin pezem ke netuenan niw zà ke hengkey is hustu he ed-ul-ulahan su wey zuen kelinew ziyàn te inged niw, iyan, kenè niw en guntaan egketuenan! ⁴³Ne zuen andew he zutun egkeumahan kew te menge kuntada niw ne egkelingutan kew ne edtebeken kew zan ne kenè kew ebpekegawas dutun. ⁴⁴Ne edèdeetan dan is menge valey niw wey kutè niw ne langun niw te menge etew, ne egkegerà ne wazà edresik keniyu. Ne is menge watu he imbevaley keniyàn, wazà minsan sevaha he ebpekeuntud diyà te sevaha su egkewagey is langun. Ne egkeulaula heini su wazè niw segipaa he iyan heini sikan is timpu te kegkehizu keniyu te Megbevayà.”

Is Kedseled ni Jesus Diyà te Valey te Megbevayà

(Lucas 19:45-48; Mateo 21:12-17; Marcos 11:15-19; Juan 2:13-22)

⁴⁵Ne hein nekeuma si Jesus diyà te Hiruselim ne midlaus sikandin diyà te zekelà he simbahan he egnezezanan te Valey te Megbevayà. Ne midseled sikandin dutun ne impemeawè din is menge etew he ebpememelegyà dutun. ⁴⁶Ne ke sikandin diyà te kandan te, “Awè kew kayi su zuen insurat he Lalag te Megbevayà he edhenduen te, ‘Is baley ku, ne egnezezanan he Valey he Elempuanan.’ Ne sikiyu,” ke si Jesus, “nasi niw veeli he ubpeey te ebpememlimbung.”

⁴⁷Igenat dà dutun ne kada andew ne ebpenurù si Jesus dutun te zekelà he simbahan. Ne is menge punuan dutun te menge memumuhat te Megbevayà, wey is menge menunudlù te kesuguan, wey is ebmegurangan te menge Hudiyu, ne egkesuatan dan pezem si Jesus te edhimatey. ⁴⁸Iyan, kenè dan egkegaanggaan te edhimatey sikandin su is langun he menge etew, ne utew zan egkengevenari he ebpememineg kandin.

Is Ketenged ni Jesus

(Lucas 20:1-8; Mateo 21:23-27; Marcos 11:27-33)

20 ¹Ne sevaha he andew zutun ne midlikù si Jesus diyà te zekelà he simbahan he egnezezanan te Valey te Megbevayà ne mibpenurù din is menge etew, ne impesavut din kandan is Meupiya he Tudtulanen. Ne zutun mibeyaana sikandin te punuan te menge memumuhat wey menge menunudlù te kesuguan wey is menge ebmegurangan te menge Hudiyu, ²ne mid-insè dan kandin te, “Heini is langun he ed-ul-ulahan nu zini te simbahan, hengkey is ketenged nu te ked-ulaula kayi, wey hentei is mibegey kenikew te ketenged wey nu meulaula?” ³Ne midtavak si Jesus te, “Duen daan id-insè ku keniyu, ne huna kew tavak te insè ku. ⁴Hentei is mibegey ki Juan Megbebewtismu te ketenged te kebpemewtismu. Megbevayè be wey ke etew zà?” ⁵Ne zutun mibpein-inseey zan is egkagi te, “Emun egkegiyen tew he impenaub ki Juan te Megbevayà ne id-insè din ke maan is wazè tew tuuwi si Juan. ⁶Ne emun egkegiyen tew he isip dà te etew, ne egkepeukan kiw te menge etew. Ne edtulengen kiw zan te watu wey kiw zan mehimetayi su is menge etew, edtuuwan dan he ebpeneuven si Juan te Megbevayà.” ⁷Ne zutun iyan dà ingketavak dan ki Jesus is, “Kenè dey egketuenan.” ⁸Ne migkagi si Jesus diyà te kandan te, “Kenè ku zaan egkegiyen keniyu ke hengkey is ketenged ku te kebaal kayi te langun.”

Is Sempità Mehitenged te Menge Etew he Impeelima te Perasan

(Lucas 20:9-18; Mateo 21:33-46; Marcos 12:1-12)

⁹Ne zutun impezineg ni Jesus te menge etew is sempità su ibpesavut din kandan is keagi te ed-ul-ulahan te Megbevayà. Ke sikandin te, “Duen etew

he zuen din bevesukà he mibpemulaan din te minge gawed he paras. Ne mibpeelimahan din te minge etew ne midhipanew ziyà te sengeginhedian ne neuget sikandin dutun. ¹⁰Ne hein tiragun en dutun, midsugù din is suluguen din diyà te impemeelima zin su wey mevegayi sikandin te vahin din dutun te paras. Iyan, hein nekeuma haazà is suluguen ne mibpemugel zutun te minge ed-elima ne impeuli dan he wazà begayi. ¹¹Ne haazà is tegigaked, midsugù en maan te sevaha pa he suluguen din he impehendutun din te minge impeelima zin. Ne mibpemugel zan ded maan haazà, ne mid-eled-eled dan, ne impeuli dan he wazà daan begayi. ¹²Ne mid-uman en maan medsugù haazà is tegigaked te sevaha pa maan he suluguen din ne mibugel zan en maan haazà taman te nengepelian ne zutun midsegseg dan sikandin. ¹³Ne migkagi haazà is tegigaked te perasan te, ‘Hengkey is ed-ul-ulahan ku? Iyan is: iyan ku en edsuguen is mahal ku he anak su kenè dan egkeaku te ebpesipala sikandin, kekenà, edtehuzen dan.’ ¹⁴Iyan, hein naahà dutun te minge impeelima te perasan haazà is anak te tegigaked ne mibpevitbitiyereey zan te, ‘Na! Iyan en heini sikan is anak din; kuwa kew en su edhimitayan tew ne iyan kiw ebpekeangken kayi te perasan!’ ¹⁵Ne migewezan dan ne mid-uwit dan diyà te gawas te perasan ne midhimitayan dan.”

Ne zutun migkagi med-uman si Jesus te, “Ne geina te iyan haazà mid-ulaula zutun te impemeelima te perasan, hengkey is ed-ul-ulahan kandan dutun te tegigaked? ¹⁶Iyan is: ebayaan din haazà is minge etew ne ebpenhimitayan din, ne ebpeelimahan din haazà is perasan din te selakew en maan he minge etew.” Ne hein nezineg dutun te minge etew he ebpeming ki Jesus ne utew zan neseeng ne ke sikandan te, “Kenà heeyan ed-ul-ulahan te Megbevayà!” ¹⁷Iyan, midtengtengan ni Jesus sikandan ne ke sikandin te, “Emun iyan egkeisip niw he kenà heini ed-ul-ulahan te Megbevayà hengkey is kedsevuta niw zuen te insurat dengan he Lalag te Megbevayà he edhenduen te,

‘Sikan is batu he idhiman te valey,
mid-engkezan te minge pandey su kunaan dan ke wazè din pulus,
iyan, nehimu heini guntaan he watu he iyan dà ebpekepurung te valey.’ ”

Ne impelaus ni Jesus is lalag din te, ¹⁸“Ne haazà he watu, ne emun egkeulugan te etew ne egkepurung egkerupet is egkeulug dutun. Iyan, ke zuen etew he egkeulugan dutun te watu ne egkepurung egkeapug is lawa zutun te egkeulugan.”

Is Kebayad te Vuhis Diyà te Hadi te Ruma
(*Lucas 20:19-26; Mateo 22:15-22; Marcos 12:13-17*)

¹⁹Ne zutun, is minge menunudlù te kesuguan wey minge punuan te minge memumuhat te Megbevayà, nesavut dan he iyan din sikandan

egkegiyen dutun te sempità, ne ed-isipen dan dutun pezem edekepa si Jesus, iyan, nahandek dan te mezakel he menge etew. ²⁰Umba, puun dutun ne ebpengahaan dan ke ebmenmenuwen dan te kedekepa sikandin. Duen menge sinuhulan dan he ibpepeniid dan ki Jesus. Ne zuen daan menge insà kayi te etew ki Jesus he uvag kun menge hustu he insà. Ne iyan tuyù dan is: emun ebpekesupak si Jesus te kesuguan dan pinaagi te menge tavak din ne egkehimu he ibpalad sikandin diyà te gubirnedur he Rumanu wey mehukumi sikandin. ²¹Ne haazà is menge etew he ibpepeniid ki Jesus, migkagi zan diyà te kandin te, “He Zatù, netuenan dey he wazè nu ibpelavi he minsan hentei he etew ne tutuu is egkegiyen nu wey hustu is kebpenurù nu te ebpeveelan kenitew te Megbevayà. ²²Hengkey is isip nu? Ebpekesupak ki ve te kesuguan tew ke ebayad ki te vuhis diyà te hadi tew ziyà te inged he Ruma?” ²³Ne netuenan ni Jesus is mezaat he ed-ul-olahan dan ne ke sikandin diyà te kandan te, ²⁴“Ipeehè niw kediey is selapi he ibayad niw te vuhis.” Ne hein naahà ni Jesus haazà ke sikandin te, “Hentei ki zagwey kayi wey hentei ki ngazan heini is nekesurat kayi?” Ne ke sikandan te, “Dagwey wey ngazan te hadi diyà te inged he Ruma.” ²⁵Ne ke si Jesus te, “Ne emun kandin, ne iyan egkesuatan din, ivegey niw ziyà te kandin; ne ivegey niw zaan diyà te Megbevayà is kandin he azen.” ²⁶Ne haazà is menge etew he ibpepeniid ki Jesus, wazè dan dutun te etuvangan te menge etew negewezan te intavak ni Jesus he igkehimuwa zan kandin te edakep. Umba, wazè en nekagi zan, ne utew zan nengeinuinu te tavak din kandan.

Is Ketudluanan Mehitenged te Kegkevanhew
(*Lucas 20:27-40; Mateo 22:23-33; Marcos 12:18-27*)

²⁷Ne zutun mid-uvay ziyà te ki Jesus is menge Sedusiyu. Ne is menge Sedusiyu, iyan kes menge Hudiyu he edtuu he kenà egkengevanhew keuzemà is minsan hentei. Ne migkagi zan diyà te ki Jesus, ²⁸ke sikandan te, “Menunudlù, impenurù dengan ni Moises he penenglitan, ke zuen maama he zuen din esawa ne ebpatay haazà is maama he wazà mevuwad, kinahanglan he ebpemeluwen te suled dutun te maama haazà is ipag din su wey mevuwad haazà is minatey pinaagi kandin. ²⁹Ne zengan duen pitu he menge maama he teltelehazi. Mibpengesawa haazà is kakey, iyan, minatey he wazà med-anak. ³⁰Ne mibpemalu zutun te ikezuwa haazà is ipag dan ne minatey zaan he wazà mevuwad. ³¹Ne iring din ded daan haazà is iketelu. Ne henduen dà duen su naamin haazà is pitu ikevalu zutun te vahi ne wazà mevuwad. ³²Ne te huziyan dutun minatey zaan haazà is bahi. ³³Ne keuzemà te kegkevanhew te menge etew, hentei is hustu he esawa zutun te vahi? Su haazà is pitu he teltelehazi, pudu zan man nekeesawa kandin.”

³⁴Ne migkagi si Jesus te, “Is menge etew kayi te kelibutan, ne ebpees-eseweey, ³⁵nyan, haazà is menge etew he ed-isipen te Megbevayà he zait

he ebenhawen he ibpeubpà diyà te langit, kenè dan mulà keuzemà diyà te langit ebpees-eseweey. ³⁶Iyan dan kenà ibpees-eseweey su iring dan en te menge velinsuguen te Megbevayà ne kenè dan en ebpatey. Menge anak dan en te Megbevayà su nevanhew zan en. ³⁷Ne pinaagi te insurat dengan ni Moises, egkesavut ta he egkengevanhew is menge minatey *su minsan te neuget en dutun he minatey si Abraham, si Isaak, wey si Hakub*, dutun te insurat ni Moises mehitenged te sagbet he egkeregreg migkagi sikandin he is Megbevayà, ne iyan ed-ezapen ni Abraham wey si Isaak wey si Hakub, ³⁸*he ke vâ dà egkegiya, kemulu zan pa ed-ezapen is Megbevayà, minsan te minatey zan en*. Su is langun he menge minatey, kemulu zan pa uuyag diyà te Megbevayà.” ³⁹Ne zutun migkagi is duma he menge menunudlù te kesuguan, ke sikandan te, “Uteu venar heeyan is migkagi nu.” ⁴⁰Umba nekagi zan heini su kenè dan en ebpekesukul pa maan he ed-insà ki Jesus.

Is Hadì he Mibpili te Megbevayà he Kevuwazan ni David
(*Lucas 20:41-44; Mateo 22:41-46; Marcos 12:35-37*)

⁴¹Ne migkagi si Jesus diyà te kandan te, “Maan is egkehimu he ibpenurù te menge menunudlù te kesuguan he sikan is edtegezan he ibpahadì, ne kevuwazan dà ni Hadì David? ⁴²Su ziyà te libru he Salmo, duen insurat ni Hadì David he edhenduen te,

‘Migkagi is Megbevayà diyà te Nengazen ku te,

‘Kayi ka pinuu te zapit te egkekewanan ku

⁴³taman te kenè ku pa ibpeluhud diyà te kenikew
is menge kuntada nu.’ ’ ’

⁴⁴Ne impelaus ni Jesus haazà is lalag din, ke sikandin te, “Emun migkagi ni David he Nengazen din sikan is ebperetengen he ibpahadì, ne egkehimu ve he kevuwazan dà duen ni David?”

Is Menge Etew he Uvag Edsunud te Megbevayà
(*Lucas 20:45-47; Mateo 23:1-36; Marcos 12:38-40*)

⁴⁵Ne zutun te kemulu pa ebpemineg te lalag ni Jesus haazà is mezakel he menge etew, ne ke sikandin diyà te menge sumusundan din te,

⁴⁶“Andam kew limbe wey kew kenà mekeiring te menge menunudlù te kesuguan su iyan dà egkesuatan dan is kedhiphipanew he memelayat is kemisula he edtehuzen sikandan te menge etew emun diyè dan te mirkadu. Ne emun diyè dan te simbahan egkesuatan dan he iyan sikandan ibpepinuu ziyà te ebpepinuwan te lavew he menge etew. Ne egkesuatan dan daan he utew zan metahud ke edtelavuk dan te keemuran. ⁴⁷Ne heini is menge menunudlù te kesuguan, edlimbungan dan is menge valu he vahi wey zan maangken is menge valey zutun te menge vahi. Ne utew melugayad is ked-ampù dan he iyan idtambun

dan te mezaat he vaal zan. Utew edekelà is silut te Megbevayà kandan keuzemà.”

Is Halad Duen te Valu he Vahi
(*Lucas 21:1-4; Marcos 12:41-44*)

21 ¹Naahà ni Jesus is minge sepian he etew he ed-ulug te halad dan diyà te teleguey te halad he selapì. ²Ne naahà daan dutun ni Jesus is sevaha he vahi he valu he utew egkeayuayu ne iyan dà in-ulug dutun te vahi is dezuwa he sintabus. ³Ne migkagi zutun si Jesus diyà te minge zuma zin te, “Benar is egkegiyen ku he heeyà is balu he vahi, ne sumalà is ked-isipa te Megbevayà, utew lavew is inhalad din te langun he inhalad kayi te zuma he minge etew, ⁴su is minge zuma he nemenhalad kayi, subra zà te ketigeyunan dan is inhalad dan, iyan, heeyà is egkeayuayu he vahi, minsan pa te edlisedlised sikandin te igkeuyag-uyag din ne inhalad din is namànamè en he ketigeyunan din.”

Is Egkeuma he Minge Pesipala
(*Lucas 21:5-24; Mateo 24:1-28; Marcos 13:1-23*)

⁵Dutun te minge zuma ni Jesus duen egkagi ziyà te kandin he utew mekempet haazà is simbahan he Valey te Megbevayà su midezeyanan pinaagi te minge mahal he minge watu he imbevaley zutun wey pinaagi te utew meupiya wey mahal he minge inhalad te minge etew ziyà te Megbevayà. Ne zutun migkagi si Jesus te, ⁶“Egkeuma is andew he langun kayi te egkeehè niw ne egkezeetan. Wazà keuzemà minsan sevaha he watu he ebpekeuntud diyà te sevaha su egkewagey heeyan is langun he watu; wazà egkesamà keniyen te nesevukan din su is langunlangun keniyen ne egketempag.”

⁷Ne mid-insaan dan si Jesus, ke sikandan te, “Datù, kegiyi key ke keenu egkehitavù heini is langun wey ke hengkey is egkeulaula he tuus he iyan en timpu he egketuman heini is langun he migkagi nu geina?”

⁸Ne midtavak si Jesus te, “Mebpekevantey kew wey kew kenà mekesundan te teruen he etew su mezakel is ebpemenlepew he egamit te ngazan ku he egkagi is kada sevaha zutun he iyan sikandin sikan is mibpili te Megbevayà he ibpahadi. Ne egkagi zaan te, ‘Iyan en heini timpu te kedlimasa te Megbevayà te menusiya,’ ke sikandan. Iyan, kenè niw tuuwi su tarù. ⁹Ne emun egkezineg niw ziyà te uvey niw is megurub tenged te gira ne egkezineg niw zaan is tudtul te minge gira ziyà te meziyù he tanà ne kenè kew mahandek su kinahanglan he egkeulaula is iring kayi, iyan, kenà iyan heini tuus he egketapus en heini is timpu.” ¹⁰Ne mid-uman mekgagi si Jesus te, “Su ebpekidtebek is sengeinged te zuma zin he inged, ne egira is sengeginhedian te zuma zin he ginhedian. ¹¹Egkehitavù diyà te minsan hendei is minge mezesen he linug wey mepait he vitil ne ziyà

te mezakel he minge inged ebpekeeneb is daru. Ne zuen egkeehè niw he utew igkeinuinu wey mekehandekhandek he singyal he ebpuun te langit.

¹²Iyan, kayi te kenè pa heini egketuman ne edekepen kew te minge etew ne ebpesipelahan kew zan. Ibpeetuvang kew zan te minge punuan te minge simbahan te minge Hudiyu ne egkestiguwen kew zan. Ibpeetuvang kew zaan te minge hadi wey minge gubirnedur tenged te kedsundan niw kediey. ¹³Iyan en heini paagi te kebpekepesavut niw te Meupiya he Tudtulanen. ¹⁴Hegeta niw is isip niw he zaan he kenè kew mesemuki ke hengkey is idtavak niw te minge insè dan keniyu. ¹⁵Su iyan e en metau te idtavak niw te minge insè dan. Ne ibegey ku zutun keniyu is ketau te ked-isip-isip wey kew meketavak. Ne zutun haazà is minge kuntada niw, kenè dan ebpeketavak te ketezengan niw ne kenè dan daan ebpekepegintarù te tutuu he egkegiyen niw. ¹⁶Ne zutun he timpu minsan is minge ginikanan niw, is tempezè niw en te pused, is minge kezuzumahi niw, wey is minge emigu niw, ne ebpalad dan keniyu ziyà te minge hukmanan. Ne zuen duma keniyu he egkehimetayan dan. ¹⁷Egkuntedahan kew te langun he minge etew tenged te sumusundan ku sikiyu. ¹⁸Ne minsan pa zutun, wazà egkelaga ziyà te keniyu. ¹⁹Hamen kew is edsarig kediey su pinaagi kayi egkeangkan niw is untung he wazà pidtemanana.”

²⁰Ne mid-uman megkagi si Jesus te, “Ne emun egkeehè niw heini is inged he Hiruselim he egkelingutan en te minge kuntada niw he sundaru ne egketuenan niw he megaan en egkezeeti. ²¹Ne zutun, sikan is minge etew he zini te prubinsya he Hudiya, ne mebpelaguy zan pehendiyà te minge vuntud. Ne is minge etew kayi te inged he Hiruselim, ne kinahanglan he mebpelaguy zan daan. Ne sikan is minge meginged te minge unayan dini te uvey, ne kenè dan med-aput dini te inged. ²²Su iyan en haazà sikan is timpu he netagnà dengan he zutun edsilutan te Megbevayà is minge kuntada zin he etew. Ne insurat heini zuen te ebpemeneuven dengan te Megbevayà. ²³Ne zutun he andew, kehizu utew te minge vahi he memeingey wey ebpemenlegimu *su utew zan egkengeregenan he ebpelaguy!* Utew gerabi he kemeresayan is egkehitavù kayi te inged su edsilutan en te Megbevayà is minge Hudiyu. ²⁴Su heini is minge Hudiyu, is duma kandan, ne egkepatay zutun te gira, ne is samà, ne edekepen ne ed-uwiten diyà te minge meziyù he inged. Ne zutun, heini is Hiruselim he inged te minge Hudiyu, ne edtekutakan te minge etew he kenà minge Hudiyu taman te ebpengelinteuwan te Megbevayà he mekeangked dan.

Is Kedlikù ni Jesus

(Lucas 21:25-33; Mateo 24:29-44; Marcos 13:24-37)

²⁵Ne zutun duen egkeehè niw he singyal ziyà te andew, vulan, wey minge vituen. Ne zini te kelibutan ne ebpekehuyab is gehinawa te tivuuk

he menusiya su egkezineg dan dutun is utew subra he kedselenuhug te zagat wey ebpemeteltelukuney he menge zezekela he vagel. ²⁶Ne zuen en dutun menge etew he egkengevidtawan te kegkehandek su egkengeseeng ke hengkey en is egketemanan te langun he ebpeebuten he egkengehitavu dini te kelibutan su egkengehuyung is minsan hengkey he merayag diyà te langit. ²⁷Ne zutun, siak is Kakey te Menusiya, egkeaha a ziyà te menge gapun is ebpekeuma he utew zekela is gehem ku wey utew merayag is ked-anlag ku. ²⁸Ne emun egkepuun en heini egkengetuman is langun he migkagi ku, ne andam kew wey kegalew kew su megaan en is kedlibriya keniyu te Megbevaya.”

²⁹Ne imezineg kandan ni Jesus is sempita, ke sikandin te, “Isipa niw is menge kayu, lavew en is kayu he igira ³⁰su zini te kenita emun ebpeneringsing en is subpang din ne ebpenlumbey en, egketuenan ta he megaan en is gulavung. ³¹Ne iring din ded daan, emun egkeehè niw he egkengetuman en is langun kayi, egketuenan niw he megaan en is kedhedii te Megbevaya te menusiya. ³²Tenuzi niw is egkegiyen ku keniyu he emun egkeehè niw he egkengetuman en heini, kenè kew pa egkeamin ebpatay taman te kenè pa egkengetuman heini is langun. ³³Egkehanew is langit wey tanà, iyan, is migkagi ku, ne kenà mulà egkehanew te minsan keenu.”

³⁴Ne ke si Jesus te, “Uram kew wey kew kenà kayi zà egketaman te kegkebibu wey kebpmenginun wey te kedlagud niw te menge kelibutanen he menge kinahanglan niw. Su emun kenè kew ed-uram ne egketik-awan kew egkesaut te andew te kedlimasa te Megbevaya te menusiya. Ne egkeiring kew te egketelebpi he rumat. ³⁵Su iring kegaan kayi is kegkeuma kayi te andew te tivuuk he menusiya. ³⁶Umba, mebpekevantey kew, ne layun kew ampù, su pinaagi zà te ked-ampù ne edlig-enan kew te Megbevaya ne kenè kew egkekezian kayi te langun he egkengesegazan niw, ne human kenè kew zutun egkeeled ke ebpekeetuvang kew kedì,” ke si Jesus. ³⁷Ne kada andew zutun ne ebpenurù si Jesus diyà te simbahan he Valey te Megbevaya. Ne te kada mezukilem ne edhendiyà sikandin te vuvungan he egnezanan te Ulivuwan su zutun sikandin edhizegà. ³⁸Ne is langun he etew zutun te inged, ne edselemselem dan edhendutun te Valey te Megbevaya su ebpeming dan te menge penurù din.

Is Bitiyara Mehitenged te Kedekepa ki Jesus

(Lucas 22:1-6; Mateo 26:1-5,14-16; Marcos 14:1,2,10,11; Juan 11:45-53)

22 ¹Ne megaan en dutun egketuman is pista te kegkeena te supas he wazè din tapey he egnezanan te Pista te Kedlevayi. ²Ne zutun, is menge punuan he memumuhat wey is menge menunudlù te kesuguan, ebpengahà te paagi te kegkehimetayi zan ki Jesus he kenà egketuenan te mezakel he menge etew su egkehandek dan te menge etew.

³Ne zutun he timpu si Hudas, is sevaha zutun te sepulù wey zezuwa he sumusundan ni Jesus, ne mid-ulinan sikandin ni Setanas. ⁴Ne heini si Hudas, ne midhendiyà te minge punuan te minge memumuhat wey minge kepitan te minge ebantey zutun te zekelà he simbahan ne migkegiyan din sikandan he egkehimu he ibpalad din si Jesus diyà te kandan. ⁵Ne utew zan dutun nengesuat ne mibpesarig dan he ebegayan dan si Hudas te selapì. ⁶Ne mid-uyun dutun si Hudas; ne puun dutun ne mibpengahà sikandin te paagi wey zin meekali si Jesus wey zan mezakep he kenà egketuanan te minge mezakel he etew.

Is Kedseulug ni Jesus Duma te Minge Sumusundan Din
(*Lucas 22:7-13; Mateo 26:17-25; Marcos 14:12-21; Juan 13:21-30*)

⁷Ne neume en dutun is andew te pista te kegkeena te supas he wazè din tapey. Ne iyan haazà andew te kedlepaa te minge Hudiyu te ibpemuhat he minge nati he kerehidu he egkeenen dan dutun te Pista te Kedlevayi. ⁸Ne zutun midsugù ni Jesus si Pedro wey si Juan he ibpehuna zin sikandan ne migkegiyan din te, “Huna kew en ne tegenaha niw en is idlavung tew kayi te Pista te Kedlevayi.” ⁹Ne mid-insà sikandan ki Jesus te, “Hendei he valey is edhilutuan dey te idlavung te Pista te Kedlevayi?” ¹⁰Ne midtavak si Jesus te, “Emun ebpekeuma kew en diyà te inged, egkesinungung niw is maama he ed-uwit te umuy he nepenù te wahig. Tundug kew kandin diyà te valey he edselezan din. ¹¹Ne kegiyi niw,” ke si Jesus, “is tegigaked dutun te valey, ke sikiyu te, ‘Ibpeinsà te zatù tew kenikew ke hendei he rugu sikandin egkaan duma te minge sumusundan din kayi te Pista te Kedlevayi.’ ” ¹²Ne ke si Jesus maan te, “Ne zutun ibpeehè din keniyu is meluag he rugu ziyà te zivavew he zaan he nehimani. Ne zutun niw tegenaha is idlavung tew.” ¹³Ne migenat dutun haazà is midsugù din, ne langun dutun te migkagi ni Jesus, ne iyan en iyan neehè dan ne zutun dan tegenaha is idlavung te pista.

Sikan is Kedlavung te Nengazen
(*Lucas 22:14-23; Mateo 26:26-30; Marcos 14:22-26; 1 Kurintu 11:23-26*)

¹⁴Ne hein iyan en uras te kedlavung ne mibpinuu si Jesus wey is minge epustul zin is ebpemengaan. ¹⁵Ne migkagi si Jesus diyà te kandan te, “Ute w zekelà dini te gehinawa ku heini is kegkesevaha tew te kegkaan te idlavung kayi te Pista te Kedlevayi te kenè e pa ebpatay. ¹⁶Su venar is egkegiyen ku, kenà ad maan egkaan te idlavung te kedlevayi taman te timpu keuzemà ke egketuman is hustu he ke hulugan din dutun te kedhedii te Megbevayà te menusiya.” ¹⁷Ne zutun ne migkuwa ni Jesus is tasa he midteguan te vinu ne mibpeselematan din te Megbevayà ne migkagi sikandin diyà te minge sumusundan din te, “Med-inum

is kada sevaha keniyu. ¹⁸Ne egkegiyen ku keniyu he kayi zà taman is ked-inum ku kayi te vinu taman dutun keuzemà te egkeume en is kedhadì te Megbevayà.” ¹⁹Ne zutun mid-amì si Jesus dutun te egkeenen dan he supas ne mibpeselematan din daan haazà te Megbevayà. Ne mibpenevìtevi din ne impenduwal zin kandan, ke sikandin te, “Iyan heini lawa ku he ibelukas keniyu. Emun egkeenen niw heini isipa a keniyu.” ²⁰Ne hein neipus dan dutun is egkaan ne migkuwa en maan ni Jesus is tasa ne migkagi te, “Heini ve is inumen, ne tuus te vegu en he paagi te kegelibri he midtukud te Megbevayà ne egkehimu heini pinaagi te lengesa ku he ibpaagas tenged keniyu.

²¹Sevuta niw heini,” ke si Jesus, “he sikan is etew he ebpalad kedì diyà te menge kuntada ku, ne kayi zed guntaan дума tew te ebpememimpinuu! ²²Siak is Kakey te Menusiyà, ebpatay e zed gihapun sumalà is imbanglis kedì te Megbevayà, iyan, kehizu utew te etew he edakal kedì.” ²³Ne zutun mibpein-inseey haazà is menge sumusundan din ke hentei kandan haazà is egkegiyen din he ebpalad kandin.

Is Lavew Keuzemà

²⁴Ne zutun mibpelewelewanà haazà is menge sumusundan din ke hentei is lavew kandan keuzemà. ²⁵Ne zutun migkagi si Jesus te, “Dini te kelibutan, is hadì te kada inged, ne iyan dà ulaula zan is edsugùsugù dà te menge sakup dan su tuus he zekelà is pid-etawan dan. Ne minsan pa zutun egeraran sikandan te, ‘Menavang te menge Etew.’ ²⁶Iyan, sikiyu mulà,” ke si Jesus, “ne kenà egkehimu he iring kayi is ulaula niw. Su sikan is lavew keniyu, ne isipa zin he iyan en sikandin kinevevaan; ne sikan is egalen, ne isipa zin he suluguen sikandin te langun. ²⁷Ne penenglitan, hentei is lavew? Iyan be is ebpinuu su egkaan wey ke iyan be haazà is suluguen he edtangel kandin? Ne siguradu iyan lavew is ebpinuu, ne minsan pa zutun, siak is egalen niw, ne iring a te edtangel keniyu.”

²⁸Ne mid-uman megkagi si Jesus te, “Sikiyu, iyan kew nekid-uunungen kedì te langun he menge kemeregenan ku. ²⁹Mibegayan a te Amey ku he Megbevayà te ketenged te kedhadì keuzemà. Ne iring din ded daan ne ebegayan ku zaan sikiyu te ketenged te kedhadì. ³⁰Keuzemà ke edhadì a ne ebpinuu kew zuma kedì su ebpetugtugenè kiw is egkaan wey ed-inum. Ne ibpehadì ku sikiyu te menge kevuwazan duen te sepulù wey zezuwa he menge anak ni Israyil.”

Is Kegkegiya ni Jesus te Kebarew ni Pedro

(*Lucas 22:31-34; Mateo 26:31-35; Marcos 14:27-31; Juan 13:36-38*)

³¹Ne migkagi si Jesus diyà te ki Simon Pedro te, “He Simon, duen egkegiyen ku kenikew. Midtugutan si Setanas te Megbevayà he

ebpenggezam keniyu te langun. Is kebpenggezam din ne iring te ked-
 ukap te parey su kela ke iring te ukap is kedtuu niw. ³²Iyan, in-ampù ku
 sikew, Simon, diyà te Megbevayà he kenà maawà is kedtuu nu kediey.
 Ne emun melig-en en is kedtuu nu kediey ne himuwa nu he mebmelig-en
 daan is kedtuu te menge zuma nu.” ³³Ne midtavak si Pedro te, “Kenà a
 edsuwey kenikew! Su minsan ke egkepirisu ka ne eduma e en kenikew;
 ne ke edhimetayan ka ne ed-unung e en kenikew!” ³⁴Ne zutun midtavak
 si Jesus te, “Uteu venar, Simon, is egkegiyen ku kenikew he kengkuwan
 te mezikilem te kenè pa ed-ukarà is manuk ne ketetelu ke en ebpekekagi
 he kenà a kenikew egkekilala.”

Is Telaan Diyà te Menge Sumusundan

³⁵Ne zutun migkagi si Jesus diyà te kandan te, “Hein midsugù ku
 sikiyu zengan he indawey ku keniyu he wazà med-uwit te selapì, ne wazà
 med-uwit te ed-ilisan, ne wazà daan med-uwit te ed-ilisan he sepatuh,
 ne hengkey is kurang niw zutun te kedhipanew niw?” Ne midtavak dan
 te, “Wazè dey kurang.” ³⁶Ne migkagi si Jesus te, “Iyan, guntaan, emun
 duen selapì niw wey ed-ilisan niw ne uwita niw en. Ne sikan is wazè din
 ubpit ne ivelegyè din is kumbalè din wey mekepemasa te sundang. ³⁷Su
 kinahanglan he egketuman en dini te kedì sikan is insurat he Lalag te
 Megbevayà he edhenduen te, ‘Inragkes sikandin dutun te menge selaan
 he etew.’” ³⁸Ne zutun migkagi is menge sumusundan din te, “Ahaa
 nu man su zuen dey en dezuwa he sundang.” Ne ke si Jesus te, “Ne
 netengkaan en heeyan.”

Is Ked-ampù ni Jesus Diyà te Buvungan he Ulivuwan (Lucas 22:39-46; Mateo 26:36-46; Marcos 14:32-42)

³⁹Ne zutun migawas si Jesus puun te valey ne midhendiyà te vuvungan
 he egngezanan te Ulivuwan su zutun dan layun edhizegà ne nemenduma
 kandin is menge sumusundan din. ⁴⁰Ne hein nekeuma zan dutun ne
 migkegiyan ni Jesus haazà is menge sumusundan din te, “Ampù kew wey
 kew kenà mezaag te penuley keniyu.” ⁴¹Ne zutun midlaus si Jesus diyà te
 uvey zà ne midluhud ne mid-ampù diyà te Megbevayà. ⁴²Ke sikandin te,
 “Ameu ku, emun iyan egkesuatan nu ne kenè nu en kediey ipesegazi heini
 is merasey he imbanglis nu kediey, iyan, kenà egkesunud is kediey he
 egkesuatan, kekenà, iyan egkesunud is kenikew.” ⁴³Ne zutun te ked-ampù
 din ne nekeuma is belinsuguen te Megbevayà he ebpuun te langit su
 edlig-enan din is gehinawa ni Jesus. ⁴⁴Ne uteu si Jesus dutun neseeng ne
 midhegetan din is ked-ampù din te Megbevayà ne edtegaktak is rimuseng
 din he iring te lengesa.

⁴⁵Ne mid-engked si Jesus is ed-ampù ne midhitindeg ne midlikuan
 din is menge sumusundan din. Ne langun dutun te menge sumusundan

din, ne nemekelipezeng su utew zan mibmeluya tenged te kegkeseeng dan. ⁴⁶Ne zutun migkagi si Jesus diyà te kandan te, “Maan is ebpemenlipezeng kew? Enew kew wey med-ampù wey kew kenà mezaag te penuley keniyu.”

Is Kedekepa ki Jesus

(Lucas 22:47-53; Mateo 26:47-56; Marcos 14:43-50; Juan 18:3-11)

⁴⁷Ne zutun te kemulu pa egkagi si Jesus, ne nekeume en si Hudas, is sevaha zuen te sepulù wey zezuwa he minge sumusundan din. Ne iyan sikandin edhuna te mezakel he minge etew. Ne mid-uevey sikandin diyà te ki Jesus su edhezekan din. ⁴⁸Ne zutun migkagi si Jesus diyà te kandin te, “Kenè be tutuu, Hudas, he heini is kedhazek nu kedì te Kakey te Menusiyà, ne iyan en kebpezekepa nu kedì keniyen te minge zuma nu?” ⁴⁹Ne hein netuenan dutun te minge sumusundan ni Jesus ke hengkey is ed-ul-ulahan te minge etew, migkagi zan diyà te ki Jesus te, “Menu, Datù, egkesuatan nu ve he edsukul key su heini zed is sundang dey?” ⁵⁰Ne is sevaha zutun te minge sumusundan ni Jesus, midtibas din is suluguen te lavew he memumuhat ne netenaan haazà diyà te kewanan he telinga ne nesapla haazà is telinga zin. ⁵¹Ne zutun migkagi si Jesus diyà te minge sumusundan din te, “Ereg kew!” Ne zutun inlikù ni Jesus haazà is telinga zutun te nelepungan ne henduen te wazà pigeyanan gihapun te telinga zin.

⁵²Ne elin daan dutun te nemenhendutun te kedakep ki Jesus is minge punuan te memumuhat wey is minge kepitan te ebantey zutun te zekelà he simbahan wey is minge ebmegurangan te minge Hudiyu. Ne migkegiyan sikandan ni Jesus te, “Tulisan e ve? Su maan is negumeenan kew te ubpit wey lagkut is edakep kedì?” ⁵³Ne hein duma a keniyu kada andew ziyà te Valey te Megbevayà is ebpenuurù ne wazà a keniyu zutun dà dekepa. Iyan, iyan heini guntaan kes timpu he imbanglis keniyu wey niw meveeli is egkesuatan ni Setanas.”

Is KebpemaREW ni Pedro

(Lucas 22:54-62; Mateo 26:57,58,69-75; Marcos 14:53,54,66-72; Juan 18:12-18,25-27)

⁵⁴Ne zutun midakep dan si Jesus ne mid-uwit dan diyà te valey te lavew he memumuhat. Ne si Pedro, midtinundug daan asal kenà utew ed-uevey. ⁵⁵Ne zuen hapuy ziyà te lama zutun te valey ne zuen minge etew he ebpemenhizazang. Ne mid-uevey zutun si Pedro ne midhizazang daan. ⁵⁶Ne zuen dutun suluguen he vahi ne neehè din si Pedro is edhidhizazang. Ne midtengtengan din si Pedro ne migkagi te, “Minsan heeyan is maama ne zuma keniyen te midakep dan.” ⁵⁷Ne midtavak si Pedro te, “Bayi, kenè ku egkekilala heeyan is midakep dan.” ⁵⁸Ne netegtegaad dutun ne zuen

en maan etew he nekekilala ki Pedro. Ne migkagi haazà te, “Sikew, duma ka zaan keniyà te midakep dan.” Ne midtavak si Pedro te, “Mama, kenà a iyan duma zin.” ⁵⁹Ne netegtegaad pa maan dutun ne zuen en maan sevaha he etew he nekekilala ki Pedro he ke sikandin te, “Tutuu iyan he zuma zaan heeyan dutun te midakep su egketuusan he tigGeliliya zaan sikandin.” ⁶⁰Iyan, midtavak en maan si Pedro te, “Kenè ku egketuuan heeyan is migkagi niw.” Ne zutun te kemulu pa egkagi si Pedro ne mid-ukarè en is manuk. ⁶¹Ne zutun midlilingey ni Jesus si Pedro ne midtengtengan din. Ne zutun human metenuzi ni Pedro sikan is migkagi ni Jesus kandin he, “Te kenè pe kan ebpengukarà is manuk, ne ketetelu ke en ebpekekagi he kenà a kenikew egkekilala.” ⁶²Ne zutun mid-awà si Pedro zutun te minge etew ne nekelelendag is edsingew.

Is Kebpesipelahi ki Jesus

(*Lucas 22:63-65; Mateo 26:67,68; Marcos 14:65*)

^{63,64}Ne haazà is minge etew he ebantey ki Jesus, ne mid-eled-eled dan sikandin. Ne mibagkes dan is minge mata zin ne midsumbag dan sikandin, ne ke sikandan te, “Tegnaa nu ke hentei is midsumbag kenikew.” ⁶⁵Ne kenà iyan dà haazà su mezakel pa is memezaat he lalag dan kandin te kedsumpulita zan kandin.

Is Ked-imbistigaha ki Jesus te Minge Punuan

(*Lucas 22:66-71; Mateo 26:59-66; Marcos 14:55-64; Juan 18:19-24*)

⁶⁶Ne hein nepawà dutun, netigum is langun he minge ebmegurangan te minge Hudiyu wey is minge punuan he minge memumuhat, wey is minge menunudlù te kesuguan, ne impeetuvang kandan si Jesus. ⁶⁷Ne mid-insaan dan si Jesus te, “Hengkey, iyan ke en be iyan sikan is mibpilì te Megbevayà he ibpahadi?” Ne midtavak si Jesus te, “Minsan ke egkegiyen ku keniyu he iyan a, ne kenè kew edtuu te egkegiyen ku. ⁶⁸Ne emun id-insè ku heini keniyu ne kenè kew zaan edtavak. ⁶⁹Iyan, heini zà is egkekagi ku keniyu, ‘Megaan en egketuman is andew he siaken, is netagnà he Kakey te Menusiyà, ne ebpekepinuu e en diyà te zapit te egkekewanan te Megbevayà he utew mekegegehem.’” ⁷⁰Ne migkagi zan is langun te, “Ne emun iyan heeyan lalag nu ne hentei ke ve? Anak ke ve te Megbevayà?” Ne midtavak si Jesus te, “Uya, iyan is migkagi niw.” ⁷¹Ne zutun migkagi zan te, “Wazè en kinahanglan pa he zuen pa minge edsumbang kandin su nezineg tew en is minge lalag din he utew supak te Megbevayà.”

Is Ked-imbistigaha ni Pilatu ki Jesus

(*Lucas 23:1-5; Mateo 27:1,2,11-14; Marcos 15:1-5; Juan 18:28-38*)

23 ¹Ne zutun, haazà is langun he minge punuan he nengetigum dutun, ne mid-uwit dan si Jesus diyà te ki Gubirnedur Pilatu su

wey zin mehkumi. ²Ne hein nekeuma zan dutun ne impezineg dan ki Pilatu is menge sumbung dan. Ke sikandan te, “Midsusi zey heini is etew ne netuenan dey he edsinamuk kayi te inged tew su ibpeengked din is menge etew he ebayad te vuhis diyà te lavew he hadi tew ziyà te inged he Ruma. Ne kenà duen dà taman su egkegiyen din he iyan sikandin si Kristu, he ke vā dà egkegiya, hadi.” ³Ne si Pilatu, mid-insaan din si Jesus te, “Hadi ke ve te menge Hudiya?” Ne midtavak si Jesus te, “Uya, iyan is migkagi nu.” ⁴Ne zutun migkagi si Pilatu ziyà te menge punuan he memumuhat wey menge etew te, “Wazà netuenan ku he engayan he idsiluti kayi te etew,” ke sikandin. ⁵Iyan, nasì nememensag is menge etew zutun he egkagi te, “Edsinamuk is menge etew he ebpemineg te menge penurù kenyan! Mibpuunan din is kebpenurù din diyà te prubinsya he Geliliya ne midtukid din daan is menge inged dini te prubinsya he Hudiya, Ne guntaan, dini en maan sikandin te Hiruselim.”

Is Ked-imbistigaha ni Hirudis ki Jesus

⁶Ne hein nezing ni Pilatu heini ne mid-insà sikandin te, “TigGeliliya ve heini is etew?” ⁷Ne midtavak dan te, “Uya, tigGeliliya heeyan.” Ne hein netuenan din he sakup si Jesus te prubinsya he ebeyveyaan ni Hirudis ne impeuwit din si Jesus diyà te ki Hirudis. Su neserengà he zutun daan si Hirudis te Hiruselim. ⁸Ne si Hirudis, ne utew nesuatsuat hein neehè din si Jesus su neuget dà he egkesuatan din si Jesus te ed-ahà. Egkesuatan din he meehè din is menge egkein-inuwan he nezing din he ebpemeelan ni Jesus. ⁹Ne zutun mezakel is menge insà ni Hirudis ki Jesus, iyan, wazà si Jesus medtavak. ¹⁰Ne zutun, haazà is menge punuan he menge memumuhat wey is menge menunudlù te kesuguan, ne mid-uey zan ne utew meinit is gehinawa zan te kedsumbunga zan ki Jesus. ¹¹Ne zutun si Hirudis wey is menge sundaru zin, ne mibaleyvaley zan si Jesus ne mid-eled-eled dan sikandin. Ne midsun-uzan dan te meupiya he bisti su uvag kun hadi, ne zutun impelikù dan diyà te ki Pilatu. ¹²Ne iyan haazà andew te kebpeked-emigu ni Pilatu wey si Hirudis su zutun te nenghuna he timpu ne kenà meupiya is kedepitè dan.

Is Kedhukumi ki Jesus te Kemetayen

(Lucas 23:13-25; Mateo 27:15-26; Marcos 15:6-15; Juan 18:39-19:16)

¹³Ne hein diyè en maan si Jesus te ki Pilatu ne midtigum ni Pilatu is menge punuan he memumuhat wey is menge ebmegurangan te menge Hudiya wey is menge mezakel he etew. ¹⁴Ne ke sikandin diyà te kandan te, “Heini is etew he in-etuvang niw kayi te kedi, migkagi niw he edsinamuk sikandin te inged tew, iyan, mibpurungan ku sikandin susiya kayi te etuvangan te langun te sikiyu ne wazè ku egkeahà he salè din. ¹⁵Ne si Hirudis daan, wazè din egkeahà he salà kayi te etew su impelikù

din kayi te kedì. Wazà iyan ulaula kayi te etew he zait he idhimetayi kandin. ¹⁶Ne ibpevugel ku zà sikandin ne ibpegawas ku en.” ¹⁷Ne iyan ingkekegiya kayi ni Pilatu su neleyaman te menge Hudiyu he kada egketuman haazà is Pista te Kedlevayi ne kinahanglan he ibpegawas ni Pilatu is sevaha he pirusu he Hudiyu. ¹⁸Ne hein nezinég te mezakel he etew haazà is migkagi ni Pilatu ne mibpememensag dan te, “Ipehimetayi nu heeyan he etew, ne iyan nu ipegawas si Berabas!” ¹⁹Ne heini si Berabas, ne iyan ingkepirisu zin su impepekidtebek din te gubirnu is menge etew ne kenà dutun dà taman su nekevunù daan sikandin te etew. ²⁰Ne si Pilatu, ne iyan din egkesuatan he iyan ibpegawas si Jesus, ne mid-uman sikandin med-insà diyà te nengetigum he menge etew ke hengkey is egkesuatan dan, ²¹iyán, nasì mid-iseg sikandan mebpmemensag he egkagi te, “Iransang te krus! Iransang te krus!” ²²Ne migkagi si Pilatu te iketelu, ke sikandin te, “Maan? Duen be mezaat he mid-ulaula zin? Wazè ku man egkeahà he salà he zait he idhimetayi kandin. Ibpevugel ku zà ne ibpegawas ku en.” ²³Ne zutun mid-iseg is kebpemensag dan he ibperansang dan si Jesus diyà te krus. Ne hein neuget kenè en ebpeketigker si Pilatu, ²⁴ne midtugut sikandin he idransang si Jesus te krus. ²⁵Ne zutun midlibri ni Pilatu si Berabas he mibpirisu tenged te kedsinamuk din wey kebunua zin te etew. Ne si Jesus, insugù en ni Pilatu he meulaula ziyà te kandin is egkesuatan te menge etew.

Is Kedrensanga ki Jesus Diyà te Krus

(Lucas 23:26-43; Mateo 27:32-44; Marcos 15:21-32; Juan 19:17-27)

²⁶Ne zutun migkuwa zan si Jesus ne migenat dan su ed-uwiten dan pehendiyà te gawas dutun te inged. Ne ziyà te zalan nesinugung dan is etew he tigSirini he egngezanan ki Simon. Heini si Simon, diyà ebpuun te unayan ne edhendiyà te inged. Ne mibpeges dan ipetiàng dutun te krus he edtiàngen ni Jesus.

²⁷Ne zutun te ked-uwita zan ki Jesus, utew mezakel is menge etew he nemenduma. Ne zuen dutun menge vahi he ebpmenlelendag su edsinegawan dan si Jesus. ²⁸Ne midlilingey si Jesus diyà te kandan ne migkagi te, “Sikiyu is menge vahi he tigHiruselim, kenà a iyan keniyu sinegawi, kekenà, iyan niw sinegawi is egkeulaula niw wey te menge anak niw. ²⁹Su egkeuma is andew he egkehitavù kayi te keniyu is dekelà he kemeresayan. Ne zutun egkagi is menge etew he utew zeyzey sikan is bahi he wazè din anak wey wazà edlegimuwen. ³⁰Ne zutun he timpu egkegiyan te menge etew is menge vuntud te, ‘Ketempagi key.’ Ne egkegiyan dan daan is menge vuvungan te, ‘Bumbuni key.’ ³¹Su,” ke si Jesus diyà te kandan te, “emun iyan heini ed-ul-ulahan dan kedì te iring te kayu he wazà megangu *su wazà mulà kedì he salà*, ne edhuna pa kayi is ed-ul-ulahan dan keniyu te iring te kayu he negangu en.”

³²Ne zuen daan dutun dezuwa he tulisan he ed-uwiten dan su edhimitayan dan duma ki Jesus. ³³Ne nekeuma zan dutun te vuvungan he egngезanan te Tulan te Ulu ne zutun dan iransang si Jesus te krus ne inransang dan daan haazà is menge tulisan te zezuwa zaan he krus. Impasek dan is sevaha he krus diyà te egkekewanan ni Jesus, ne is sevaha, impasek dan diyà te egkegiving din. ³⁴Ne zutun te kemulu zan pa idransang si Jesus, ne mid-ampù sikandin diyà te Megbevayà, ke sikandin te, “Amey ku, peseyluwa nu sikandan su wazè dan metueni ke hengkey heini is ed-ul-olahan dan.” Ne zutun, haazà is midransang kandin, midripa zan ke hentei is ebpekeangkan te menge ugelingen ni Jesus. ³⁵Ne is menge etew, ne ebpemenhitindег dan dutun he ebantey; ne is menge punuan te menge Hudiyu, ne ed-undaunda kandin, ke sikandan te, “Wey zè be! Nelibri zin is duma; ne emun tutuu he iyan sikandin sikan is hadi he mibpili te Megbevayà, ed-ahaan ta ke egkelibri zin is keugelingen din.” ³⁶Ne kes menge sundaru zaan, ne ebpen-undaunda zaan kandin. Mid-uvey zan diyà te kandin su ibpeinum dan te vinu. ³⁷Ne ke sikandan te, “Emun tutuu iyan he hadi ka te menge Hudiyu ne libriya nu is keugelingen nu!” ³⁸Ne impezeket dan is surat te zivavew zin diyà te krus he edhenduen haazà is surat te, “Iyan heini sikan is Hadì te menge Hudiyu.”

³⁹Ne is sevaha zutun te zezuwa he tulisan he inransang diyà te pesikilizà ni Jesus, ne edsumpalit en daan kandin. Ke sikandin te, “Emun tutuu iyan he iyan ka sikan is hadi he mibpili te Megbevayà ne hante kun be iyan, libriya nu is lawa nu kenyan ne libriya key zaan kenikew.” ⁴⁰Ne haazà is sevaha, ne migkegiyan din haazà is duma zin te, “Maan is egkagi ka te iring kenyan? Wazè nu ve kegkehandek te Megbevayà? Sikitew is tetelu, ne pudu kiw ebpatеy kayi, ⁴¹ iyan, sikita is dezuwa, ne engayan en he edhimitayan ki su id-ulì dini te kenita is kelelalung ta. Iyan, heini he etew mulà, ne wazè nehimu zin he mezaat.” ⁴²Ne zutun migkegiyan din si Jesus te, “He Jesus, kenà a kenikew lipati zutun te kedhadì nu en keuzemà.” ⁴³Ne migkagi si Jesus diyà te kandin te, “Benar heini is egkegiyan ku kenikew he guntaan dà ebpezumehè ki zutun te inged te edtulusen.”

Is Kebpatey ni Jesus

(*Lucas 23:44-49; Mateo 27:45-56; Marcos 15:33-41; Juan 19:28-30*)

⁴⁴Ne hein neudtu is andew zutun ne midtik-ew mebmerusirem is tivuuk he kelibutan seled te menge tetelu he uras. ⁴⁵Ne zutun te iyan daan haazà he uras, kes utew mekepal he manggad he ingkurtina zuen te simbahan he Valey te Megbevayà, ne netik-ew mevindas diyà te liwezaan. ⁴⁶Ne zutun ne migkulahì si Jesus is egkagi te, “Amà, ibpegewezan ku en kenikew is gimukud ku.” Ne iyan dà haazà ne naawà is gehinawa

zin. ⁴⁷Ne zutun, sikan is kepitan te minge sundaru zutun, hein neehè din heini is neulaula ne nekezalig te Megbevayà, ke sikandin te, “Tutuu ves iyan he wazà mezaat he ulaula kayi he etew!” ⁴⁸Ne haazà is minge etew he nengevurun dutun su ebantey zan, ne hein neehè dan haazà is neulaula, mid-ulì dan he utew memevegat is gehinawa. ⁴⁹Ne is langun he minge emigu ni Jesus, ragkes is minge vahi he nemendumazuma kandin he ebpemuun te Geliliya, ne ziyè dan te malù meziyù is ebantey zutun te langun he neulaula.

Is Kedlevenga ki Jesus

(Lucas 23:50-56; Mateo 27:57-61; Marcos 15:42-47; Juan 19:38-42)

^{50,51}Ne zuen sevaha zutun he etew he egngезanan ki Jose he meginged diyà te inged he Erimetiya he ziyà te prubinsya he Hudiya. Heini si Jose, ne metazeng he etew ne telehuzen daan. Sevaha sikandin te minge Hudiyu he edtagad te kedhadì te Megbevayà dini te kelibutan. Sevaha zaan sikandin te minge zatù te minge Hudiyu, iyan, wazà sikandin mekeuyun te kedhimetayi ki Jesus. ⁵²Ne heini si Jose, ne midhendiyà sikandin te ki Pilatu ne midhangyù din he egkuwaan din is lawa ni Jesus; ne intugut kandin ni Pilatu. ⁵³Ne migkuwa ni Jose haazà is lawa ni Jesus ne mibukusan din te malung he meputi. Ne zuen surung he penlevengà he ingkalut diyà te kelendigan he pagang he wazè pa meselezi te minatey. Ne zutun iseled ni Jose is lawa ni Jesus. ⁵⁴Mahapun en haazà dutun te andew he Birnis ne emun edsanlep en dutun is andew ne iyan puunà te Andew te Kedhimeley.

⁵⁵Ne sikan is minge vahi he ebpemuun diyà te Geliliya he nemenduma ki Jesus, ne miduma zan ki Jose te edleveng dutun te lawa ni Jesus. Ne neehè dan is midsevukan ki Jesus dutun te penlevengà. ⁵⁶Ne zutun mid-ulì dan su ed-endamen dan is minge mehemut he sulù wey lana he idhaplas te lawa ni Jesus.

Ne zutun te Andew te Kedhimeley, wazè dan mebaal su edtumanen dan is insugù dutun te kesuguan he imbilinbilin kandan.

Is Kegkevanhew ni Jesus

(Lucas 24:1-12; Mateo 28:1-10; Marcos 16:1-8; Juan 20:1-10)

24 ¹Ne hein neiwas is Andew te Kedhimeley te kegkepawè din dutun te andew he Duminggu, mibpehendiyè en maan haazà is minge vahi te midlevengan ki Jesus ne mid-uwit dan sikan is minge mehemut he idhaplas he mid-andam dan. ²Nekeuma zan dutun ne neehè dan he in-awè en sikan is batu he inlekeb dutun te surung he penlevengà. ³Ne mid-ahuk dan dutun ne ebpenlenglenguwen dan kes lawa te Nengazen he si Jesus ne wazè en dutun. ⁴Ne zutun utew zan egkengeregenan he ebpen-isip-isip; ne netik-ew mebpaaahà kandan is

dezuwa he maama he ebpemengenamag te keputi is bisti zan. ⁵Ne haazà is menge vahi, ne midluhud dan is edungul su utew zan nengehandek. Ne migkagi kandan haazà is menge maama te, “Maan is kayi niw ebpen-ahaa te edlevengan te minatey is etew he uuyag? ⁶Su si Jesus, ne wazè en kayi su nevanhew en. Tentenuzi niw ke hengkey is migkagi zin keniyu hein diyè kew pa te Geliliya ⁷su migkagi zin he sikandin is Kakey te Menusiyà, ne ibpalad diyà te menge lalung he etew ne idransang sikandin diyà te krus ne seled te tetelu he andew ne egkevanhew sikandin.” ⁸Ne human metenuzi zutun te menge vahi haazà is migkagi ni Jesus. ⁹Ne zutun mid-ulì haazà is menge vahi ne mibpenudtulan dan sikan is sepulù wey sevaha he menge epustul ni Jesus wey is дума pa he menge etew. ¹⁰Haazà is menge vahi, ne iyan si Maria Megdelina, si Juana, wey elin daan si Maria he iney ni Santiago, ne zuen pa menge zuma zan he vahi. Iyan sikandan mibpenudtul ziyà te menge epustul te nengehitavù kandan. ¹¹Iyan, sikan is menge epustul ni Jesus, kunaan dan ke kenà tutuu haazà ne wazè dan medtuu zutun te tudtul te menge vahi. ¹²Iyan, si Pedro, hein nezing din haazà is tudtul ne mibpelelaguy sikandin is ebpehendiyà te surung he penlevengà. Ne hein nekeuma zutun ne midsiniling sikandin ne iyan din dà naahà kes meputi he manggad he imbukus te lawa ni Jesus ne mid-awà dutun sikandin is mid-ulì ne utew neinuinu ke maan is wazà dutun is lawa ni Jesus.

Is Kebpaahà ni Jesus Duen te Zezuwa he Etew

(Lucas 24:13-35; Marcos 16:12,13)

¹³Ne zutun daan he andew ne zuen dezuwa he sumusundan he ebpuun diyà te Hiruselim he edhendiyà te inged he egngezanan te Imawus. Ne haazà he inged, ne menge sepulù wey tetelu he kilumitru is keziyù din diyà te inged he Hiruselim. ¹⁴Ne zutun te edhipanew sikandan ne iyan dan edhisgutan is mehitenged te langun he neulaula ki Jesus. ¹⁵Ne zutun te kebitiyara zan dutun ne midlambag si Jesus kandan ne mibpekiduma kandan. ¹⁶Neehè dan sikandin, iyan, wazà mebpekilala kandan si Jesus. ¹⁷Ne migkagi si Jesus diyà te kandan te, “Hengkey is edhisgutan niw te edhipanew?” Ne neketeren dan dutun ne egkeahà diyà te kebuwuked dan he utew zan egkeseeng. ¹⁸Ne midtavak is sevaha zutun he egngezanan ki Keliyupas, ke sikandin te, “Iyan ke zà buwa etew he nekehengkayi te inged he Hiruselim he wazà metau kayi te vegu pa he nehitavù.” ¹⁹Ne mid-uman med-insà si Jesus kandan te, “Maan? Hengkey is nehitavù?” Ne midtavak dan te, “Iyan is nehitavù ki Jesus he tigNeserit. Ebpeneuven sikandin te Megbevayà ne midtuuwan sikandin te langun he menge etew. Dekelà is gehem din te ebpenurù ne mekegegehem daan sikandin he ebaal te menge egkengein-inuwan. ²⁰Is menge punuan he memumuhat wey is menge ebmegurangan tew, ne impalad dan sikandin diyà te ki Pilatu.

Ne midhukuman sikandin he edhimetayan. Ne zutun midhimetayan dan pinaagi te kedrensanga kandin te krus. ²¹Ne netagù diyà te gehinawa zey he iyan en pezem sikandin kes midsugù te Megbevayà he edlibri te langun he kevuwazan ni Israyil, iyan, seled en guntaan te tetelu he kezukileman is kedhimetayi kandin. ²²Ne geina te meselem neumanan is kegkeinuinu zey su zuen menge zuma zey he menge vahi he midselem dan diyà te midlevengan kandin. ²³Ne nekeuma zan dutun ne wazè dan maahà sikan is lawa zin. Ne midlikù dan diyà te kenami ne mibpenudtul zan he zuen menge velinsuguen te Megbevayà he mibpaahà kandan. Ne migkagi kun dutun te menge velinsuguen he nevanhew en si Jesus. ²⁴Ne zuen pa zuma zey zutun he midsuvar mebephendutun te surung he penlevengà ne iring ded daan dutun is neehè dan te migkagi zutun te menge vahi, iyan, wazè dan maahà is lawa ni Jesus.”

²⁵Ne zutun migkagi si Jesus diyà te kandan te, “Kurang kew pe bes te ked-isip. Maan is utew meregen diyan te keniyu is kebpeketuu niw te langun he netagnà dengan te menge ebpemeneuven te Megbevayà? ²⁶Su kinahanglan he ebpekeagi pa te kemeresayan sikan is hadi he mibpili te Megbevayà ne human ibegey kandin is kebayàbayà te minsan hengkey.” ²⁷Ne zutun midseysey ni Jesus kandan ke hengkey is langun he menge lalag te Megbevayà mehitenged kandin he insurat te langun he menge ebpemeneuven te Megbevayà igenat dà ki Moises dengan taman te huziyan he menge ebpemeneuven.

²⁸Ne hein ebpekeuma zan en dutun te ebpeveyaan dan he inged ne henduen be te edlaus pa si Jesus, ²⁹iyang, migkegiyan dan sikandin te, “Kenè ke pa laus, ne zini ka hulavung su mahapun en utew.” Ne iyan dà haazà, ne mibpekiduma si Jesus kandan. ³⁰Ne hein diyè dan en te valey ne mibpinuu zan is egkaan. Ne si Jesus, migkuwa zin is egkeenen dan he supas. Ne mibpeselematan din te Megbevayà ne mibpenevì din ne human din ipemegey kandan. ³¹Ne zutun, human dan mekilala si Jesus su nemelmelegan dan te ed-ahà. Iyan, netekew maawà dutun si Jesus diyà te ked-ehè dan. ³²Ne mibpelelagà haazà is dezuwa he etew he egkagi te, “Umba ves utew ta nesuati geina ziyà te zalan te ebpeming is kedseysayi zin kenita zuen te Lalag te Megbevayà.”

³³Ne zutun ne midhitindog dan ne migaanggaan dan medlikù diyà te Hiruselim. Ne hein nekeuma zan ne neumahan dan sikan is sepulù wey sevaha he menge epustul ni Jesus wey is menge zuma he sumusundan he nengetigum diyà te sengevaley. ³⁴Ne iyan ingketigum dan su ebpetudtudtulè dan he egkagi te, “Benar ves iyan he nevanhew is Nengazen su mibpaahà ki Pedro.” ³⁵Ne zutun, haazà is dezuwa he ebpuun te Imawus, ne mibpenudtul zan ke hengkey is nehitavù kandan diyà te zalan. Ne midtudtul zan daan he zutun dan en mekilala si Jesus hein mibpenevì din en is supas dutun te kegkaan dan.

Is Kebpaahà ni Jesus te Menge Epustul
(Lucas 24:36-49; Mateo 28:16-20; Marcos 16:14-18;
Juan 20:19-23; Nengeulaula 1:6-8)

³⁶Ne zutun te kemulu zan pa ebpetudtudtulà kayi ne netekewtekew mebpegawagawa si Jesus diyà te teliwazè dan. Ne migkagi sikandin te, “Kenè kew mengeseeng.” ³⁷Ne utew zan dutun nengehandek su kunaan dan ke gimukud dà ni Jesus is mibpaahà kandan. ³⁸Iyan, migkagi zutun si Jesus diyà te kandan te, “Ne maan is egkengehandek kew kedi? Maan is egkezuwazuwa kew kedi? ³⁹Ahaa niw man heini is palad ku wey paa ku su iyan e zed! Semsama a keniyu ne egketuanan niw! Su is gimukud, ne wazè din lawa, iyan, siak, ahaa niw man, duen lawa ku,” ke sikandin. ⁴⁰Ne impeehè din kandan is menge imbayà te ransang diyà te menge palad din wey paa zin. ⁴¹Ne geina te kemulu zan pa eduwazuwa, asal, utew zan nengegalew, mid-insà si Jesus te, “Duen be egkeenen niw kayi?” ⁴²Ne mibegayan dan sikandin te tinuug he pait. ⁴³Ne migkuwa zin haazà is pait ne migkaan din.

⁴⁴Ne zutun migkagi si Jesus diyà te kandan te, “Iyan heini sikan is migkagi ku keniyu hein kemulu e pa zuma niw. Is langun mehitenged kedi he impesurat dengan te Megbevayà ki Moises, wey kes langun he impesurat din te zuma pa he ebpemeneuven din, wey minsan kes insurat dengan duen te libru te menge Salmo, ne kinahanglan he egketuman pinaagi te neulaula zini te kedi.” ⁴⁵Ne zutun impesavut din human kandan is langun te impemesurat he Lalag te Megbevayà. ⁴⁶Ke sikandin te, “Ibpesavut duen te insurat he Lalag te Megbevayà he kinahanglan he siak is hadi he mibpili te Megbevayà, ne edhimetayan a ne seled te tetelu he andew zutun ne ebhawan a te Megbevayà. ⁴⁷Ne ibpesavut daan dutun he kinahanglan he edsuguen ku sikiyu te kebpenudtul te Meupiya he Tudtulanen. Ebpuunan niw is kebpenudtul niw zini te Hiruselim ne ieneb niw heini ipesavut te tivuuk he kelibutan. Ipesavut niw he kinahanglan he ed-iniyugan te menge etew is memezaat he ulaula ne human dan ebpeseyluwa te Megbevayà. ⁴⁸Ne kinahanglan he iyan kew mebpsavut kayi te langun he impesurat he Lalag te Megbevayà he netuman kayi te kedi su nengeehè niw en. ⁴⁹Ne edsuguen ku zini te keniyu is Wagas he Mulin-ulin he impesarig te Amey ku he Megbevayà. Iyan, dini kew tagad te inged he Hiruselim taman te kenè kew pa egkevulusan te gehem din he ebpuun te langit.”

Is Kegkevaton ni Jesus Diyà te Langit
(Lucas 24:50-53; Marcos 16:19,20; Nengeulaula 1:9-11)

⁵⁰Ne te nekepasad si Jesus dutun is egkagi ne mid-uwit din sikandan diyà te gawas te inged he Hiruselim, ne hein diyè dan en te uvey te

inged he eggezanan te Bitanya, ne imbayew zin is menge velad din su ebpenubtuvazan din sikandan. ⁵¹Ne zutun te kemulu pa sikandin ebpenuvadtuvad ne nevatun sikandin pehendiyà te langit. ⁵²Ne mid-azap dan sikandin ne utew zan nengelipey is mid-uli diyà te Hiruselim. ⁵³Ne andew-andew ne layun sikandan diyà te simbahan he Valey te Megbevayà is edalig te Megbevayà.